

دكتور لامؤاخذة من تانى

تأليف

شادى خيرى حكيم

طبعة ٢٠١٧

حكيم، شادى خيرى

دكتور لامؤاخذة من تانى: شادى خيرى حكم- -. الجيزة: أطلس
للنشر والإنتاج الإعلامي، ٢٠١٦ .

٢٩٦ ص، ٢٠ سم

تدمك: ٢ ٤٧٩ ٣٩٩ ٩٧٧ ٩٧٨

١- القصص الفكاهية ٢- القصص العربية القصيرة

أ - العنوان

٨١٣,٠٦

دكتور لامؤاخذة من تانى

تأليف

شادى خيرى حكيم



الكتاب : دكتور لامؤاخذة من تانى

المؤلف : شادى خيرى حكيم

الغلاف : أحمد الصباغ

الناشر : أطلس للنشر والإنتاج الإعلامى ش.م.م

٢٥ ش وادى النيل - المهندسين - الجيزة

atlas@innovations-co.com

www.atlas-publishing.com

تليفون : ٣٣٠ ٢٧٩٦٥ - ٣٣٠ ٤٢٤٧١ - ٣٣٤٦٥٨٥

فاكس : ٣٣٠ ٢٨٣٢٨

رئيس مجلس الإدارة
سرنا محمد

عادل المصرى

عضو مجلس الإدارة
علاء محمد

المشرف
علاء محمد

نوران المصرى

رقم الإيداع

٢٠١٦/٢٢٤٨٢

الترقيم الدولى

٩٧٨-٩٧٧-٣٩٩-٤٧٩-٢

الطبعة الاولى

طبعة ٢٠١٧

إهداء

إلى كل الأطباء، زملاء الدراسة، وزملاء العمل.. خلاص يا بني منك ليه.. على إيد العبد لله فضيحتنا بقيت ولا فضيحة الـ❖❖❖ اللي بطنها بانته.. انتوا لازم تكونوا فخورين بنفسكم وبيا.. بقالكم لسان يتكلم باسمكم.. ومش أي لسان.. دا لسان يستاهل قطعه..

للطابور الطويل من الناس اللي ساندتني ودعمتني ونصحتني وساعدتني.. قرايبي وأصدقائي وزمالي اللي قرررو يعملوا لي دعاية بين معارفهم..

لكل واحد كتبت عنه أو الهمني أو شاركني موقف من المواقف.. لكل واحد عرف نفسه لما قرا قصة أنا كاتبها عنه، ومازعلش وماتقمصش واستحمل هزاري الغلس..

لكل واحد عرف نفسه لما قرا قصة وطلع عيل ضيق الأفق واتصل بيا شتمني أو هزأني أو استتاني تحت العيادة عشان يزقلني بطوبة.. هو مفيش sense of humour خالص!!

إلى أختي مريان.. لازم تفهمي إني خلاص بقيت نجم..
شادي القديم تتسيه.. حاولي تتعايشي مع الوضع الجديد..
للاسماء العملاقة من الأدباء والكتاب اللي شكلوا ثقافتني..
أمثال نجيب محفوظ، توفيق الحكيم، أحمد رجب، أنيس
منصور، نبيل فاروق، أحمد خالد توفيق، أمل دنقل، الأبنودي،
جورج اورويل، باولو كويلو، ماركيو، ه.ج. ويلز، ديكنز، جون
جريشام، شكسبير، ومجلة ميكي.. الواحد مكسوف يكتب لكم
شكر بصراحة.. مقامكم أكبر من كدا بكثير..



مقدمة

في أم الدنيا يا جماعة الدكتور في عيادته بيبقى عامل زي «أليس في بلاد العجائب».. يعني طبيعي جدا إنك تشوف ققط بتطير، وتنين بيغني، وأرانب بتكلم ورق الكوتشينة.. وزي ما أليس بطلت تتدهش بعد أول حلقتين في المسلسل، وبقت بتتعامل مع الأمور دي على إنها بديهيات.. الدكاترة برضو بيتعاملوا مع الغرائب والماورائيات اللي بيشفوها على إنها من المسلمات..

الكتاب باختصار هو جزء تاني من الكتاب الأول دكتور لا مؤاخذة.. الدرة التي حازت على اعجاب الجماهير.. الأسطورة.. مرجع الأدب الساخر الذي ملأ الدنيا طولاً وعرضاً..

عارف عارف.. مايشكرش في نفسه إلا الشيطان.. خرينا في موضوع الكتاب..

الكتاب عبارة عن مجموعة تانية من القصص اللي بتحكي مواقف حصلت معايا.. خمسين قصة معظمها بتتكلم عن مقالب حصلت لي في شغلي، وبعضها بيتكلم عن مواقف حصلت في حياتي الشخصية.. أي إنها طبق الأصل العلقة اللي فاتت (بصوت سعيد صالح)!!

وطبعاً زي الكتاب الأول، أنا راعيت التجديد والابتعاد عن النمطية..

إيه دا؟ راعيت ونمطية!! راعيت ونمطية!!! أنا بقيت باتكلم زي الناس التانيين على فكرة ☹️ ☹️.. والأسوأ من كذا إني بقيت لما امضي على حاجة باكتب مع حبي وإعزازي زي ميرفت أمين!!!



ما بعد المقدمة !!

(كلام مهم مالوش أي تلاتين لازمة)

فيه دراسة نفسية بتقول:

- الإنسان اللي بيشتغل 8 ساعات في اليوم مش بيشعر
بالسعادة..

لكن الواقع الأليم بيقول:

- الدكتور من دول بيشتغل 24 ساعة في الـ 8 ساعات!!!!

فالنتيجة الحتمية:

- إحنا بنتلاشى.. بننقرض.. عوامل التعرية مبهدلانا..

الحل الجزري:

- يا ريت كان فيه يابني، ماكنتش اعزه عنك.. دا انت حبيبي..

الحلول البديلة:

- اقنع نفسك إن دا كلام كفار مايمشيش علينا..

- اقنع نفسك إنك سعيد بس مش واخد بالك..

- اقنع نفسك إن الطب كفاية عليه كدا وغير مهنة.. ممكن

تشتغل رقاصة مثلاً.. واهو بجملة التعرية..

- اقنع نفسك إن الإدمان هو الحل..



دكتور.. لا مؤاخذاة!!

من ثاني

(لا يزال الفش..... إحم.. الضرم مستمرا)

- أنا: الدكاترة ليهم مطالب يا حكومة..
- الحكومة: ويا ترى مطالبكم كدكاترة تعتبر مطالب مشروعة؟؟
- أنا: مش بالظبط.. أنا شخصيا باطالب بكباريه في كل مستشفى، وباكتة بانجو في كل نبطشية..
- الحكومة: عموما إن يكون لك مطالب دا حقك، وإني ارفضها فدا حقي..
- أنا: مسيرك تعيي يا حكومة وتيجي تحت إيدي..
- الحكومة: انسى.. أنا كحكومة مابيعاش.. ولو عييت، باسافر اتعالج برآ..



المشهد الأول

يحدث بالفعل باستمرار:

الزمن: مش حاجة معينة..

المكان: عيادات متفرقة..

عنوان المشهد: صدق أو لا تصدق.. بس لازم تصدق.. عيب،

دا كلام أمانة..

أي دكتور بيعدي عليه يوماتي طابور طويل من العيانيين أصحاب الشكاوي الغريبة.. المنيو بتاع الشكاوي التي لا تصدق حجمه لانوهائي.. طوله من طول تاريخ المهنة نفسها.. لكن من الممكن تقسيم الشكاوي لنوعين رئيسيين..

النوع الأول: هي شكاوي أو أمراض موجودة في كتب الطب

فعلا.. لكن مالهاش دعوى اطلاقا بتخصص القلب..

السؤال: اومال إيه اللي جابهم عندي..

الإجابة: ماعرفش طبعا.. مفيش سبب وجيه الحقيقة..

لكن لسبب خفي، الناس قرروا إن دكتور القلب هو المسئول عن كل مرض المريض مش عارفه.. أو عارفه بس مش عارف يروح لمين.. أو عارف يروح لمين بس مستبعد أو مستتقل دم ال «مين» المطلوب..

دكتور القلب هو المسئول عن حالات الإمساك والإسهال والصفرا والدورة الشهرية اللي جات قبل معادها بيومين من غير ما تستأذن..

وطبعا من مهامه الرئيسية علاج تسوس الأسنان وترهلات البطن والبواسير واعوجاج الحاجز الأنفي والمس والسحر واللي معمول لهم عمل..

هو المسئول عن إن أستاذ عماد مستواه مش قد كدا في السيكوسيكو.. ولما السيكوسيكو ظبط مع عماد وربنا كرمه بينت سماها جنا، دكتور القلب بقى مسئول عن جنا.. بيتحمل عبء إن جنا اتأخرت في التسنين.. مسئول عن تخلفها الدراسي.. وعن إنها وصلت لسن 23 ولسة ماتجوزتش.. وعن إنها لما اتجوزت فيه ثقب أسود شفتها هي وجوزها وغاروا في داهية وريحونا..

لا يزال الضم... إحمر.. الضم مستمرا

النوع الثاني: هي شكاوي مش موجودة أساسا في كل مراجع الطب البشري أو البيطري.. لكنها من وحي خيال المريض والقناة غير مسئولة عن أي تشابه بينها وبين الواقع.. ودي عينة من اللي أنا باسمعه كل يوم في العيادة:

— زبونة رقم واحد: نفسي يا دكتور..

— أنا: ماله؟؟

— الزبونة: باحس إنه طالع من كتفي..

— أنا: من كتفك إزاي؟؟!!!

— الزبونة: وساعات من ضهري..

— أنا: ما هو أنا مافهمتش أول واحدة عشان تقولي لي الثانية..



— زبون رقم اتنين: رجليا زي الإزاز يا دكتور..

— أنا: وجعاك يعني؟؟

— الزبون: لأ.. إزاز يا دكتور إزاز.. حط إيدك كدا..

— أنا: تصدق صح!! سوري ماكنتش واخذ بالي..



— زبونة رقم ثلاثة: قلبي زي قربة المية..

— أنا: !!!!!



— زبونة رقم اربعة: عايزة ابولاً..

— أنا: يعني الحقيقة It's a free country .. براحتك
حضرتك ..

— الزبونة: باقول لك عايزة ابولاً..

— أنا: امممم.. اوكي.. بس المهم ماتتذيش نفسك..

— الزبونة: ح ابولاً يا دكتور.. يعني عايزة ارجع..

— أنا: ثابت مطرحك.. الواجب دا عندي.. أنا اللي ح ابولاً
عليكي حالا!!



لا يزال الفش..... إحم.. الضرم مستمرا

— زبون رقم خمسة: عندي احتقار في الزور..

— أنا: شكوى حقيرة فعلا..



— زبونة رقم ستة: عندي كحة ناشفة يبلغم..

— أنا: تيجي إزاي دي؟؟

— الزبونة: وعندي حرارة بس جسمي متلج..

— أنا: هو لازم حاجة عكس حاجة كدا؟؟



— زبون رقم سبعة: عند مغص في بطن رجلي..

— أنا: مغص بس ولا انتفاخ كمان..

— الزبون: ودي اعرفها إزاي؟؟

— أنا: بتحس الجزم ضاقت عليك؟؟



— زبون رقم ثمانية: رسم القلب كويس؟

— أنا: أيوة..

— الزبون: يعني ما عنديش سكر؟؟!!

— أنا: لأ.. لو فيه سكر كان بان عندي في رسم القلب..

— الزبون: يا سلام!!

— أنا: واقدر اعرف منه نوع الجونين لو عايز..

#موعدكم__مع__الغرائب__والطرائف__والروائع__

والعجائب

#ناشيونال__جيوغرافيك__أبو__كبير



المشهد الثاني

حدث بالفعل في الرعاية:

الزمان: مشهد ليل داخلي..

المكان: الرعاية المركزة لمستشفى (أم عطيات) الدولي..

مشهد رقم واحد: أنا كنت نبطشي في الرعاية، وكالعادة كانت نبطشية هنا.. أكيد الرعاية دي مبنية بفلوس حرام.. يلا.. نتحاسب في الدنيا أحسن ما نتحاسب في الآخرة.. أثناء النبطشية دخلت أوضة التمريض عشان اكلم الممرضة، لقيتها قاعدة ومعاها ابنها، وابنها بياكل حاجة..

نبذة مختصرة عن الممرضة وابنها: الممرضة اسمها دعاء.. معاها عيل اسمه حمادة عنده 3 سنين، بس كائن شديد الإثم.. مشروع نخّاس.. واحد من مدمنين وبلطجية المستقبل الباسم.. والجدير بالذكر إن اللي وُلد العيل دا هو أختي اللي مش ح تورد على جنة..

- أنا (باعشق الأطفال لدرجة إنني جبت الواد من ياقعة

الفلينة): بتطفح إيه يا ض؟

- الواد (بيندغ بإصرار): موووت..
- أنا (موجهها الحديث لأم البطل): هو ابنك بياكل موز يا دعاء؟؟ دا حتى مش أوانه.. وهو الموز ناشف أوي كدا؟؟
- دعاء (فخورة بالفار اللي مخلفاه): لأ.. دا بياكل الريموت.. هيهيهيهي..
- أنا (ماسك بؤ الواد وباهزه عشان يتف): الريموت هيهيهيهي؟؟ تف يا ض اللي في بؤك، يخرب بيتك.. النبطشية مش ناقصة زباين.. ماغنديش مكان احجز فيه ورك بني آدم..
- الواد ماكذبش خبر وراح تافف في إيدي!! بأبص لقيت زرار مكتوب عليه رقم تسعة!!



- مشهد رقم اثنين: بعد المشهد السابق بساعة.. الشيفت بتاع دعاء خلص، فجات تسلم عليا قبل ما تتجه..
- دعاء (مقموصة مني عشان اللي عملته في القواد اللي مخلفاه): سلم على عمو شادي يا حمادة..

لا يزال الفش..... إحم.. الضرم مستمرا

- حمادة (جه جري ناحيتي ومسك إيدي): عمووووووو..
- أنا (باشد إيدي منه لحسن ياكلها زي الريموت): عمى
الدبب.. سيب ياض لاشقّك..
- دعاء (مشمئزة من الإهانات المستمرة اللي باوجهها
للحيلة): إديّ له إيدك ماتخفش..
- أنا إديت للواد إيدي على حذر، راح ماسكها وتف فيها!!!!!!
- دعاء (بتشتغل روحها): عاجبك كدا؟! بوّظت أخلاق
الولد.. أديك علمته التفافة.. ابني كان متربي أحسن
رباية..
- أنا (القصاص!! ورّحت ماسك الواد من رقبتة عشان
اشنقه بنفسي): داهية فيك وفي أمك وفي أختي اللي
مولّداها..



مشهد رقم ثلاثي: أنا قاعد في نفس النبطشية الحزينة..
تليفوني رن، بأبص لقيتها أختي مريان..

- أنا (يا ريتتي افكرت حجر ولاعة كان افيد): بنت شوارع
مصفيّة.. كنت لسة في سيرتك.. بالخير طبعا..
- مريان (بتضحك زي نقار الخشب): ههههههه.. أوسكار
أهبل كذبة.. من إمتى بتجيب في سيرتي بالخير؟؟
- أنا (الحقيقة عمري ما عملتها): الجزمة اللي انتي
مولداها كان بياكل الريموت!!
- مريان (دايما عندها حنين ناحية العيال اللي اتولدوا على
إيديها): حمادة!! حبيبي دا نسمة.. وبعدين هو الريموت
دا بتاعك!؟
- أنا (مش فاهم مغزى السؤال): لأ، ريموت الرعاية..
- مريان (الأسئلة المنطقية بتجيب بعض): وهي الرعاية دي
من بقية أهللك؟؟ ثم إن العيال طول النهار بتبليغ حاجات
ولا البرشامجية.. تقولش مدمنين.. أنا عندي هنا عيّل
بالع ابن عمه!!
- أنا (لووول.. دمك جلوكوز): بطلي رغي يا مريان خلّي
يومك يعدي..

— مريان (صاحبة مبدأ.. مولودة بيه): عايزني ازوِّغ من
النبطشية؟؟ لبييه.. مفيش ضمير؟! قول للي أكل الحرام
يخاف!!

— أنا (مريان عدو الإنسانية رقم واحد.. المستورد الرئيسي
للبنانجو بتخاف من الحرام!!): دا الحرام نفسه يتكسف
من عمايلك.. انتي ح تغني عليا؟؟ جالك دور الضمير دا
إمتى يا بت؟!

— مريان (مستوى دولي في خفة الدم): بعد ما خفيت من
دور البرد على طول..

— أنا (ربنا يشفي): لا، ألف سلامة.. طراااخ (دا كان أنا
باخبطها بالسكة في وشها)..

#أوختشي—حببتشي

#أعدموا—حمادة—على—باب—المستشفى



المشهد الثالث

ذكرياتي الأليمة:

المرّة دي مش عايز احكي لكم حدث بالفعل.. في القصة دي أنا نفسي اكلمكم شوية عن طفولتي السعيدة (اللي هي حدثت بالفعل برضو.. مش فارقة كتير).. تحديدًا ح احكي لكم عن علاقتي بابا الله يرحمه.. علاقتي بابا كانت مرگبة بشدة.. الراجل دا علّم عليا جاااامد..

بابا (بشهادة كل اللي حواليه) كان شاطر في شغله، المشكلة إنني لحد دلوقت ما عرفش شغله دا كان إيه بالضبط.. إنشاء كباري تلاقى.. حضر أنفاق ما يضرش.. مع شوية تنقيب عن معادن وأعمال تجفيف ع الماشي.. لكن الخازوق اللي لبسنا فيه زي الفرخة في الشيش طاووق كان ترميم الآثار.. بابا احترف الصنعة دي لما اشترك في إنقاذ ونقل معبد فيلة، ومن ساعتها بطلنا نتفصح في أي مكان ثاني..

بابا يمسك المشروع من دول من هنا، نفضل نروحه كل ويك إند لحد ما نبقى ح نطرشه.. مثلاً الفترة اللي كان شغال فيها في ترميم قلعة صلاح الدين، كنا بنروح القلعة أكثر ما بنتكلم

في التليفون.. لدرجة إنني تقريبا بوست الحجارة واحد واحد..
ويا ويلك يا هدة حيلك لو حاولت تعترض.. تتعامل فورا معاملة
الجاسوس أو أسير الحرب، مع الفرق إن بابا مكانش بيلتزم
بمعاهدة جنيف لأسرى الحروب.. بابا كان ممكن يحرمني من
المصروف والأكل والحموم لحد ما الدولة اللي أنا بانتمي ليها
تسترديني في عملية تبادل للأسرى!!

- أنا (واحد ساتر ورا التلاجة تحسبنا لتصرفات بابا
المتهورة): يا بابا أنا زهقت من القلعة.. عايز اروح
السينما؟

- بابا (واضح إنه بياخد عمولة عن كل مرة ياخدني القلعة):
السينما دي تروحها مع أمك يا صايص.. لازم تعرف آثار
بلدك، إحنا ح نروح القلعة!!

- أنا (قربت اسمّ القلعة غايبا): أنا حفظتها خلاص..
صلاح الدين نفسه لو امتحني فيها ح ينبهر بيا!!

- بابا (يكونش بيهرب آثار وبيأخذني معاه كاموفلاج!): لأ..
لسة فيها حتت انت مادخلتهاش.. أنا فرجتك ع السجن
الحربي قبل كدا؟!

لا يزال الفش..... إحم.. الضرم مستمرا

- أنا (انت بتدمر طفولتي على فكرة): يا بابا فيه حد يفسح طفل في السجن الحربي؟؟!! الرحمة حلوة، مش كدا..
- بابا (القلعة دي تخصه.. فيه بينه وبينها علاقة.. وموضوع الرحمة مش في قاموسه أصلا): بانمّي شخصيتك يا ساذج..
- أنا (يا عم ماتخليناش نكفر بقى): طيب أنا عايز اروح حتة العب فيها بالكورة..
- بابا (أكيد متجاوز القلعة على أمي): هو فيه أحسن من الجينية بتاعت القلعة!!! خلّي عندك انتماء!!
- أنا (بادعى على صلاح الدين وعيلته كلها): يا ريت التتار كانوا حكموا مصر وهدوا القلعة دي ع اللي فيها.. كانوا ناس طيبين بيعيشوا في خيم، مابنوش قلعة يذلوا بيها اللي خلفونا..
- إحنا خلصنا من القلعة دخلنا على المتحف القبطي.. بسسس.. أنا كرهت المتاحف وسيرتها.. كرهت الصور والتمثيل والزخارف.. كرهت حروف كلمة متحف ولون الأسفلت اللي بنمشي عليه..

خلصنا المتحف القبطي دخلنا على كنايس مصر القديمة..
أنا مش ح اتكلم كثير.. كفاية اقول إن مصر القديمة بقت بتطلع
لي في الحلم.. بيحصل لي فزع لما اسمع كلمة مصر، وبالنسبة
للكنائس أنا بطلت اروحها أصلا، وبقيت باصلي في البيت!!
وفي يوم ما طلعتلوش شمس، لقيت بابا بيشدني من قفايا من
السريير..

- بابا (تقريبا الشيش طاووق مش مكفيه، فقرر يقرّصني
زي أقراص الطعمية): قوم.. إحنا ح نروح انهاردة منطقة
البيير الأثري..

- أنا (حاضن المخدة بإيديا ورجليا وقافش في الملاية
بسناني): لاااااا.. أنا لو طاوعتك ورحت معاك، أكيد ح
ترميني جواه..

#شغل وفسحة في نفس الوقت

#تحت شعار فرح جنب ظهور



المشهد الرابع

حدث بالفعل:

الزمان: كذا وقت..

المكان: كذا حطة..

مشهد رقم واحد: نهار داخلي.. أنا قاعد في نبطشية الرعاية
بحاول ما اموتش حد من العيانيين عن طريق الخطأ ولا حد من
التحف اللي شغالين معايا عن طريق القصد.. فجأة باب الرعاية
اتفتح ودخل منه دكتور الطوارئ واسمه ماجد..

نبذة مختصرة عن ماجد: ماجد هو الدكتور اللي الإعلام
المغرض دايم بيتكلم عنه.. النموذج اللي بيطلع في صفحات
الحوادث وفي العاشرة مساء مع وائل الابراشي، ومن تحت راسه
الأطباء متجربين في كل المحافل.. أفاق.. ويا ريته دكتور أفاق..
لأ، دا كان كبيره يطلع ميكانيكي أفاق.. من ساعت ما ادلى من
بلدهم ونزل على مصر وهو مثال يحتذى به في الحنجلة.. حاولنا
نعلمه الصح، لكن هو بيعشق الغلط..

الواد مربرب وكرشه قد العربية الفولكس من كتر أكل
الزلّاطية اللي بتعملها له والدته.. الأدهى من دا كله إني (مع
الأسف) بتربطني بعيلة ماجد صداقة من سنين..

- ماجد (كائن ملزق بشدة): إزيك يا كبير؟

- أنا (أي رياح وسخة أنت بك يا ماجد): زي الزفت طالما
شوفتك.. فات من وقتك نص دقيقة.. استغل النص
التاني في المفيد..

- ماجد (فاقد الاحساس والشتيمة مش بتحوّق فيه): أنا
قاصدك في خدمة.. خالتي تعيش انت، وأنا عايز اروح
الخارجة.. أنا كلمت زميلي يجي يشيل النبطشية مكاني..
هو زمانه على وصول، لو ممكن بس تغطيني ربع ساعة
على ما يوصل..

- أنا (اه يا عيّل يا وثخ، بتفول على خالتك عشان تزوغ):
هي خالتك عيانة للدرجة دي؟! الست بتموت مرتين في
الأسبوع.. إديني ياض خمس أسباب عشان ماعوركش..

- ماجد (فشخته في كبرياءه): ماتظلمنيش يا كبير.. خالتي
ماتت بجد.. ماتراجعش ورايا المرة دي..

لا يزال الفش..... إحمو.. الضرم مستمرا

- أنا (إياكش تحصلها يا بعيد): اخفى من وشي الساعة دي.. انت يا بني ماكانش المفروض تطلع دكتور.. انت كبيرك تشتغل نسناس في الحديقة، والناس يقعدوا يزقلوك بالسوداني.. ومطرح ما يجي بقى.. اللي في عينك، واللي في بطنك، واللي في.... أشيائك..
- ماجد مشي من هنا وموبايلي قعد يرن، بأبص في الرقم لاقيته نادر صاحبي، وبالصدفة إنه ابن خالة ماجد..
- أنا (هي العيلة دي مابتقرضش ليه يا رب؟! دا الديناصورات نفسها اندثرت): الووو..
- نادر (صوت ماليه الأسف): ابوة يا شادي.. خالتي وخالة ماجد اتوفت.. الخارجة دلوقت والعزا بالليل.. حاول مرة في حياتك تطلع راجل وتعمل الواجب!!
- أنا (إيه دا!! ماجد كان بيتكلم بجد؟!): لا إله إلا الله.. دا كان لسة معايا..
- نادر (حس إنني عندي لبس في الموضوع): دي خالته اللي ماتت.. هو أنا باقول لك ماجد اللي مات؟!!

— أنا (يا ريته كان هو اللي مات يا شيخ، كان أهون): البقاء
للّه .. اشوفك في العزا بالليل..



مشهد رقم اتنين: ليل خارجي.. أنا رُحت حضرت العزا، وبعد
ما خلص خرجت عشان اروّح.. أول ما طلعت برّا القاعة لقيت
في وشي جوز الكائنات المسئولين عن انجاب الـ under wear اللي
اسمه ماجد.. أبوه وأمه..

— أنا (موجهها الحديث لأم ماجد، سيدة الزلاطية الأولى):
والمصحف الشريف ابنك دا مش دكتور.. دا خروف.. لأ،
نعجة.. دا لسة ملبسني في النبطشية انهاردة..

— أم ماجد (زميلة كلية الطباخين الملكية): واللّه برافو
عليه.. وبعدين ماتقولش على مودي حبيبي نعجة، دا
أشطر دكتور في الدنيا.. ماتقول له حاجة يا أبو ماجد..

— أنا (إذا كانت أمه كدا، يبقى الوادح يطلع عاقل لمن؟!):
كوكتيل الديتول والكلور شقلط مخ العيّل اللي مخلفاه..
ابنك لظاليطو مات اكلينيكي يا حاجة.. بقى محسوب ع
الإنسانية بالغلط..

لا يزال الفش..... إحم.. الضرم مستمرا

- أبو ماجد (موجهها الحديث لأم ماجد بعد ما بص لي بصة ملامة): والقرآن المجيد ابنك دا بقرة.. دبلون صنايع مش دكتور أبدا.. حتى ركبي مش عارف يعالجها!!
- أنا (افتكرت فجأة إني مالمحتش ماجد في العزا): هو ماجد ماجاش العزا ليه؟؟ دا مزوَّغ من النبطشية على حسه!! أنا ح اخرب بيته..
- أبو ماجد (بيحاول يلّم الدور): هو أنا ماقولتلكش.. شوف بقى الحلو في الموضوع..
- أنا (بأزر على عنيا): ايوة، أنا عايز الحلو.. وركز كويس في اللي ح تقوله عشان حياة ابنك متوقفة عليه..
- أبو ماجد (حياة ابنه مش فارقة معاه في حاجة.. واضح إنه عنده منه كثير): ماجد سبقنا ع السبوع..
- أنا (هي المرحومة كانت حامل ولاّ إيه؟؟): سبوع مين يا سيد العاقلين؟؟
- أبو ماجد (بيهز راسه على طريقة أوعى تستغرب من حاجة): ابن عم ماجد جاب نونو.. هي عيلتنا كدا، عاملة

زي مسلسل "حديث الصباح والمساء" .. فرح وراه سبوع وراه
جنازة على طول..

#ح_اموت_مفروس_بسبب_ماجد_وأهله

#يا_رب_تشرقوا_في_المغات



المشهد الخامس

حدث بالفعل في العيادة:

الزمان: مشهد ليل داخلي..

المكان: مستوصف (الساحرة الشريرة) التخصصي..

أنا قاعد في العيادة وواضح طبعا إن الصيف جيه.. مش
عشان الدنيا حر.. لأ، عشان النور كان بيقطع كل 5 دقائق!! لدرجة
إن كل عيان بيدخل وهو منور كشاف الموبايل في إيدته.. أنا قررت
اقفل الليلة لحد كدا، فرُحِت متصل بموظف الاستقبال عشان
يسنكر شباك التذاكر..

- موظف الشباك (حبيبكوا فؤاد): الوووو.. ايوة يا دكتور..
- أنا (على فكرة الصيف مش هو المسئول عن قطع النور..
النور بيقطع من بوزك الفقر): سَك ع المشاريب يا فؤاد..
- فؤاد (واضح إن العيادة في حدايق القبة لكن الكونتر
بتاعه في المعادي): ليه يا دكتور.. الليل لسة في أوله..
بطل تتطط ع الرزق.. الافترا آخرته وحشة..

- أنا (هو فوففا اتحول لفامبير ولاّ إيه؟؟ الواد بقى بيشوف
في الضلمة!!): تصدق وجعت لي ضميري يا فؤاد.. يا ابن
العمشة انت مش شايف النور اللي عمّال يقطع؟؟ اقل
الشباك يافؤاد قبل ما اجيب سيرة الوالدة..
- فؤاد (مش بيّفهم ومش بيحس): ما انت جبتها خلاص..
- أنا (يووووه): يا ريتها كانت علمتك صنعة.. أحسن من
الدبلون اللي دبسنا فيك..
- أنا قفلت مع فؤاد وقلت أشوف آخر حالة.. الحالة كانت
واحدة ست ومطلوب لها إيكو (سونار على القلب)..
- أنا (موجها كلامي للمريضة): مساء الخير.. اتفضلي يا
مدام..
- العيانة (بلهجة خليجية): أنسة..
- أنا (ضايقتك أوي كلمة مدام؟! هو حد لاقى): ومالك
زعلانة ليه؟؟ دي حتى بُشرة خير.. اتشرف بالاسم..
- العيانة (حست إنني باقرا لها الفنجان، على طريقة قدامك
نقطتين وتتجوزي، فبدأت تفك شوية): كفاية أمان!!

لا يزال الفش..... إحمو.. الضرم مستمرا

- أنا (هو الأمان اللي اديتهولك كان فوق احتمالك للدرجة دي!!): دا أنا ح اهريكي أمان.. ح اروّحك بلدكوا مستحمية.. متدمغة أمان كدا.. اتفضلي حضرتك على السرير..

أنا كانت خطتي كالتالي: ح اعمل للست دي افضع إيكو في تاريخ الايكوهات.. الست ح يعجبها الشغل.. ح ترجع بلدها، تبعت لي عقد عمل بمرتب بشليون دولار في الشهر..

أنا رُحت عشان اشغل الجهاز لكن الجهاز ماشتغلش!! واضح إن الكهريا وبوز فؤاد جابوا داغه..

#انتططي ع الأمان!!

#أديكي ماطولتيش حاجة خالص



لا يزال الفش..... إحد.. الضرر مستمرا

obeikandi.com

المشهد السادس

حدث بالفعل في الرعاية:

مشهد رقم واحد: نهار في الشارع.. أنا رايح المستشفى عشان عندي جناية.. قصدي نبطشية.. اليوم بدايته شمال.. عاصفة محملة بالهباب تضرب البلاد.. التراب ردمنا.. سُمك طبقة التربة اللي مغطية النفر من دول تكفي لاستصلاح الاراضي.. مش ناقص غير شوية مطرة عشان الواحد ينبت لوحد..

أنا ماكنتش شايف مترين قدامي وطبعاً الطريق للمترو مش باين له ملامح، فقررت آخذ ميكروباص من على أول الشارع.. الميكروباص ماركة الترامكو (أحقر أنواع المقابر المتحركة) طلع بينا كوبري أكتوبر.. السواق كان سايق بطريقة «دون كيشوت».. راكب البغلة وراسه وألف سيف ليموت طواحين الهوا.. الراجل ركب ع الرصيف وبعد كذا طلع بينا على سور الكوبري..

-أنا (وسعي يا ست يا اللي واقفة تحت.. الميكروباص ح يقع عليكى): خد شمالك يا اسطى لحسن ح ننزل زرع كرنب على تحت.. إحنا مش مهم لكن الطواحين مالهاش ذنب..



مشهد رقم اثنين؛ نهار داخلي.. طبعاً السواق ماسألش فيا
وصمم ياخذ الطريق المختصر، وهو إنه ينط بينا من ع الكوبري..
هو إحنا لسة ح نمشي لمنزل الكوبري ونلف؟؟ عيبب.. إحنا مش
راكبين مع مهندسة ديكور.. دا إحنا راكبين مع المعلم رشدان
بذاته..

أنا وصلت المستشفى بمعجزة لقيتها لسة قاعدة مطرحها..
إلا ما محوِّق فيكي عواصف ولا سيول يا بعيدة.. أول ما دخلت
الرعاية لقيت تجمع مريب من عمال المستشفى!! فتحي عامل
الرعاية لامم ثلاثة من زمايله وعامل لهم شاي!! الجدير بالذكر
إن فتحي من أصول ريفية وعاش في دور الفلاح اللي شغال في
وسية الباشا التركي..

- أنا (مصدرّ وش الاقطاعي بتاع فيلم ”رد قلبي“): بتعمل
إيه يا خرسيس يا نرسيس منك ليه؟؟ او عوا يكون
اعتصام.. الميرلاي نجدت باشا رئيس البوليس السياسي
على رنة..

- فتحي (قام منطور أول ما شافني ومسك حاجة بيضة
بفرو في إيدته بيوريهالي): حمد الله ع السلامة يا سيدي
الباشاه.. إحنا كنا بنموتّ الفار دا..

لا يزال الضمير مستمرا

— أنا (أول ما سُفِّت الجثة عرفته على طول): يا لهواااي!!
انتوا قتلتموا فِرْفِرٍ؟ حرام عليكموا دا كان صاحبي يا كفرة..
بقى له عشر سنين بيسليني في النبطشيات..

إحساس داخلي فظيع سيطر عليا ساعتها.. إحساس الصابون
في العيون.. أو اختفاء البونبون.. أو خرم الاوزون.. فِرْفِرٍ سديكي
سابني لوحدي.. الجو والحكومة وسوء الحظ وعمال المستشفى
عاملين كومبينة ضدي..

— فتحي (بيحاول يخفف عليا المصيبة فاضطر يستخدم
ذكاه لتاني مرة في عمره): مفيش فار بيعيش عشر
سنين.. دول أكيد ولاده جنابك..

— أنا (تصدق صح!! فانت عليا إزاي دي): مش مهم.. أهو
أي حاجة من ريحته!! وكلكوا اتلميتوا ع الغلبان دا؟

— فتحي (حزن ولي نعمته بدأ يآثر فيه): روح يا باشاه..
ربنا يعوّض عليك..

— أنا (باكّر شريط ذكرياتي مع الفار): حبيبي دا كان مزاجه
يمشي ع السقف ويقع ع العيانين..

#وأنا حـ اخلفـ غيرهـ إزاي

#ماعدشـ فيهـ صحةـ خلاص

#يا عبيبيـ يا فرفر



المشهد السابع

حدث بالفعل في التليفون:

مشهد ليل داخلي: كتابي الأول، باكورة أعمالني وابني البكري متأخر في دار النشر.. بقى له ست سنين بيتطبخ ولسة ماستواش.. ابداعني، الدرلة اللي ح تتضاف لتاج الأدب متأخرة عن الجمهور المتعطش للدماء.. قصدي للثقافة..

أنا قررت اكلم الزومبي اللي شغالين في دار النشر، مش عشان اسأل عن الكتاب، لأ.. عشان اطمن عليهم هما شخصيا.. اشوفهم لسة عايشين ولأ رجعوهم لمتحف الشمع تاني..



المكالمة الأولى للتمثال رقم واحد: أستاذ حسن مدير الإنتاج بدار النشر..

- أنا (متعشم فيه عشم إبليس في شارع رمسيس): أبو علي حبيبي.. مفيش أخبار عن القليل بتاعي؟؟
- حسن (كوكتيل نصب حجم متوسط): إزاي مفيش؟؟ فيه طبعا..

- أنا (اه يا كداب.. جهنم وبئس المصير): ألف نهار أبيض..
فرحني..
- حسن (كوكتيل شماتة حجم كبير): البت دعاء رجلها
اتكسرت..
- أنا (يا لهوااااي.. طيب كانت اصطبرت لحد ما نخلص):
ألف سلامة.. أنا ح اكلها اسأل عليها..



- المكالمة الثانية للتمثال رقم اثنين: أستاذة دعاء السكرتير
التفذي لدار النشر..**
- أنا (ربنا يريحني منكوا ومن الغرامة في الموبايلات): الو..
إزيك يا أستاذة.. سلامتك.. مش كنا نمسك نفسنا شوية
لحد ما نخلص اللي ورانا؟؟
 - دعاء (صوت أنثى بتعيط): الدكاترة دول وحوش.. كلاب!!
 - أنا (بحاول ابلع الإهانة الضمنية): وليه الغلط دا يا عم
المتربي؟؟ هو اللي كسر لك رجلك دكتور ولأ إيه؟؟
 - دعاء (بتتشحطف): دكتور العظام السافل، المجرم..

لا يزال الضم..... إحم.. الضم مستمرا

- أنا (داهية لا يكون الواطي بتاع العضم عملها مع البيت):
عمل فيكي إليه الدكتور يا مدهولة؟؟
- دعاء (منهارة ع الآخر): عمل لي الجبس لونه أزرق..
- أنا (يااي.. مرارتي اليمين «مرارتي بس، عشان الرقابة»):
مالك؟؟!!
- دعاء (بتحاول تلمم أشلاء كبرياءها المجروح): هو أنا
ولد عشان يعملهولي أزرق؟! أنا بنت.. كنت عايزاه pink!!
عارفه؟؟
- أنا (يااي.. مرارتي الشمال «مرارتي برضو، عشان نفس
الرقابة»): عارفه يامًا.. لون دهان أوض النوم بتاع ليلة
الدخلة!! أشوف فيكوا يوم يا بعدا..
- دعاء (غدر الزمان معلم معاها جامد): ولما قُلت له مش
مسامحاك عشان اللون، قال لي ماكونتيش عاوزاني اركب
لك سيراميك وورق حائط بالمرّة؟!
- أنا (الدكتور دا أهله ربّوه): مالوش حق.. أنا لو مكانه
كنت كسرت لك رجلك الثانية..

#أنا ح ابكي من التأثر

#لأ أنا ح ابكي من الندم



المشهد الثامن

حدث بالفعل في الطريق:

الزمان: مشهد نهار خارجي ..

المكان: طريق مصر إسكندرية الصحراوي ..

مشهد رقم واحد: انهاردة أول يوم في أجازة العيد.. أنا مسافر الساحل بعد ما ربنا كرمني ولبّست نبطشية العيد لهاني زميلي.. هاني حاول يقنعني إنه مسامح، بس كان بيكذب طبعاً.. أنا كنت مسافر مع بنات خالي في عربيتهم وسيسيل الكبيرة هي اللي سايقة.. نبذة مختصرة عن سيسيل، سيسيل في شبابها كانت عضوة في عصابات الدراجات البخارية بالنهار وهجامة ع البيوت بالليل.. بعد اعتزالها قررت تكتب مذكراتها واشترت عربية بتوزع فيها المخدرات علي سبيل الهواية.. طبعاً إنسانة بالمنظر دا هي والملاحدين واحد في السواقة.. بتسوق بطريقة إن مفيش أخرة ح نتحاسب فيها.. الإنسان اللي إداها الرخصة (دا إن كان معاها واحدة) زمانه بيتعمل عليه حفلة في جهنم.. الراجل دا أذى ناس كتير بعملته، وبناء عليه أكيد بيتعمل باربيكيو دلوقت.. أنا ركبت

معاهم العربية عشان نبتدي نتحرك.. وعربيتها دي عبارة عن بواقى حادثة مرور.. روبايكيا مليانة بكل أنواع الموبقات..

- سيسيل (بتصحي الحبسجي اللي جواها): بالصلا ع الحبيب انت ح تدفع نُص البنزين..

- أنا (كان ماله السوبر جيت): دا اللي هو كام؟؟

- سيسيل (بطريقة «أنا جايبة معاك م الآخر»): 100 جنيه..

- أنا (لأ.. السرقة تكون بالأصول، مش كدا): نعااا!! الكارو

دي تانكها مايشيلش بنزين ب20 جنيه على بعض.. دا غير ما إنها بتمشي بالببي أصلا..

- سيسيل (بطلت العربية ونزلت فتحت الكبوت): لا حول ولا قوة إلا بالله، العربية عطلت..

- أنا (سيسيل بتذكر ربنا!!): ولا تعريفي عنه حاجة..

- سيسيل (بصة تحت شعار «انت مش ح تكون أول قتيل»): بتقول حاجة يا ضنايا!!

- أنا (الجبن سيد الأخلاق): باقول ح ادفع.. دا حتى ال100 جنيه مبلغ هايف.. يادوبك مرتبي من الحكومة في شهر..

لا يزال الضم..... إحم.. الضم مستمرا

- سيسيل (قفلت الكبوت ودورت العربية): لا حول ولا قوة إلا بالله، العربية اتصلحت..
- أنا (دا كفر بين دا): اللهم قوي إيمانك يا مقدسة..



مشهد رقم اثنين: بعد المشهد السابق بعشر دقائق..

- سيسيل (مخبية عداد السرعة بإيدها): تفكر أنا سايقة على كام؟!
- أنا (إحنا كنا من 10 دقائق في المعادي دلوقت بقينا في الريست): على 160؟
- سيسيل (بتشيل إيدها من العداد عشان توريني الإبداع): هأهاهاهاها.. لأ على 200..

في اللحظة اللي بعد كدا الكاوتش الأمامي انفجر.. طبعا بالسرعة دي العربية اتحولت للبوابة الملكية لجهنم والمفروض اللي جواها هالك لا محالة.. لكن لأن ربنا بيستر.. ولأن سيسيل عندها خبرة عقود في الهرب بعربيتها من الحكومة، هي قدرت تسيطر بمعجزة ع العربية وركنتها على جنب الطريق.. إحنا نزلنا نبص ع

الفردة الشهيدة لقيناها متهربدة وفيه بودرة بيضا (غالبا هيروين)
بتشر منها!!

- أنا (خروببتك): الفردة دي مش ح تنفع تاني.. سيبها على جنب، مفيش داعي ناخذها معانا..
- سيسيل (رمت نفسها ع الكاوتش على طريقة محمود المليجي في أغنية الأرض لو عطشانة): الكاوتش لالاااا.. خدوا عيل من عيالي ولا تاخدوش الكاوتش..

#أدي_أخرة_النجاسة

#انتي_المباحث_سايباكي_علينا_إزاي

#ح_نموت_منفجرين



المشهد التاسع

حدث بالفعل:

الزمان: مشهد نهار (جحيم) داخلي..

عنوان المشهد: البلد فيها حكومة..

مشهد رقم واحد: الجو جهنم.. منك لله يا حكومة!! ما هي الحكومة أكيد مسئولة عن الجو دا.. وإن ماكانتش مسئولة فهي متواطئة.. شريكة في الجريمة إن ماكانش بالفعل يبقى بغضب ربنا اللي نزل علينا من عمالها السودا!! المهم إن ليها إيد في اللي بيحصل وخلص..

نبذة مختصرة عن علاقة الحكومة بالأطباء: الحكومات المتتالية يا ولاد، دايمًا بيكون في قمة جدول أعمالها بند «إزاي تفشخ في الدكتور».. الحقيقة إنهم استنفذوا كل السبل.. مفيش مرتبات.. مفيش بدلات.. مفيش أمن في المستشفيات.. من فوق مباني بتاكلها البارومة ومن تحت بنية تحتية بتاكلها الفيران.. الحكومة بتحرم الدكاترة من الأكل والمصروف، ولما تموت بتحرمهم من الميراث كمان.. بتصورهم في أوضاع مخلة وهي بترتكب معاهم

الخطيئة (أيوننن.. الحكومة بترتكب الخطيئة مع الدكتور من دول مرتين في الأسبوع).. وأخيرا لما اعيتها الحيل، قررت إنها تقضي على آخر أمل للأطباء بإنها تخلي الجو بالمنظر دا!!

السشوار العملاق اللي مفتوح علينا خلّص ع الشغل.. العيانين هجروا العيادات.. العيان من دول بيكون اتبخر أو اتشوى وهو جاي في السكة، واللي بيوصل فيهم حي بيكون اتجفف زي السرمباكة!! لدرجة إن آخر عيان كشفت عليه كان جمل.. ما هي دي الحاجة الوحيدة اللي ممكن توصل عندنا صاحية في الجو النار دا..

أنا قررت إنها طالما كدا كدا خرابانة، إنني ح اعمل زي الصنایعية.. ح اقعد في بيتنا في التكييف لحد ما الفلوس اللي معايا تخلص!! وأنا قاعد لقيت أختي مريان داخله من باب الشقة وواضح إن الشيف اتك عليها شوية في السوا..

- مريان (مسلوقة ولونها أحمر زي السوسيس): النزول في الجو دا لازم يُجرّم قانونا.. يُجرّم دوليا.. حتى الهدوم اللي لابسينها ماينفعش تتقلع.. دي لازم تتقشر من على الواحد زي الكانتلوب.. انت لو نزلت برّا مش ح تسب التيت بس.. لأ، انت ح تسب حاجات كتير!!

لا يزال الفش..... إحم.. الضرم مستمرا

- أنا (إيه دا؟؟ هو فيه أفضع من سب التيت!!): !!!!!
- مريان (قلبت ع الفامبير موود): انت مش بترد ليه؟؟
- أنا (خايف أخذ نصيبي في سب التيت فقررت اقعد ساكت): مالك بوزو ليه ع الصبح؟؟
- مريان (قاموس غني بالألفاظ الأبيحة بيتبلور في الأفق):
الجو زفت.. ولأ العيال.. غرقوني نمبر تو!! العيال بتلعب بإيديها في مسائلها الشخصية وبعدين بيلوشوا في أي حاجة.. باقول لك إيه، انزل معايا نروح شئون العاملين..
- أنا (نزول مين يامًا.. دا انتي نفسك لسة نازلة من ع الجريل حالا): ههههه.. عسل.. دا أنا مارضيتش انزل الشغل من الحر، عايزاني اروح معاكي؟؟ ناهيكي عن إن شئون العاملين دا مشوار نمبر تو من غير حاجة، إيش حال في الحر دا..



مشهد رقم اتنين: إحنا وصلنا لمكتب شئون العاملين في المستشفى الحكومي اللي بتشتغل فيه أختي.. الجدير بالذكر إننا رُحنا راكبين الجمل اللي كان بيكشف عندي، لأنه الحاجة الوحيدة اللي قدرت تمشي في الجو دا من غير ما تعطل!!

المشهد كان كالتالي: الموظفين معظمهم ملط ونايمين ع المكاتب.. واللي صاحيين بيتخانقوا يا إما مع بعض أو مع المواطنين.. عبارة عن مجموعة من الكلوتات، كأنه توكيل قطونيل وضرب في المكان.. الواحد من دول يمتلك نفس شكل وريحة وأخلاق الأندروير!!

- موظفة من اللي قاعدين (كارهة عيالها وعندها وظاويظ خارجة من الهدوم ومن المكتب اللي قاعدة عليه): زكريا دا أنا ح اخرب بيته.. دا بقى له أسبوع مايبجيش!!

- موظف تاني من اللي قاعدين (قرر إنه يكون محضر خير): حرام عليكي يا سِط انطي.. دا بيقولوا إن أمه عيانة.. عندها البروسطاطا!!

- الموظفة (بان عليها التأثر): ربنا يشفي.. أنا اعرف إنها بتبقى صعبة أوي في السن الكبير!!

- أنا (بروسطاطا!! اه يا سليبات): تطلع إيه طاطا دي يا بت يا مريان.. هما اكتشفوا أماكن جديدة في جسم الإنسان ولا إيه؟؟

لا يزال الضم... إحمر.. الضم مستمرا

- مريان (بتفر مقرر التشريح في مخها): ما عرفش.. بقى لي كتير مش باذاكر..
- أنا (موجها كلامي للموظف وزميلته): جاتكوا نيلة خرمتوا البلد..
- الموظف (عنده ضعف شديد في كل أنواع الفهم، وضعف أشد في الإملا): خرمتنا البلد!!
- أنا (باشاور بصوابي على شكل دايرة كبيرة): ومش أي خرم.. دا خرم قد كدا..

#اتلمي بقى يا حكومة

#الحرارة في العالي والأدب في الواطي



لا يزال الفش..... إحو.. الضرر مستمرا

obeikandi.com

المشهد العاشر

حدث بالفعل في العيادة:

مشهد رقم واحد: نهار خارجي: أنا نازل من بيتنا بادور على البواب أو الكونتيسة مراته.. الجحيم في الشارع لا يزال مستعرا.. بؤ الواحد مفتوح ولسانه مدلدل من برأ زي البوبي.. إزازه الميَّة بتتبخر قبل ما تتشرب.. أول ما خرجت من العمارة لقيت مرات البواب في وشي..

- أنا (في مدهانة وتزلّف يقرفوا الكلب الحقيقة): صباح الخير يا مدام نجاة.. ما شاء الله على الرشاقة.. انتي عاملة دايت؟؟

- مرات البواب (مسح الجوخ جاب معاها): بيبييه.. دي نفس اسطوانة الأسبوع اللي فات.. مش ح تكبر بقى..

- أنا (سياسة بوس الإيدين لا تزال مستمرة): أنا كنت قاصدك في مسألة إنسانية، ولو إني عارف إن الإنسان اللي جواكي خلص من زمان..

- مرات البواب (كتلة من الاحترام): عيب يا شادي..
الإنسان اللي جوايا لسة بيبتي..
- أنا (kissing asses a5er 7aga): أنا عارف إنك من بيت
كرم.. امسحي لي العربية يحن عليكى..
- مرات البواب (كبرياءها بينقح عليها): عربية؟؟ تقصد
بواقى accident اللي راكنة على أول الشارع؟؟ sorry..
قربها تحت العمارة.. ولأ اقول لك.. بيعها أحسن..
- أنا (محتاج لتربيبسي عشان ابلّع الاهانات دي كلها):
ماشي يا زفتة.. بلاها العربية.. أنا أصلا بحب
المواصلات، ح اروح الشغل بالميكروباظ..



مشهد رقم اثنين: نهار داخلي.. أنا وصلت العيادة لقيت فؤاد
موظف الاستقبال نعسان على الكونتر وواضح إنه داخل في مرحلة
بيات صيفي.. الجدير بالذكر إن فؤاد بني آدم حلوف وإنسان
كهوف.. من فصيلة الجلد حنفيات.. وهو صغير كان نفسه يطلع
مسحراتي عشان يشتغل شهر واحد بس في السنة.. وبعدين بقى
نفسه يطلع بابا نويل عشان يشتغل ليلة في السنة وبس..

لا يزال الفش..... إحم.. الضرم مستمرا

- أنا (موجها كلامي لفؤاد): اصحى يا فوففا..
- فؤاد (باين عليه مجتهد من يومه): سيبيني خمس دقائق يا ماما..
- أنا (ماما!!): قوم يلاً يا حبيب ماما.. ح تتأخر على المدرسة..
- فؤاد (دور وشه الناحية الثانية وإداني قفاه): بطني بتوجعني، مش ح اروح!!
- أنا (يقطع العيال وخلفتهم): لو بتموت.. ح تروح يعني ح تروح.. البنات الشاطرين يقولوا إيه؟؟
- فؤاد (مخه طلع معاش من زمان): العب بالية..
- أنا (اتفو على قلة أدبك): قوم يا زفت قول لي فيه حالات إيه عندك..
- فؤاد (وراه حلم عايز يكمله ومش ناقص صداع): المستشفى زي الفرن والعيانين طفشوا.. مش فاضل غير عيانة واحدة قاعدة في طاسة القليّة جوا..

- أنا (بحنان الأم): يقلوك في نار جهنم يا بعيد..

الحقيقة إن فوففا صعب عليا، فقررت اسيبه يكمل نوم.. كدا
كدا لوجم زباين ح يصحوه..



مشهد رقم ثلاثم: نهار داخلي.. أنا دخلت ريسيشن
المستشفى.. الريسيشين بيصفر فيه الريح، وكام صبارة بدأوا
ينبتوا فيه من شدة الحر.. أنا دخلت أوضة الكشف وفي ديلي
دخلت العيانة.. عملاق افريقي ابنوسي اللون شبه كونتا كنتي
بتاع مسلسل الجذور.. ومعاها واد بتاع 12 سنة، شكله زي العيال
السيس اللي بينطوا في عربية الستات في المترو، عرفت بعد كدا
إنه ابنها.. يلاً بجملة السواد اللي إحنا فيه..

- أنا (موجهها كلامي للعيانة اللي أكيد مش ح تفهم منه
حاجة): صباح الخير يا هانم.. اتشرف بالاسم..

العيانة دورت وشها الناحية الثانية وقعدت تبرطم وتخبط
على بطنها!!

لا يزال الفش..... إحم.. الضرم مستمرا

- العيل السيس (طلع بيتكلم لغة أهل الأرض عادي):
ماما اسمها أكوال.. هي مش إعرف عربي.. بطنه كبير
ومزاجه وهش هالس.. عنده غازات كتيبيير..

- أنا (امسكي نفسك خمس دقائق بس يا حاجة): هي
عندها إمساك؟؟

- العيل السيس (بيشوح بإيده): إيش عرفني ما تسألها!!

- أنا (اه يا سرسجي!!): هما العيال المصريين لحقوا علموك
الرزالة!!!

هنا الولد استجاب وقرر يستأنف دوره كمترجم.. بص لأمه
وقعد يبقبقي زي الفرخة وهي ردت عليه ببقبة مماثلة..

- الواد (بيكلمني وهو بيلعب في مناخيره بصوابعه كلها):
ايوة عندها امساك يا عم!!

في اللحظة اللي بعد كدا اكتشفت إن العيانة بدأت تزهب أو
تفقد قدرتها على التحكم، لأن جو الأوضة ظهرت فيه دخنة سودا
وريحة ايفف بدأت تنتشر في قلب المكان..

- أنا (عندي أمل الحق اخلص قبل ما أكوال تقل عقلها
وتعمينا): إلا قول لي يا شيشب.. هي ماما مانزلوش
منها موديل أصغر من كدا.. نسخة الجيب.. الـ concised
edition.. أنا على بال ما اخلص كشف على واحدة
بالحجم دا يكون الشارع كله مات مخنوق..

#واحد كمامة هنا لو سمحت

#حد يبلغ عن أكوال إن معاها سلاح كيماوي



المشهد الحادي عشر

حدث بالفعل في العيادة:

مشهد رقم واحد: أنا داخل الريسبشين بتاع المستشفى.. بأبص لقيت فؤاد موظف الريسيشن قاعد ورا الكونتر، ومقفل كل المنافذ وبيتفرج على قناة المولد في الشاشة اللي قدامه.. الجدير بالذكر إن فؤاد إنسان بعقل لبلاب، ومتسلق ووصولي زي اللبلاب برضو..

الزمان: مشهد ليل داخلي..

المكان: مستشفى (الباريزيانا) التخصصي..

- أنا (موجها حديثي للقتاية اللي اسمها فوففا): فوففا سديكي.. الحتة الطرية اللي في حياتي.. الراجل اللارج.. الاقي معاك فكة ميتين جنيه؟؟
- فوففا (بيشوح بايده وهو مبحلق في الرقاصة): مفيش..
- أنا (باضغط على أعصابي عشان محتاج الفكة): فوففا سديكي.. الحتة الكلبة اللي في حياتي.. العيل الميديام.. دور كويس معلش..

- فوففا (هرموناته في الطالع وأخلاقه في النازل): الفكّة
اللي عندي ماتكلمش.. ماعايش غير ورقتين بتلاتين!!
- أنا (ورق بتلاتين!! هي روما احتلتنا ثاني؟!): هما غيروا
العملة ولاّ إيه؟؟ طيب اكذب عدل.. فاشل في كل حاجة؟؟
- فؤاد (بيغتصب الرقاصة في سره ومش بيرد): !!!!!!!
- أنا (قررت اخنق على أهله): حلو الحبل اللي في رقبتك
دا..
- فوففا (بيظبط الحبل وهو لاوي بوزه): دي كرافطة..
- أنا (نفس الكذب المتخلف): أنا افكرته حبل..
عشا نا شد كمنه ..
- فؤاد (بيبص لي باشمئناط): إيه؟؟
- أنا (ألس بوابين): الخضار السوتية.. (ثم إني قررت إني
ماسيبش موضوع الكرافطة يعدّي بالساهل) ورحمة أبوك
كرافطة؟!
- الجدير بالذكر إن المرحوم أبو فؤاد (ربنا يجمعهم على خير
عن قريب) كان بيتعالج عندي قبل ما يموت بشهر.. ولأن كل شئ
قسمة ونصيب، فالراجل مات!!

لا يزال الضم مستمر

- فؤاد (يا ريتي ما فكرته): ااه.. رحمة أبويا اللي انت قتلتها!! احبيبي ابابااا..
- أنا (انت ماسكها لي ذلة يا جربوع!!): عيب يا فوففا، انت راجل مؤمن.. ثم أنا اعمل إيه إذا كنتوا جبتوا لي الراجل في آخر chapter في قصة حياته..
- فوففا (فؤاد لا يغفر ابدا): عندينا في البلد اكلوا وشي عشان ماخذش بتار بابا..
- أنا (بابا دي مش لايقة على فيلم شئ من الخوف دا): اتلهي.. ماتعملش فيها ابن ليل وانت يثبتوك بسرنة أصلا.. قوم ياض فز وانت بتكلمني.. ووطي صوت الزفت دا وافتح فتحة الكونتر عشان نسمع بعض..
- فؤاد (اكتشف فجأة إنه إنسان وليه حقوق): من حق موظف الكونتر إنه يقعد في التكييف ويتفرج ع الدش.. دي قواعد دولية متعارف عليها!!
- أنا (فؤاد اللي معاه دبلوم إصلاحية عرف القواعد الدولية): قعدت عليك دولة باللي فيها.. اطني التكييف وافتح الكونتر.. أبوك ماخلفكش في التكييف يا متسول، دي الفاموليا طول عمرها بتهوِّي بكرتونة..

- فوففا (نتاج تزواج الكرفس مع شبشب الحمام): ابقى
عدّي على دكتور رفعت المدير عشان عايزك..



مشهد رقم اثنين: أنا دخلت مكتب دكتور رفعت المدير.. لقيته
بيتأمل في حوض صغير لأسمك الزينة، أول مرة اشوفه في مكتبه..

- أنا (باسمّي عليه عشان أهّته): سالخير يا جناب البيه..
مبروك القرموط الجديد.. مالك كدا مش في الموود؟

- رفعت (قلة العيانين جايبة له اكتباب): زَهَق .. الملل نفسه
مل مننا.. دا غير طلبات الموظفين اللي مابتخلصش..
كلهم عايزين زيادة في الفلوس..

- أنا (دا أنا كنت ناوي افاتحك في ذات نفس الـtopic): إيه
قلة الذوق دي.. هما مش شايفيننا بنشحت وقرينا نقفل..
مفيش انتماء ولا دم!!

- رفعت (بيشاور على حوض السمك في حنان أبوي): شايف
السمكة دي؟! أهّي دي الحاجة الوحيدة هنا اللي بتفتح
بؤها من غير ما تطلب علاوة..

لا يزال الفش..... إحم.. الضرم مستمرا

- أنا (يا عيني.. الراجل اتهطل خلاص): ربنا يفرجها يا دكتور.. قالوا لي تحت إنك عايزني..
- رفعت (بيديني ورقة عشان اقراها): الروشنة دي بتاعتك؟؟
- أنا (مارضيتش امسك الورقة عشان البصمات.. قريتها وهي في إيدته لحسن تكون فيها مصيبة): اه.. أنا اللي كتبت الروشنة دي.. مالها؟؟
- رفعت (لهجة وكيل نيابة وهو بيجاول يوقّع المتهم): بُص كويس.. مش ناسي فيها حاجة؟؟
- أنا (يخرب بيت الفراغ اللي سايبك ترازى فينا): ح اكون ناسي فيها إيه؟؟ غياراتي الداخلية!!
- رفعت (بيشاور على آخر الورقة من تحت): لأ.. انت نسيت تمضي..
- أنا (الروشنة دي وقعت في إيدك إزاي؟؟): مالك يا عم الخطر محسسنني إني كاتب للراجل على صواريخ سكود!! الروشنة مافيهاش غير بانادول!! هو انتوا كلكوا هنا كدا؟؟!!

لا يزال الفش..... إحم.. الضرر مستمرا

#أنا شغال في مصحة

#زمن المخ الجميل بح

#الكل باع دماغه بالخسارة



المشهد الثاني عشر

حدث بالفعل في العيادة (+18)، ممنوع دخول كروموسوم

الـXX نهائيا):

الزمان: مشهد نهار داخلي..

المكان: مستشفى (التت) للأعمال المنافية..

مشهد رقم واحد: أنا كنت داخل الريسبشن بتاع المستشفى..

وأنا معدّي في الريسبشن لقيت فؤاد موظف الاستقبال قاعد ورا

الكونتر وعينيه بتبظع الشاشة اللي قدامه، وعمّال يريل زي

الجاموسة.. واضح إن قلة الزباين خلّصت على اللي فاضل في

نافوخه..

- أنا (يا بوزك النكد ع الصبح): فوفضا حبيبي.. سلاموا

عليكوا..

- فؤاد (مشغلّ فيلم بورنو للفنانة مديحة كامل وقاعد

بيحسس ع الكي بورد): سلامة بيسلم عليك..

- أنا (بتتحرش بلوحة المفاتيح!!): فوق يا عم وكفاياك نجاسة

بقى.. صحتك راحت.. وإيه اللي انت بتشوفه دا؟؟ مديحة
كامل!! يا بني دا السكس اتطور كثير من ساعتها.. انت
فايتك على الأقل اربع أجيال من السيكوسيكو.. سمعت
عن مروة ياض؟؟

- فؤاد (مسك الكي بورد وقعد يعرض فيها بسنانه ولون
عينيه قلب أحمر): دكتور رفعت المدير عايزك..
- أنا (لم ديلك اللي بيرقص من وراك دا): ابن حلال، أنا
كنت طالع له..



مشهد رقم اثنين: أنا طلعت لمكتب دكتور رفعت المدير، عشان
أدّي له هدية كنت جايها له على سبيل رفع المعنويات، لأن
انقراض سلالة الزباين عامل له احباط.. وبما إننا بنعيش في
أيام رغد وبحبوحه من العيش غير مسبوقه وأنا مش معايا فلوس
أجيب هدايا، أنا قررت أدّي له عينة فياجرا من اللي بيحبوها
لي المندوبين.. أنا جبت العينة بعد ما لفيتها في ورق فويل من
بتاع المطبخ على شكل هدية (مفيش فلوس اجيب شنت هدايا
برضو).. أنا حسيت إن دي أنسب هدية اجيبها لرفعت خصوصا
إن قلة الشغل عاملة له احباط في كل حاجة!!

مشهد رقم ثلاثه: أنا دخلت الدكانة عشان اكشف على الزبون

الوحيد الموجود وكان من أصل افريقي..

- أنا (موجها كلامي للزبون): صباح الخير يا باشت
الباشاوات.. برنس البرانس وحياة النيعمة.. اتشرف
بالاسم..

- العيان (منبهر من حُسن المعاملة.. مايعرفش إنه أول زبون
يخطّي المخروبة من خمس عقود): ناظر محمود..

- أنا (إيه جو ضمير أبله حكمت دا!): دي خانة الاسم ولأ
المهنة؟؟

- ناظر (لسة ح بيتدي يشرح): دا....

- أنا (باقاطعه وأنا باطلع الوش الثاني من شنطة الشغل):
مش عايز اعرف.. بتشتكي من إيه؟؟

- ناظر (محتار يوصلّ لي الخبر السيئ إزاي): الحقيقة
ضغطي عالي، فمراتي نصحتني أخذ بردقوش!!

- أنا (مسكين فاكر إن الأخبار السيئة ح تزعلني.. مايعرفش
إنه مش فارق معايا أصلا): ما تقول يا بني بتشتكي من
إيه؟؟!!

لا يزال الفش..... إحمو.. الضرم مستمرا

- ناظر (مصمم على اقواله): كنت باسأل عن نبات البردقوش وعلاقته بضغط الدم..
- أنا (كالعادة لازم اتظرف سؤال يخلص على اشيائي): دا اسم نبات بجد ولأ حاجة بيحضروا بيها العفاريت؟! أنا كنت لسة ح استرسل مع ناظر في مسألة تحضير الأرواح، وإنها ليها حرمانية كبيرة.. دا غير إن اللي يحضر الجن ومايعرفش يصرفه يعرف إن الجن ح يفشخه.. لكن في اللحظة دي باب العيادة خبط، فقمّت عشان اشوف مين.. فتحت الباب لقيت أمين شرطة ماسك لاسلكي واقف في وشي!!
- أنا (بلغت عني يا فوففا الكلب!! كل دا عشان أبوك فيص في إيدي؟!): حبييل؟؟ (كان قصدي اقول «خير؟؟» بس ماعرفتش)..
- أمين الشرطة (بلهجة رسمية مقصودة عشان يسبب ركبي): حضرتك دكتور شادي دكتور القلب؟؟
- أنا (هي حصلت تيجي لي محل أكل عيشي يا حكومة؟؟ عموما إحنا مابنخافش): لأ.. عيادة القلب تحت.. ح تلاقني دكتور شادي مشغل مديحة كامل!!

- الأمين (لهجته بدأت تتغير من الصرامة للترجي): معلىش
يا دكتور.. أصل إحنا معانا واحد زميلنا تعبان وعايزينك
تكشف عليه..
- أنا (اه يا واطي): بقى انتوا عايزيني عشان كدا؟؟ طيب
إيه رأيك إنى ولا ح اشوفه، ولا حتى ح اشوف العيان اللي
عندي جوا..
- أنا (موجها كلامي لناظر): قوم يا عم الناظر.. منك لله،
نفست لي اليوم باسمك وبالغفاريت اللي انت مخاويهم..

#وكان لازمته إيه التنطيط يا حكومة!!

#أتاري مدام مديحة ربت في أجيال بحالها



المشهد الثالث عشر

حدث بالفعل في العيادة:

الزمان: مشهد نهار داخلي، وكان أول شهر..

المكان: مستوصف (اللي ابتدى الحرب يستحمل الضرب)

الخيرى..

مشهد رقم واحد: أنا داخل من باب المستوصف الموجود في حي

شعبي شديد الفقر.. مكان معدوم الامكانيات ومعدوم الفلوس واحنا

بنتضرب فيه اكر ما بنقبض.. انهاردة أول الشهر.. طبعا أنا مش رايع

العيادة عشان فيه عيانيين، لأن الصنف دا اندثر من أول الصيف.. في

الحقيقة أنا رايع عشان اقبض.. فيه حد ح يسألني طيب وح تقبض

إزاي إذا كنت ماشتغلتش؟؟ الإجابة هي إنى بامارس سياسة خداع

الذات عشان مامتش من القهر!!

أنا دخلت الريسبشن بتاع المستشفى لقيت فؤاد موظف

الاستقبال قاعد ورا الكونتر وماسك رزمة فلوس بيعد فيها..

— أنا (إيه دا؟! هو لسة فيه فلوس في البلد!!): فوفضا حبيبي

صباح الخير.. إيه اللي في إيدك دا؟!

- فؤاد (مخه معجون بمية داتورا، حشيشه منه فيه): !!!!!
- أنا (أنا مش عارف انت بتتعامل إزاي بالفيمتو مخ اللي عندك دا): انت عطلان ياض ولاّ إيه؟؟ باقول لك إيه اللي في إيدك دا؟؟ انت معاك فلوس منين؟؟
- فؤاد (بيترجع على قائمة اتتح 5 شخصيات في العالم): أنا مش معايا فلوس.. أنا الفلوس!!
- أنا (فؤاد اللي رهن عياله في سوق العبيد عشان يجيب لنفسه بنظلون بيتتطط عليا): بالراحة على نفسك يا فرعون.. انت عايز تفهمني إن كلنا مفلسين وانت يا معفن اللي معاك فلوس؟!
- فؤاد (بعد حالة الفلس اللي بيعيشوها دكاترة المستشفى حس خلاص إن الروس اتساوت): وانت ح تعوز الفلوس ليه يعني؟؟
- أنا (قافل سناني على بعض بدل ما افتحها تقفل على رقبته): عشان آكل..
- فؤاد (هو والفهم زعلانين من بعض): وتاكل ليه؟؟

لا يزال الضمير مستمرا

- أنا (اه يا قاع المستقع): برستيغ.. بيديّ وجاهة للإنسان..
- فؤاد (هريان من مستشفى المجانين عنبر الخريانيين موووت): فيه حالة مستتيك فوق.. وابقى عديّ على دكتور رفعت المدير الأول..
- أنا (رفعت مين يا عم.. أنا اشياي مش ناقصة فقح): والعيان دا مصري، ولأ من جنسية مجهولة؟؟
- فؤاد (مش جاي من اللالا لاند.. لأ، من الكاكا لاند): مصري من جنسية مجهولة!! من اللاجئيين المصريين في مصر..
- أنا (داهية فيك، أيامك كلها غلط): غسل.. ما كلنا لاجئيين هنا يا بني.. وعلى فكرة.. الفلوس اللي في إيدك دي أنا حاشمها للكلب، عشان نعرف مين صاحبها يا حرامي..



مشهد رقم اثنين: أنا طلعت مكتب دكتور رفعت المدير، وقررت

إني اخده بالصوت عشان انسيه أي كلام فارغ ناوي يقولهولي..

- أنا (عايش دور حامي حمى النظام): الواد اللي تحت دا ح
يخرب المكان أكثر ما هو مخروب.. لازم تمشوه ..
- رفعت (نظرة حنين بظت من عينه، واضح إن فيه علاقة
مشبوهة بينه وبين فؤاد): فوفو الغلبان.. دا خادمكوا
خدمة العبد للإيد..
- أنا (الإيد!! انتوا الاتنين تستاهلوا بعض على فكرة): يبقى
لازم يتعاقب.. نلسعه بالشمعة في حنته.. أو نجبسه في
أوضة أسبوع من غير أكل..
- رفعت (افتكر فجأة إنه فؤاد عبارة قوقع بلهارسيا):
اتلهي، فؤاد مش ح يستحمل أسبوع.. دا لو اتحرم من
الأكل ح يموت بعد رُبع ساعة، ويبقى اتحسب علينا نفر
بالأونطة..



مشهد رقم ثلاثم: أنا رُحت أوضة الكشف عشان اكشف ع
العيان اليتيم اللي موجود.. راجل شكله محترم، بس باين عليه
الاكتئاب الشديد..

لا يزال الفش..... إحو.. الضرم مستمرا

- أنا (موجها كلامي للعيان): صباح الخير يا فندم، اتشرف بالاسم..
- العيان (اكتتابه بيوحي فعلا إنه من الجالية المصرية في مصر): أبو الهنا..
- أنا: دا حضرتك؟؟
- العيان (بينعي حظه): يا ريتي كنت أنا..

#لأ انت تروح تكتتب في حة تانية

#إحنا عندنا هنا بزيادة قربنا نصدره



لا يزال الفش..... إحو.. الضرر مستمرا

obeikandi.com

المشهد الرابع عشر

حدث بالفعل في البيت:

الزمان: مشهد ليل داخلي..

المكان: منزلنا العامر..

أنا كنت قاعد في بيتنا باكوي القميص اللي ح اخرج بيه
بكرة.. المحاولة رقم 265 إني أكوي القميص من غير ما احرقه
قد باءت بالفشل.. بعد نُس ساعة القميص اللبني السادة بقى
مشجر زي قمصان هاواي!! أنا قررت افنن فيه ما دام هو كدا
كدا رايح، فقعدت احاول اوزع بطش الحروق في اشكال سيريالية
منظمة لحد ما المكوى بنت الـ❖❖❖❖ بدأت تتلالى..

- أختي مريان (معدية بالصدفة لقيتني باتف ع القميص):
إيه يا عم البدائي.. الناس بطلت تكوي بالتفاضة من
زمان.. ما عندك بخاخة المية قدامك أهى..

- أنا (كملت.. المكوى ومريان في ليلة واحدة): أنا مش بابل
القميص.. أنا باتف ع المكوى عشان مطلعة ديكي زي
ناس..

— مريان (في سؤال ظاهره المساعدة وباطنه ما يعلم بيه إلا ربنا): مالها؟؟

— أنا (محتار اقول لها ولأ احدفها بالمكوى واخلص): اللمة بتاعتها باظت.. مش عارف إذا كانت بتسخن ولأ لأ..

— مريان (بتشاور بإيدها جنب وشها): بسيطة.. انت امسك المكوى وقربها من خدك قوي كدا، ح تحس بالسخونية..

— أنا (وحياة النعيمة كنت عارف.. أبوكي وأمك قعدوا يشتغلوا عشان يصرفوا علينا ونسيوا يربوكي.. كان لازم يعرفوا إن الفلوس مش كل حاجة): وافرض قام زلزال فجأة، ساعتها إيه اللي ح يحصل؟؟

— مريان (بتضحك ضحكة الأرنب): هأهاها.. وشك ح يلزق في المكوى (وظلعت تجري)..

أنا كنت لسة ح احدفها بالمكوى وبعدين لقيتها إنها أخيرا بدأت تسخن فرحت حادفها ببخاخة المية.. وأنا قاعد مستني المكوى تسخن مسكت ريموت الدش للمرة الأولى في حياتي وقعدت اقلب في القنوات.. تشاء الأقدار إني الاقي أحمد موسي مستضيف توفيق عكاشة!! فقررت من باب الفضول إني ابلع

لا يزال الفش..... إحم.. الضرم مستمرا

قرص برمبران من بتاع الترجيع واقعد اتفرج عليهم زي ما الناس
التانيين بتعمل.. لسة بأبص في التليفزيون، لقيت مرتضى منصور
دخل في مداخلة تليفونية معاهم!! عند النقطة دي حسيت إن كدا
كثير.. دي علامة.. الثلاثي الرهيب دا وأختي والمكوى في ساعة
واحدة يبقى القدر عايز يقول حاجة.. أنا رُحت ماسك القميص
بالمكوى بالتليفزيون بالدش ونزلتهم للبوابة.. وطبعاً دوّرت على
أختي عشان انزلها معاهم بس يظهر عليها كُنْتُ في حنة أمان
لحد ما اهدى!!

#الاستوديو_استحملهم_إزاي_مع_بعض!!

#curiosity_killed_the_cat

#w_the_dog



لا يزال الفش..... إحو.. الضرر مستمرا

obeikandi.com

المشهد الخامس عشر

حدث بالفعل في العيادة:

الزمان: مشهد ليل داخلي..

المكان: مستوصف (الكيف) التخصصي..

مفيش عيانين.. عيانين بَح.. غضبوا وراحوا بيوت أهاليهم بعد ما سابوا لي العيال.. السلالة العيانة انقرضت.. اللي فاضل منهم يعتبر ثروة قومية يجب الحفاظ عليها.. المفروض يتحط في المحمية لو عايش، أو في المتحف لو البقاء لله.. أنا كنت فارش مرتبة على أرض العيادة ونايم قدام التكييف.. وأنا نايم باب العيادة اتفتح ودخلت منه واحدة ست..

— أنا (فاكرها حلم): ميبين؟؟

— الست (صوتها واصل لي من بعبييد): أنا..

— أنا (اتأكدت إنها حلم او عفريت في أحسن الظروف):

عايزة إيه يا أنا؟؟ اقفلي الباب عشان التكييف.. أو

انصرفي، لا تتذيني ولا اتذيكى..

- الست (بتقفل الباب وراها وماشية): متأسفة، أنا كنت جاية اكشف..

أنا انتطرت وبرمت المرتبة وخبيتها تحت المكتب.. ولبست جلابية الدكتور وخرجت جبت الست من قفاها قبل ما تهرب..

- أنا (على وشي ابتسامه توحى بمدى جودة الخدمة المقدمة): مساء الخير يا غالية.. فيكي شبه من ماما وحياة النيعمة.. اتشرف بالاسم..

- العيانة (نظرة زجاجية): ليه!!

- أنا (ليه!! اسم غريب جدا.. أو الست هبله): عاشت الاسامي.. سن حضرتك؟؟

- الست (من كوكب تاني مش بيتكلموا فيه عربي): إيه؟؟

- أنا (هو أنا اسئلتى كلها من برا المقرر ولا إيه!! مع إن الامتحان حطوه نخبة من الخبرا.. المفروض إنه في مستوى الطالب البهيمه): تمام.. انجبتى كام طفل؟؟

- الست (طلعت من أهل الأرض!!): يعنى إيه؟؟ انت اسئلتك كلها معقرية كدا؟؟

لا يزال الفش..... إحو.. الضرم مستمرا

- أنا (غبي أنا.. واحدة مش عارفة تجاوب عن الاسم، ح تعرف انجبتني؟؟): خلفتي كام عيل؟؟ زلطتي كام صرصار شبهك يا ولية؟؟!!
- الست (واضح إن قلة الأدب بتجيب معاها): سبعة..
- أنا (يا رب طلّعهم كلهم سلام.. أنا مش ح استحمل حد تاني من العيلة دي يجي يكشف عندي): إن شاء الله ربنا مش ح ياخدهم بذنبك.. حد من قرابيك بياخد علاج للقلب؟؟
- الست (مستوى ذكاءها أقل من فرشاة السنان): جوزي..
- أنا (أكيد طبعا، دا أقل واجب): انتي وجوزك قراب؟؟!
- الست (بدأت تاخذ عليا وتفتح لي قلبها): لأ جيران..
- أنا (باسحب المرتبة من تحت المكتب وبافردها): امشي يا ولية من هنا.. انتي اللي زيك مش المفروض يتعالج ولا يعيش.. ابعتي لي المسكين جوزك، هو أولى..

لا يزال الفش..... إحو.. الضرر مستمرا

#المفروض جيناتك تنتهي لحد هنا

#IQ_3



المشهد السادس عشر

حدث بالفعل:

مشهد رقم واحد: ليل داخلي.. أنا قاعد في البيت بافتكر السنين الجميلة، أيام ما كان فيه زباين.. الدكاترة مش لاقين شغل.. إحنا بنشحت يا رجالة.. الدكتور منا بقى بيعمل جمعية كل ما يحب يجيب فطار.. دلوقتي بقينا بنشتري العيان من دول من كارفور، عشان بس مانساش شكلهم.. وأنا سرحان وباجتر الذكريات لقيت موبايلي بيرن، بأبص لقيتها نمرة أمير زميلي..

- أنا (كل مرة ارد عليك فيها باندم): الو.. عايز إيه؟؟
- أمير (نفس سماجة ومستوى ذكاء حبل الغسيل): أبو الشاد.. إزيك يا كبيرنا؟؟ عندي خبر ليك بس ماعرفش حلو ولا وحش..
- أنا (يا رب ما يكون اللي في بالي): طالما مش عارف يبقى أكيد زي وشك..
- أمير (قرر يفرسني كالعادة.. أنا لو اخدت نص جنيه عن كل مرة أمير فرسني فيها، كان زمني اشترت الجيزة): جدو عايزك في كشف منزلي!!

— أنا (يا مرارااااي): انت كداب ياض.. جدك مش ممكن يكون عايزني.. ومش ممكن يكون فاكرني، ومش فاكرك، ومش فاكر يعني إيه دكاترة أصلا.. ولو هو فاكر اسمه نفسه يبقى كويس..

نبذة مختصرة عن جدو عشان اللي مايعرفهوش من القصص السابقة: جدو معزّل من كتير.. من قرون.. ماغدوش أولاد لأنهم ماتوا كلهم.. وكان عنده بضعة مات من الأحفاد ماتوا هما كمان.. اللي فاضلين دلوقتى (ومن ضمنهم أمير) مش أحفاده، دول أحفاد أحفاد أحفاد الجيران!! عموما مش فارقة، لأن جدو يعتبر أثرى أبو الهول كدا، ونص البلد بتحمل جيناته الوراثية بطريقة أو بأخرى..



مشهد رقم اثنين: ليل داخلي.. أنا وصلت للقسم الفرعوني في المتحف المصري (جدو كان عايش هناك، في الكورنر بتاع عصر ما قبل الأسرات).. لما دخلت الأوضة المعروض فيها جدو، لقيته نايم في السرير وأمير واقف جنبه (أمير يبقى حفيد جدو من الدرجة الـ17 والقائم بأعمال المترجم الرسمي)..

لا يزال الضحك..... إحم.. الضم مستمر

- أنا (يا رب عدّي الكشف دا على خير): إزيك يا جدو؟؟
فكرني كدا، عمرك كام سنة؟؟
- جدو (بثقة، بعد ما قعد يفكر ساعتين): !!75!
- أنا (وقعت من على الكرسي من كتر الضحك وقعت ارقص برجليا): ..looooool you are so funny ya geddo..
- جدو (كان بيتكلم 30 لغة حية و 20 لغة ميتة، منهم لغتين محدش بيّفهمهم غيره.. هو نسي دا كله ومش فاكر غير اللغة السنسكريتية القديمة): إيه؟؟
- أنا (باحاول استعيد وقاري): الـ75 دول هما اللي انت فاكرهم.. لكن فيه قبلهم 500 - 600 سنة بالميت.. يا راجل دا الفترة اللي انت عشتها قبل مصرع كليوبترا تطلع لوحدها 75 سنة.. ما علينا، بتشتكي من إيه المرة دي؟؟
- جدو (ماينطقش.. داهية لا تكون الستوب ووتش بتاعت عمره مضبوطة عليا): !!!!
- أنا (ماعنديش وقت ولا ضمير): انت بعد الألفيات اللي

عشتها دي قررت تموت دلوقت؟؟ عشان تبقى اتكتبت
على اسمي؟؟ يا عم انجز ابوس إيد أمك..

— جدو (واضح إني فكرته بالحاجة الله يرحمها): مامه!!

— أنا (مامه!! أنا كنت فاكِر جدو جاي نتيجة انقسام
ميتوزي): إيه دا، هو كان فيه ماما بجد؟! دي كانت بتلعب
مع نفرتيتي أكيد!! مش معقول تكون فاكِرها أساسا!!

— جدو (نظرة حنين): تانت نفرتيتي!!

— أنا (ح اموت قبل ما اعرف جدو بيشتكى من إيه): يحرق
أم معرفتك السودا يا أمير الكلب..

— جدو (الذاكرة بترجع له بالتدريج في صورة أحلام يقظة):
أمير!! انت تقصد الأمير محمد علي حفيدي؟؟

— أنا (يا ولاد الكلب كلكوا): ارحمني يا كافر.. حاسس
بإيه؟؟

— جدو (هريان من موسوعة وصف مصر لجمال حمدان):
عندي تكسير في الشرايين وطراش مستمر وبتأرع كثير
وباشوف دبابين طايرة طول الوقت!!

لا يزال الضم... إحمر.. الضم مستمرا

- أنا (بصيت لأمير يمكن يكون عنده أي فكرة عن اللي بيتقال دا): هي دي اللغة الأشورية ولا جدك اتلبس على كبر؟؟
- أمير (فاتح كتاب ضخمة، تقريبا قاموس للغة جدو): يقول إن عنده قصور في الشرايين وبيرجع باستمرار وبيتكرع كتير وبيشوف دبان طاير حواليه..
- جدو (بدأ يفكر العربي): وعندي حرقان في البول..
- أمير (ماسك الكتاب ولسة بيترجم): وعنده حرقان في البول!!
- أنا (بأبص لأمير بصة كلها حقد وبعدين باكلم جدو): كويس إن فيه بول بينزل أساسا.. دا أصغر منك وبولهم نشف!!
- أمير (راسم على وشه ملامح قلق ماتخيلش على عيل بيرضع): تفتكرح يخف يا دكتور؟!
- أنا (الآفات اللي زيك المفروض تتباد): عامل الزمن مش في صالحنا الحقيقة.. جدو سنه كبير حبتين..

- أمير (واضح إنه كان مستني جده يموت عشان طمعان في
طقم الصيني اللي عنده): انت بتعلق فشلك كطبيب على
عُمر الراجل.. ولا عارف تعالجه ولا عارف تموتّه!!
- أنا (كان المفروض لما الاقي نمرتك، اعمل نفسي
ماشوفتهاش): تصدق المهنة دي مهنة وسخة.. قبل ما
يخترعوا الدكاترة كانت الناس بتموت في سلام وصمت..
دلوقتي بقى كل من هب ودب بيتتطط علينا..

#بعد كدا أنا ح اعمل نفسي مش شايفكوا

#لا ارى لا اسمع لا اتألم!!

#جدو محتاج خبير مثنّ مش دكتور



المشهد السابع عشر

حدث بالفعل في التلفزيون:

الزمان: مشهد نهار داخلي..

المكان: ممم.. نقدر نقول في التلفزيون!!

أنا كنت باشتغل في العيادة والعيانين وأهاليهم بيسفلتوني كالعادة.. أنا كنت قاعد باستمتع بشعور العجينة وهي بتتفرد بالنشابة لما المدعوق رن، بأبص لقيته رقم غريب.. طبعاً إنتوا عارفين إنني عمري ما بارد على أرقام غريبة..

— أنا (اللي اخترع أمك مش ح يورد على جنة): الووووووه..

— صوت أنثوي جذاب: صباح الخير.. دكتور شادي معايا؟؟

— أنا (السؤال دا عمره ما جه من وراه خير أبدا): لأ.. مين

حضرتك؟؟

— الصوت (بطريقة «الواد دا عبيط ولأ إيه؟؟»): أنا إسراء

من قناة النيل الثقافية من التلفزيون.. كنا عايزين

حضرتك تطلع معنا..

الناس اللي عارفاني يعرفوا إني عمري ما باتفرج على التي في بتاتا.. ولا قناة النيل الثقافية ولا أي قناة نيل تانية.. فبالتالي ماصدقتش نفسي لما لقيت حد من التلفزيون بيكلمني..

- أنا (التلفزيون!! مش دا الجهاز اللي موجود في الـ living): اه يا فندم التلفزيون.. عارفه طبعا.. بس دا بيدخلوه إزاي؟؟

- إسراء (يا صبر أيوب): أنا ح ادخلك..

- أنا (يا حالولي): بس حضرتك أنا رجليا الاتنين شمال.. بامشي اتكعبل..

- إسراء (بتجز على سنانها وصوتها فيه ندم السنوات): ح نصورك وانت قاعد.. مش ح نجيب سيقانك الكريمة..

- أنا (بجملة الغلاسة): وكمان أنا باخاف.. وباتتهه واتفتف وأنا باتكلم..

- إسراء (بتدعي عليا وعلى اللي شغلها الشغلانة دي): لأ.. أنا ح ادِّي رقمك لبرنامج فرسان تحدوا الإعاقه أحسن.. بالمناسبة الكنبه اللي ح تقعد عليها لونها كحلي..

لا يزال الفش..... إحمو.. الضرم مستمرا

- أنا (واضح إن دي معلومة خطيرة بس لفئة معينة من البشر.. أنا مش منهم أكيد): الكنبه حرة يا أستاذة.. تلبس اللي عايزاه.. هي مابقتش صغيرة دلوقت!!
 - إسراء (قررت تعزل المهنة دي اللي ح تجيب اجلها): دا عشان تختار لون لبس مناسب.. ماتجيش ببدلة مثلا تكون نفس لون الكنبه..
 - أنا (مسكينة البنت دي.. فاكرة إن فيه 100 بدلة): ما أنا كدا كدا ماعنديش غير بدلة واحدة..
 - إسراء (خايفة تسأل): لونها إيه؟؟!
 - أنا (خوفك في محله): كحلي!!
- وحياتش النيعمة الثقافة بتتظلم معانا.. يلا ما هي البلد كلها عطلانة، ماجاتش ع الثقافة يعني..

#أنا حطيت رجلي على أول سكة الشهرة

#الإغراق في المحلية هو الطريق للعالمية

#قلبي حاسس إني أنا اللي ح اغرق

#بكرة الفضيحة مش ح تبقى للركب لأ للودان



المشهد الثامن عشر

حدث بالفعل في البيت:

الزمان: مشهد ساعة عصرية داخلي..

المكان: الدروة اللي أنيانا..

أنا قاعد في البيت باقرا مجلة ميكي وأختي مريان بتذاكر لأن عندها ملحق كالعادة (أکید كل دي ملاحق.. لأن لو دي امتحانات لشهادات جديدة كان زمان أختي بقیت ملكة انجلترا أو وزيرة الصحة على الأقل.. كان زمان عندها شهادات لو اتحطت فوق بعض تبقى أعلى من برج خليفة)..

- مريان (بتبص للاب توب العتيق بتاعها كأنها أول مرة تشوفه): شادي.. هي اللبة اللي في الجنب دي بتاعت إيه؟؟

- أنا (اصطبحنا وصبح الملك لله): إذا كنتي انتي مش عارفة ح اعرف أنا منين؟؟

- مريان (كثرة المذاكرة لحست مخها واخذت نظرها في السكة): ليها وظيفة يعني، ولا بس عشان الطيارات تشوفه بالليل وماتخبطش فيه!!

- أنا (قلبي.. أختي ح تخلص عليا ياماً): !!
- مريان (اللاب توب بياخذ بتاري منها): خد صطب ويندوز للزفت دا.. وهات المجلة اللي في إيدك اقراها..
- أنا (لسة جايب المجلة ومالحقتش اقرا منها حاجة): ماتقري حاجة تانية..
- مريان (بتسحب المجلة بالعافية وبتزقلني باللاب في وشي): لأ.. أنا عايزة اقرا عن عم دهب.. مثلي الأعلى!!
- وأنا قاعد بادور على رد مناسب (طبعاً مش لاقى)، لقيت صوت الميسنجر بتاع الفيسبوك بيرن.. الرسالة كان نصها كالتالي:
- مساء الخير يا دكتور شادي.. أنا نرمين من قناة TEN TV.. إحنا معجبين بأعمالك.. ممكن رقم تليفونك للتواصل؟؟
- أنا (بارد برسالة): غور ياض من هنا بلاش قلة أدب..
- نرمين (إنسانة ذوق جدا): دا رقمي.. ممكن تشوفه ع الـ true caller..
- أنا (بعد ما اتأكدت من الرقم): يا باشا أنا آسف..

لا يزال الضمير مستمرا

- نرمين: ح تديني الرقم عشان نرتب معاد؟؟
- أنا (قررت اتقل شوية): أنا حلم حياتي إني اديكي النمرة.. ممكن اديكي مناخيري نفسها..
- نرمين: هو حضرتك معجب بينا للدرجة دي؟؟
- أنا (مش باتفرج ع التلفزيون نوهائي): ولا عمري شوفتكوا.. ولا TEN TV ولا أي TV تاني!! إحنا ماعندناش تلفزيون.. ولو كان عندنا تلفزيون في بيتنا، فأنا ماعرفش مكانه فين..
- أنا (موجها الحديث لمريان): دول بيقولوا ح بيعتوا لي عربية تجيبني وترجعني.. لحسن يكونوا ح يخطفوني؟!
- مريان (قاعدة بتشرب الصنعة من عم ذهب): اتلهي!!
- أنا اللي مزعلني إني خلال 18 سنة في الكارير بتاع الطب، عمري ماطلعت في أي حاجة.. ولا مجلة ميكي.. ولا مجلة حائط.. ولا إذاعة مدرسية حتى.. ولا حتى بقيت حكيم زي ما كنت عايز.. ماخدتش من كلمة حكيم غير إنه اسم جدي.. يقوم يجي الكتاب دا يشقلب حياتي كدا..

يا رب مش فاضل غير تلات حاجات:

-أولا: قضية تترفع على الكتاب.. يا حبذا من وزارة الصحة أو
النقابة..

-ثانيا: فضيحة.. من نوعية شادي بيتاجر في الأعضاء أو بيدير
شبكة للسوكسيه.. أو واحدة تقول إنني مخلف منها نونو (ويا
ريت تكون حلوة)..

-ثالثا: الفلوس اللي بتيجي بعد الحاجتين اللي فاتوا.. الفلوس
الكتييير.. اللي تقدر تشتري جُزر وكواكب وضمائر الناس..

#أحلام__منحرفة

#أحلام__اتمست__في__شقة__السوكسيه

#طول__عمري__نفسي__حد__ياخذ__رقمي__في__

حاجة__غير__المصايب!!

#دا__انتي__لو__عايزة__مريان__نفسها__خديها

#أنا__مش__مصضاً__نفسي



المشهد التاسع عشر

حدث بالفعل:

مشهد رقم واحد: ساعة مغربية خارجي.. أنا كنت قاعد في محطة المترو مستتي اركب.. وأنا في انتظار المترو اكتشفت إن الناموس افتري.. الناموسة من دول فاكرة نفسها صقر، بتعض من فوق الهدوم.. من فوق الجزمة نفسها.. ما هو يا إما الناموس طلع له سنان، يا إما الجزمة اللي بقيت شخصيتها ضعيفة!! وأنا قاعد موبايلي رن، بأبص لقيته رقم أستاذ حازم من دار النشر المسئولة عن طباعة وتوزيع كتابي..

- أنا (بلهجة كلها حرمان): إزيك يا سيد المعلمين؟؟ أخبارك إيه يا كبيرنا؟؟
- حازم (ماعندوش وقت ولا صبر): كتابك خرج من المطبعة.. تعالى بُص عليه بصة أخيرة..
- أنا (هو كتابي يموت ومخبين عليا!!): هو الكتاب في العناية المركزة ولاّ إيه؟؟
- حازم (اثر روح الدعابة عنده): بطل استظراف.. كتابك خلص، تعالى عشان تشوفه..

- أنا (اثبت يا قلبي): قول وحياة أبوك!! النسخ بتاعتي
خلصت؟؟
- حازم (بيزمجىر بطريقة بابا اللي شايف حمادة بيعمل
حاجة مش مؤدبة): هاللي انتوا فيه الجشع اللي انتوا فيه
دا.. نسخ إيه؟؟ هي نسخة واحدة ومش ح تاخدها.. ح
تتصور معاها وتبوسها وتديها لي تاني..
- أنا (هو أنا نسيت ادفع الإتاوة ولأ إيه؟؟!): ابوس مين يا
عم؟؟ ولأ هو عشان غلاف الكتاب مليون شفايف يعني؟؟
- حازم (حس إني زعلت فبيحاول يصالحني): طيب خد
الكبيرة..
- أنا (واحد كتير ومش قادر أخذ تاني لأن لامؤاخذة
صحتي مابقتش مستحيلة): إديني ارجوك.. أنا خلاص
بقيت مدمن!!
- حازم (بطريقة على الله يطمر): كتابك ح يتعرض في
الشارقة..
- أنا (يلا أهو أحسن من مفيش): مش كان أحسن ما نوديه
الشرقية، كنا نعرضه في القاهرة الأول؟؟

لا يزال الفش..... إحم.. الضرم مستمرا

- حازم (سكت شوية، عرفت بعد كدا إنه بيشتم في سره):
شرقية مين ياض.. الكتاب مسافر معرض الشارقة
الدولي للكتاب.. دار النشرمّت أوي!!



مشهد رقم اثنين؛ نهار خارجي.. أنا راكب الاوتوبيس وراجع
بيتنا بعد ما أخيرا اخدت نسخ كتابي من دار النشر..

احمدك ياااااااااااا رب!!

أنا كنت خايف لاموت قبل ما اشوفهم..

- أنا (ماسك كتابي باقراه وباضحك بصوت عالي مبالغ
فيه): هاهاها.. هيهيهيهيهيهي.. هعهعهعههاااااي..

- مواطن ما عرفوش (من ضمن حوالي 236754 بني آدم
كانوا راكبين معايا نفس الاوتوبيس): هو انت بتقرا
إيه؟؟!! وإيه الشفايف اللي على الغلاف دي؟؟!!

- أنا (خطتي اللئيمة بدأت تجيب نتيجة): دا كاتب جديد
بس دم أمه شريات.. لدرجة إنني اشتريت عشر نسخ من
نفس الكتاب.. من حلاوته..



مشهد رقم ثلاثم: ليل داخلي، بعد المشهد السابق بساعة..
أنا كنت رجعت البيت بحمولة الكتب الثمينة وقررت اقراهم
كلهم احتفالا بالمناسبة العظيمة دي.. وأنا قاعد باقرا أول نسخة،
موبايلي رن (رقم غريب)..

- أنا (الهي تولع يا ابن المفروسة): ميين ٩٩
- صوت أنثوي جذاب (أنا كنت بدأت اريّل بالفعل): مساء
الخير يا دكتور شادي.. أنا سارة من الأهرام!!
- أنا (وأنا شادي من حدايق القبة): إيه الحتة البيئة اللي
انتي عايشة فيها دي يا سارة.. دا شارع زحمة موت..
أو مريني..
- سارة (في كلامها إحياء حب مات في قلب القبيلة):
ههههههه.. حضرتك لطيف أوي.. أنا سارة من جريدة
الأهرام!!!!!!!!!!!!!!
- أنا (لولولوليبيبي.. الأهرام مرة واحدة!!): ولا كلمة.. ح
اغير هدومي، و 3 دقائق اكون عندك!!

لا يزال الضم..... إحم.. الضم مستمرا

أنا طبعاً مغيرتش هدمي عشان ماتأخرش.. أنا فتحت
الدولاب ولبست فوق البجامة أول حاجة قابلتها في وشي.. غالباً
كان كيس مخدة.. وأنا رايح ناحية باب الشقة لقيت أمي في وشي..

- ماما (غالباً لاحظت الوجة اللي أنا فيها): لابس كيس
المخدة بالمقلوب ليه يا مدهول!! ادخل أوضتك اعدله..
ومتشيك كدا ورايح فين؟؟

- أنا (عامل فيها سيد بيه الأليت!!): لا أبدا، رايح جريدة
الأهرام.. مجلة كدا اسمها الشباب عاملين معايا حوار..
باعتباري أديب كبير وكدزا..

- ماما (بتحدفني بالفاظة): مجلة كدا!! وأديب!! الألقاب
مّت أوي!!

#البؤبتاعمّتدا انتقال لي كثير انهاردة

#تقريباً بقى بدل مساء الخير

#اسلوب واطي في الدعاية

لا يزال الفش..... إحم.. الضرم مستمرا

#الغاية_تبرر_الوسيلة

#ميكيا فيللي_دا_كان_رخيص_أوي!!



المشهد العشرون

حدث بالفعل:

مشهد رقم واحد: نهار داخلي.. أنا واقف في المستشفى باتكلم مع دكتورة زميلتي.. وإحنا بنتكلم طلبت مني نمرة تليفوني فأديتها الرقم..

— الدكتورة (يظهر دورت ع النمرة بال true caller): مين اللي مسميـك Dr Shady Kalb ؟؟ هو انت واطي للدرجة دي؟؟
— أنا (يادي الإحراج): الحقيقة إني واطي بس مش للدرجة دي!!

— الدكتورة (نظرة أسف مستنكرة): !!!!!

— أنا (بدأت اجمع): اه.. دكتور شادي قلب!!!!!!



مشهد رقم اثنين: ليل خارجي.. أنا سايق العربية وراكبة جنبي أختي مريان.. ماما كانت مسافرة اليوم دا وأنا قررت على سبيل الحنان الأخوي إني أخذ مريان افسحها في كايرو فيستيفال في التجمع الخامس..

- أنا (موجها الحديث لكبيرة كفار قريش): مريان.. معاكي
كيس ارمي فيه الزباله؟؟
- مريان (كالعادة ماسكة مرجع وزنه نُص طن عاملة نفسها
بتذاكر فيه): ارمي في الشارع..
- أنا (اخذت بوز الممتعض في محاولة فاشلة إني العب دور
الكبير القدوة): أنا أهلي ربوني.. مش بارمي ع الأرض،
بارمي في الزباله..
- مريان (مالهاش كبير.. حتى الكبير اللي حيلتها باعته
وكسبت فيه): ولا عدى عليك أهل ولا رباية.. وبعدين
الشارع عبارة عن زباله كبيرة!! ماتعملش فيها أمائل
وارمي في الشارع!!
- أنا (بأبص لها باستغراب): مين أمائل دي يا بت..
- مريان (مارفعتش عينها من الكتاب طول الوقت دا): بت!!
أنا غلطانة إني طبخت لك انهاردة.. كان المفروض سبتك
ترعى في الحشائش.. بالمناسبة اللاب اللي صلحتھولي
مش شغال عدل.. كويس إني ماديتا كس بقيت حسابك!!

لا يزال الضم... إحمر.. الضم مستمر

إحنا وصلنا عند نقطة الأمن بتاعت كايرو فيستيفال، فطفيت
الموتور عشان فرد الأمن يفتش شنطة العربية..

— مريان (أخيرا في حاجة اثار اهتمامها، فقفلت الكتاب
وبصت لي وهي مخضوضة): طفيت الموتور ليه يا تيس؟؟
دي بتدور بدعى الوالدين!!

— أنا (بلاش تدمري معنويات العربية): لو ماطفتش الموتور،
العيل الغلبان ح يفرق في العادم..

— مريان (حصل لها عقدة من كتر ما العربية ذلتنا): يا عم
يفرق في عادم العربية أحسن ما نغرق إحنا في زقها..

#دكتور_تخصص_هو

#إحنا_بتوع_البوبي

#الراجل_زقنا_لحد_الباركنج_الصراحة



obeikandi.com

المشهد الحادي والعشرون

حدث بالفعل في الرعاية:

مشهد ليل داخلي.. أنا في الرعاية.. الوقت دا كان بداية الخريف.. الجو لسة حر نار زي الصيف، مع لمسة من عواصف ترايبية خماسينية زي الربيع.. الحقيقة الخريف ما قصرش.. سرق حاجة من كل فصل!! أنا كالعادة كنت قاعد في الرعاية بارتكب جريمة مش فاكر تفاصيلها، بس عقوبتها تتراوح بين الاعدام والنفي خارج المجرة.. فجأة موبايلي رن، بأبص لقيت رقم أختي مريان..

ملحوظة عن أختي: مريان من الصنف اللي لما ربنا يديه بيفتري.. يعني مثلا لما تبقى في نبطشية وربنا يهدي لها الحال، بدل ما تحمده، بتمسك تليفونها وتفضل تتصل بالخلق عشان تتسلى عليهم!! أنا زمان كنت باعمل عبيط ومش بارد، بس اكتشفت إن دي سياسة فاشلة.. محدش بيهرب.. إحنا عايشين في نفس البيت، ومسير الوشوش تتلاقى.. أول ما تشوفني بتروح عاملة لي زفة بشخايل، مع تعليقات من نوعية «مش بترد ليه يا ابن الناس المهمين» «اومال لو جابوك وزيرح تعمل فينا إيه؟».. الزمبوء بقى إن مريان كان عندها نبطشية هي كمان في اليوم دا..

- أنا (يا نكدي): هذا الرقم غير موجود بالخدمة..
- مريان (عجبتها النكته): ههههه.. شرابات يا مضروب..
- أنا (شرابات!): شوفتي العاصفة الترابية؟؟
- مريان (الألش الرخيص لا يزال مستمرا): أنا في مستشفى
المقاولين فوق الجبل يا بني.. إحنا اللي كنا بنحدف
التراب عليكموا!!
- أنا (بلبعت قرص زاناكس عشان اقدر استحمل المكالمة
من غير ما اقطع شرابييني): هي أمك دي كانت بتخلف
وتسيب الشارع يربي؟؟
- مريان (صاروخ النكته): وماله؟؟ ما هو الشارع لازم
يساعد برضو!!
- أنا (يا لهوي ع السكر.. قربنا نلرزق من العسل): عاملة
إيه في النبطشية؟؟
- مريان (موسوعة من 12 جزء في خفة الدم): عاملة نفسي
كوبري!!
- أنا (باتخيل شكل مريان والناس بتعمل تحتها بيبي!):
يعني إيه كوبري دي؟!

لا يزال الفش..... إحم.. الضرم مستمرا

— مريان (شكلها ناوية تظرفني شوية حِكَم من بتوعها):
عارف أبوك؟؟

— أنا (يعني مش قوي.. عارفه بالشبه كدا): لأ..

— مريان (قررت تعرفني الأبواب الخلفية للمهنة.. الأسرار الخفية لكهنة الرعاية): بابا كان بيحكي لي إن في الأرياف لما كانوا يلاقوا جثة في الرشاح بتاع القرية، كانوا يفتحوا لها الهاويس عشان تروح القرية اللي بعديهم.. عشان مايجبوش لنفسهم وجع الدماغ.. انت عارف سين وجيم ومحاضر!! أنا باعمل كدا.. مهمتي إنني أوصل العيانيين صاحيين للدكتور اللي بعدي، وبعد كدا أنا خالية مسئولية..

— أنا (إيه جو شئ من الخوف دا؟!): الرشاح!!! بتفتحي الهاويس يا فؤادة؟! طول عمرك جهبز..

— مريان (فخورة باله الحكمة اللي هي مصاحباه): طبعا.. فطنة ونصاحة..

— أنا (مصر مش ح تنسى لك دماغك السم دي أبدا): هو دا اللي اتعلمتیه من أبوكي؟! سيبتني كل الحاجات الكويسة اللي عملها ومافتكرتيش غير دي؟؟

#هو فصل الخريف معدوم الشخصية كذا ليه؟؟

#بروتوكولات حكماء صهيون الطبية

#حد يبلغ النقابة عن البيت دي



المشهد الثاني والعشرون

حدث كالعادة في العيادة:

مشهد رقم واحد: ليل داخلي..

المكان: العيادة الخارجية لمستشفى «سألت كل المجروحين»

التخصصي..

أنا دخلت المستشفى لقيت فؤاد موظف الاستقبال قاعد ورا الكونتر وقدامه كتاب بيقرأ فيه.. بس فيه حاجة غريبة.. فؤاد حزين!! فوففا أخبث وأوطى كينونة اتوجدت شكله حزين بجد.. ودا شئ غريب لأن الاكتئاب محتاج حد أدني من المخ عشان يحصل..

— أنا (فؤاد أبو مخ مقوّر زي البتجانة مكتّّب!!): مالك يا نكد؟؟

— فوففا (زي ما يكون واخذ اربعة كيلو بواني في وشه): لا اللي معاه مرتاح، ولا اللي ماعاهوش مرتاح.. اللي معاه فلوس فلوسه معوراه، واللي مش معاه قلة الفلوس معوراه..

- أنا (إيه الطعامة دي؟؟ البانجوح ياكل منك حتة): اومال يعني كنت عامل فيها أوناسيس، وماسك بكاوي الفلوس بتعدها قدامنا عشان تعقدنا..
- فوففا (شوية المخ اللي كانوا ملحوسين جمجمته اتمسحوا ودماغه بقّت نضيفة فلة): الفلوس مش كل حاجة.. العلام هو اللي ح يعمل لي قيمة ويأمن لي مستقبلي!!
- أنا (مستقبلك؟؟! دا انت طالع معاش بعد أسبوع!!): مش انت معاك دبلون لاسلكي؟!
- فؤاد (الدليل على إن الإنسان كان اصله كافولة): بدأت ادرس سياحة وفنادق..
- أنا (يلا بركة.. السياحة كدا كدا مضروبة): وإيه الكتاب اللي قدامك دا؟؟
- فؤاد (فاشل وحتى الفشل فشِل فيه): باذاكر تاريخ.. بالمناسبة.. بماذا تصف ما فعله نابليون بعد فتح عكا؟؟
- أنا (يا لهوي!! أنا سايب نفس الأسئلة من 20 سنة): دي ندالة وش.. مش رجولة أبدا..



لا يزال الضم... إحم.. الضم مستمر

مشهد رقم اثنين؛ أنا سبت فوففا بيداكر في نابليون وطلعت
اشوف الحالتين اللي حدانا.. أنا دخلت العيادة ودخل ورايا العيان
الأولاني..

الراجل دخل وافترض مبدئياً إنني مسئول عن كل الخوازيق
اللي لبسها في حياته.. أنا السبب في كل العوأل اللي حصل معاه من
ساعت ما اتولد.. كائن عصبي وعلى وشك يطرش في وشي على
الرغم إنني أول مرة اشوفه..

- العيان (بلهجة انت اللي قتلت بابايا): عشان تعمل حسابك
من الأول.. علاج ما باخدش.. والسجاير مش ح ابطلها..

- أنا (ما هو انت مش جاي هنا للساحر مدحت): وإيه
اللي جابك من بيتكوا طاه؟؟ المفروض اعالجك إزاي أنا؟؟

- العيان (بيشوح بإيده بما معناه اتصرف): مش أنا جيت
للدكتور؟؟ دا شغلك..

- أنا (لأ ما إحنا مش في ورشة تصليح موبيلات): للأسف
مش ح اعرف اعمل لك factory resting وامشيك.. لازم
دوا..

- العيان (سحب ايصال الدفع من قدامي وقام): أنا غلطان
إني جيت..
- أنا (انت مش مجنون.. اللي برأ هما اللي مجانيين):
العيب مش عليك.. العيب ع المرشد السياحي اللي قاعد
لنا تحت وبيحدف علينا أمثالك..



مشهد رقم ثلاثه: الزبون ابن المتعصبة خرج ودخل وراه متسول
ومعاه اتين زمايله.. عرفت بعد كدا إن دا الزبون الثاني.. الراجل
كان من أصل افريقي وواضح إنه جاي من قلب المجاعة.. عوامل
التعرية مبهدلاه وبيتسند على فرع شجرة على سبيل العكاز..

- أنا (رفعت سماعة التليفون واتصلت بفؤاد): انت يا بني
بتقيهم!! ما عندكش أي زباين من العاديين اللي بنقرا
عنهم في الكتب؟؟

- فؤاد (بلهجة تحمل روح «لو كان فيه خير»): وهو لو حد
عادي ح يجي عندنا يعمل إيه؟؟

- أنا (موجها كلامي للعيان بعد ما قفلت السكة على وش
فؤاد): كان يو سبيك انجليش؟؟

لا يزال الفش..... إحو.. الضرم مستمرا

#ابن الجنائني بقى فاشل يا انجي

#هو فاشل من الأول أساسا



المشهد الثالث والعشرون

حدث بالفعل في العيادة:

مشهد رقم واحد: نهار داخلي.. أنا في العيادة الخارجية بتاعت إحدى المستشفيات الحكومية.. كعادة أي مكان حكومي عدد المرضى بيوحي إن فيه لحمة بتتفرق ببلاش، أو إن وباء الانفلونزا اللي قضى على نص أوروبا سنة 1918 بيعيد إحياء نفسه..

العيادة كانت عاملة زي الميني باص الساعة 3 العصر.. الزباين كانوا قاعدين على الكراسي وعلى الأرض وفي ادراج المكاتب.. قاعدين على مروحة السقف وفي حجر الدكاترة وباطنين من الشبابيك.. لكن بين المرضى الكثير اللي كشفت عليهم، دخل اتنين مرضى ستات ورا بعض.. الاتنين بيشتغوا في مهن عمرها ما عدت عليا في عيانيين قبل كدا..

- الأولى: بطلة مصر السابقة في الغطس ومُحَكِّمة دولية حاليا..

- الثانية: ساحرة في السيرك القومي!!



مشهد رقم اثنين؛ زفت داخلي.. أنا في عيادة واحد من السفاحين اللي مش ح يوردوا على جنة دكاترة السنان.. الناس دي يا جماعة ليهم جهنم لوحدهم.. حاجة كدا أوسخ من بتاعت القتلة التسلسلين ومجرمي الحرب والإبادة العرقية.. أسوأ من بتاعت المستذئبين ومصاصي الدماء.. أسوأ من اللي بيخلطوا اللبن بالمية ومن اللي بيغشوا الشاي بنشارة الخشب.. ملحدين رسمي فهمي نظمي..

الدكتور بيتعامل مع ضرسي زي ما يكون قتل أبوه.. على الرغم إن ضرسي طول عمره غلبان وفي حاله..

بعد ما خلصنا شغل، أنا خرجت برّاً للرئيسيشن لقيت الدكتورة المساعدة والسكرتيرة قاعدين بيشفوفوا فيلم "صمت الحملان" بتاع انتوني هوبكينز (تقريباً دي البرامج التعليمية بتاعتهم).. السكرتيرة شافتي خارج، فقامت عشان تفتح لي باب الخروج..

- السكرتيرة (على وشها ابتسامة زي بتاعت هانيبال لكثر):
ألف سلامة عليك يا دكتور..

- أنا (هو اللي يعرفكوا يعرف سلامة): أنا بؤي واجعني
على فكرة..

لا يزال الضم... إحم.. الضم مستمرا

- الدكتور الصغيرة (شربت الصنعة والأذية من الدكتور الكبير): ما هي بتقول لك ألف سلامة..
- أنا (يا عبدة الاصنام يا قتلة الاطفال): انتوا ح تروحوا النار كلكوا..
- الدكتور (بتطلع حاجة من شنطتها زي الشنيور): وإحنا مالنا؟؟ إحنا جينا ناحيتك؟؟
- أنا (زقيت السكرتيرة عليها عشان تقع في حضنها وطلعت اجري): كلكوا متواطئين من أول البواب اللي تحت لحد زعيم المافيا اللي جوا..

#دكتور_السنان_مش_لازم_يعيش

#عايزين_نبدأ_حملة_لاستخدام_دكاترة_الأسنان

مكان_فيران_التجارب

#عدد_كبير_ومحدث_بيحبهم

#اليوم_العالمي_للسنات_المفترية



obeikandi.com

المشهد الرابع والعشرون

حدث بالفعل في الأجزخانة:

مشهد رقم واحد: ليل خارجي.. أنا سايق العربية، رايح اقبال دكتورة شيما زميلتي (شيما زميلتي صيدلانية وبتشتغل في إحدى الصيدليات الشهيرة).. الوقت كان اوائل شهر نوفمبر، فجأة وأنا سايق الشتا قرر إن الصيف كفاية عليه كدا.. الجو قلب من قمة الشمس والحر لضلمة وسيول كأن السما واخدة لازكس.. طبعا الطبيعي إن في جو زي دا عربيتي (اسمها عزيزة) تعطل.. تموت بالسكتة الموتورية.. لكن الحقيقة أنا كنت لسة موجب مع عزيزة أحسن واجب.. مغير لها طقم كهربيا وطقم مساعدين و 15 فلتر (موزعين في أماكن مختلفة) وزيت وسكر و 3 شرايين!! تقريبا بقت عربية تانية، فقدرت تستحمل الجو.. أصيلة يا زيزي..

الدنيا كانت عبارة عن سيول من فوق وطين من تحت وعربيات واقفة مابتتحركش في النص.. اللطيف في موضوع السوافة في المطرة دا إنك وانت سايق تحس إن مصر كلها سايقة معاك.. تحس إن النفر من دول خارج بعربيتين في وقت واحد!! تخلص من خازوق السوافة وتيجي تركز بقى، تكتشف إن مفيش

بني آدم خرج من بيته!! مفيش مكان تركن فيه عربيتك، ولا كوريك
عربيتك حتى!!

الجودا ماينفعش فيه عربيات أصلا.. دا محتاج فلوكة أو
جندول زي بتوع فينيسيا..



مشهد رقم اتنين؛ ليل داخلي.. أنا وصلت عند شيماء.. أول
ما دخلت من باب الأجزخانة، لقيت شيماء ماسكة امبول مية
بتكسره عشان تحلل بيه حقنة مضاد حلوي..

- أنا (داخل من الباب وأنا بامسح الشوز في الأرض عشان
الطين): نقلع الجزم قبل ما ندخل يا شوشو ولا إيه؟؟

- شيماء (كائن ملائكي): لأ.. إحنا ممكن نستحمل الوساخة،
لكن مانقدرش نستحمل ريحة شرابك!!

- أنا (بطريقة أخطر خطير في علم البوابير): إيه اللي
انتي بتعمليه دا يا ماما؟؟ بتكسري الامبول بإديكي عشان
يعورك؟؟

لا يزال الضم... إحم... الضم مستمرا

- شيماء (بتدي حقن من قبل ما أنا اتولد، ومش طالبة معاها فتاوي): اومال اعمل إيه؟؟
- أنا (اخذت منها الامبول عشان افهمها غلطها): تحطيه جوا ورقة السرنجة وتكسريه..
- وأنأ باعمل لها demonstration، دوست ع الامبول جامد فراح انفجر جوا الصيدلية في دايرة قطرها 3 كيلو.. لدرجة إن فيه 12 رف أدوية ادمروا تدمير تام، واتنين من زمائل شيماء مفقودين، والنيابة نزلت تعالين الموقع!!
- أنا (يادي الجرسة): هو الامبول دا كان لمادة TNT شديدة الانفجار ولا إيه؟!!
- شيماء (حزينة عليا وعلى بريستجها اللي أنا بعترته قدام الزباين): لأ، دا كان امبول مية .. هي كتابة القصص ح تتسيك الطب ولا إيه؟!
- زبونة واقفة (تقريبا جات فيها شظية بالغلط): إيه المعوقين اللي انتوا مشغلينهم دول يا دكتورة؟!

لا يزال الفش..... إحم.. الضرم مستمرا

#لقد تحولنا إلى جراج كبير

#sinking_in_the_rain

#عبوات ناسفة في علب الدوا

#دا مضاد للطائرات مش مضاد حيوي



المشهد الخامس والعشرون

حدث ذات مرة في الرعاية:

الزمان: مشهد ليل بهيم داخلي..

المكان: مستشفى (أم عطيات) الدولي..

عنوان المشهد: Once in the wild wild r3aya..

أنا كنت في أوضة الفيران المعروفة باسم سكن الأطباء مع زميلي دكتور عاطف طبيب الطوارئ، بناكل وجبة المستشفى المشبعة بالاميبا.. المستشفى كانت فصلت الطباخ من أسبوع، وكلفت السباك بمهمة الطبخ بجانب عمله الأصلي، لحين تعيين طباخ جديد.. طبعاً محدش بلغنا إنهم عينوا السباك مكان الطباخ، لكن أنا خمنت كدا لوحدي، لأن اللي في طبق السلطة دا مش ممكن يكون خيار أبدا!!

وأنا باكل لقيت ممرض الرعاية بيتصل بيا عشان ارواح اشوف حالة معروضة علينا من الطوارئ..

لا يزال الفشل..... إحم.. الضم مستمرا

نبذة مختصرة عن عم محروس (عشان الناس اللي ماقرتيش مغامراته السابقة): عم محروس مريض فشل كبدي مزمن.. دورة حياته بتتلخص في إنه بياكل في بيتهم زي التيرانووصور.. يدخل في غيبوبة كبدية.. يشرفنا.. نعالجه.. نكتب له خروج وإحنا بنودعه بالدموع بعد ما نحلفه برحمة خالته اللي ربته إنه يلتزم بالنظام الغذائي.. يخرج وسط وصلة من الشكر من ناحيته ومن العياط والبربرة من ناحيتنا، وبعد أسبوع يرجع لنا تاني!! لحد هنا عادي.. المشكلة بقى إن محروس ماكانش بس بياكل زي التيرانووصور، لأ دا حجمه وقوته البدنية كانت زيّه برضو.. لما بتحصل له الغيبوبة بيجيلنا في حالة هياج وعنف شديدة.. بيدور فينا الضرب ويبلّوش بإيده مطرح ما تيجي.. ولازم في الفترة اللي بينزل فيها بيته التاني (عندنا في الرعاية) يحصل في صفوفنا إصابات قاتلة.. بيستشهد منا واحد على الأقل كل مرة، لدرجة إن على مدار الشهور قوة العاملين بالرعاية خست النص من تحت راسه!!

أنا أول ما شفت محروس، نورت قدامي يافطة نيون مكتوب عليها انتقل إلى الأمجاد السماوية، وصورتي بشريطة سودا بالورب، مكتوب تحتيها مات مسفلتا.. في الفيمتوثانية اللي بعد كدا، كنت إديت محروس قفايا، وطلعت اجري ناحية باب الرعاية..

- حسين (مسكني من وسطي ورفعني من ع الأرض عشان ماجريش): رايح فين؟؟ واجه يا بتاع المواجهة..
- أنا (باحاول املص منه): رايح احصل فيلم الهروب الكبير من أوله..
- حسين (محبوب مني قبل كدا، لأنني دايمًا بازقه على محروس عشان الحق اجري): تلحق تشوفه ولا تمثله؟؟
- أنا (اكتشفت إن الهروب بالقوة مش نافع، فقررت الجأ للحيلة.. حجة تكون مقنعة ومبتكرة): طيب اروح الحمام!!
- حسين (شايلني لفوق وأنا بارفص في الهوا برجليا): مفيش حمامات، تعالي والبامبرز عليا..
- أنا (حد يتصل بماما عند الكوافير عشان تيجي تاخدي من هنا): مش عايز.. خليها بكرة طيب..
- حسين (لقى إن الذوق مش نافع، فبدأ يجرنني بالعافية ناحية العيان، وأنا شكلي عامل زي محمود عبد العزيز في فيلم إعدام ميت): مش عايز!! هو أنا باعزم عليك بسحلب؟! انت مش جيت؟؟ اللي يحضر القسمة ياخذ نصيبه..

لا يزال الفش..... إحم.. الضرم مستمرا

أنا لقيت مفيش فايدة من الهرب، فقررت اكشف على محروس بتقنية الاستشعار عن بعد.. سبت بيني وبينه مترين وحسين كان واقف مستخبي ورايا.. الحقيقة إن العيان المرة دي كان فايق.. ما عندوش حاجة تستاهل إنه يجي عندنا الرعاية..

- أنا (باحاول انقي كلامي، مع استخدام أكبر قدر ممكن من أدب القروء): سؤال يا عم محروس.. هو انت جاي ليه انهاردة؟؟ وارجوك ماتفهميش غلط.. انت طبعا مشرفنا.. دا فضول مش أكثر..

- محروس (مقتنع إن وجوده في الرعاية حق مكتسب حتى لو ما كنتش حالته تستاهل): بقى لي 3 أيام معملتش الثقيلة..

- أنا (لازم تيجي لحظة والشيطان يغلبني، وافقد التحكم في عضلة لساني): يا راجل يا هزؤ.. انت عندك دم انت؟؟!!!
(يا لهوتاااي.. إيه اللي أنا نيلته دا؟؟!!)

- محروس (واضح إن الإمساك مخلي روحه في مناخيره، فبدأ يزعق بصوت قوته 376576 ديسيبيل): انت بتستغظني ليه؟!

- أنا (انت العربي متضرر عندك ولا إيه!!): باستغظنك؟؟
معناها إيه الكلمة دي يا حسين؟؟
- حسين (قلب وشه في expression معناه اتمم الله يهدك):
مالها الكلمة؟؟
- أنا (سؤال وجيه على فكرة): ماعرفش بس شكلها
شتيمة ..
- محروس (حجمه عمال بيزيد كل شوية): أنا عايز الراجل
اللي في العيلة دي..
- أنا (دمي بقى بودرة من الخضة): الحق يا ض يا حسين
بيندهوا عليك .. هو الراجل دا اتجنن ولا إيه؟؟
- حسين (فشل في إنه ينفذ انسحاب مدروس، فبدأ يتراجع
في عشوائية): طبعا، ما انت عمال بتقل في أدبك من
الصبح ..
- أنا (بأبص له باندهاش): !!!!!!!
- حسين (وشه مدي تعبير "بص على قدك"): ايوة، انت
اللي غلطان..

obeikandi.com

المشهد السادس والعشرون

حدث بالفعل (مش قصة كوميدية المرة دي، بس حلوة قوي)؛

مشهد رقم واحد: نهار داخلي.. أنا في البيت باجهز عشان اسافر الزقازيق احضر محاضرات الدكتوراة، لقيت أختي بتجهز هي كمان عشان تروح الشغل!! مريان رايحة الشغل!!!! البت عيانة و ح تموت أكيد.. أنا كالعادة بابقى واخذ معايا كتاب اقراه، والمرة دي كان معايا رواية «الزانية» لباولو كويلو..

- مريان (شافت الرواية في ايدي، فقررت تطلع قرف صحيانها بدري عليا): بقالك سنة بتقرا الرواية دي.. هي الولية لسة ماتا بتش!!؟ مازهقتش من الخطيئة طيب!!؟ أنا طبعا لما باصحى الصبح مايببقاش فيا دماغ ارد، فسبت مريان تهاتي ونزلت..



مشهد رقم اثنين: نهار خارجي.. أنا ركبت الميكروباص من عبود لحد الموقف في الزقازيق، وبعدها اخدت ميكروباص ثاني للجامعة.. وأنا في الميكروباص الثاني اكتشفت إن محفظتي مش

معايا.. واضح إن النحس ساب بيت أهله وبقى عايش عندي
خلاص!!

أنا طبعا اتعكننت واتوترت جدا.. ح اروح الجامعة إزاي؟؟ طيب
ح ارجع مصر إزاي؟؟ أكيد مش ح اعرف اتحرك وغالبا ح اقعد
بصندوق تلميع أحذية في موقف الميكروباص.. ونور في دماغي
فيلم The Terminal لتوم هانكس لما فضل 30 سنة محبوس في
المطار مش عارف يسافر!!

اللي راكب جنبي لاحظ إنني متوتر وبادورع المحفظة.. سألني
فيه إيه، فحكيت له القصة.. الراجل طلع طيب قوي.. دفع لي
اجرة الميكروباص وطلع فلوس عشان يديها لي.. أنا رفضت أخذ
الفلوس وشكرته على أجرة الميكروباص اللي دفعها لي.. طبعا
أنا ماقدرتش ارفض إنه يدفع لي الميكروباص لأن السواق كان ح
يشبطني لو ماخذش فلوسه..

لما وصلت الجامعة دخلت حضرت المحاضرة.. أنا دخلت
في الضلعة لأنهم كانوا ابتدوا، ورُحت قاعد على اقرب كرسي..
أول ما قعدت حسيت إنني قعدت على حاجة.. أنا طبعا خمنت
إنها خازوق، بجملة اليوم الفانطاطيك اللي أنا باشوفه.. بس

لا يزال الفش..... إحمو.. الضرم مستمرا

الحقيقة إنه ماطلعش خازوق.. طلعت كباية شاي واحد حيوان سايبها ع الكرسي، وبنطلوني شربها بالهنا والشفاء.. أنا خرجت ورحت الحمام، شطفت الهدوم على قد ما قدرت.. لما خرجت من الحمام كان شكلي يفرح بصراحة.. أيقونة في الدهولة..

بالصدفة وأنا خارج من المحاضرة قابلت المشرف بتاعي ودي كانت أول مرة اتعرف عليه.. استاذي لاحظ إنني متضايق وسألني مالي، ولما عرف القصة عرض عليا إنه يوصلني أي حته.. أنا رفضت شاكرا، وطلبت منه يدلني على أقرب ATM..

أكد طبعا انتوا خمنتوا إنني لما رحمت المكنة لقيتها عطلانة!! الموضوع مش محتاج قوالة يعني.. النحس قرر يتجوزني تقريبا!!! صندوق البوية قادم لا محالة..

بعد تفكير، قررت اشرح القصة لأول سواق توك توك اتوسم في وشه الطيبة.. أنا بصيت في الوشوش ونقيت منهم صاحب أقل عدد من علامات المطاوي، وحكيت القصة (للمرة الثالثة) وأنا في نص هدومي.. أنا ماكنتش في نص هدومي.. أنا تقريبا كنت في جيب البنطلون من الإحراج..

الحقيقة الراجل طلع شهم جدا وقعد يسب التيت في الحرامية.. ولأني ماصدقت إنني صعبت عليه، مارضتش اصحح له معلومة إنني ماتسرقتش وغالبا المحفضة وقعت مني!! بعد اوبريت (سب التيت للراجل العفريت)، أداء الصوليست سواق التوك توك، الراجل وافق يوصلني لاقرب بنك.. إحنا وصلنا البنك والمفاجأة اللي زلزلت كياني إن المكنة طلعت شغالة..

أنا هنا قلقت ع النحس بتاعي وقررت اتصل اسأل عليه!! دا مهما كان عشرة برضو ياجماعة.. نحسي حبيبي راح فين؟؟!! يا ترى عيان.. تعبان.. انتحر أو اتفنى.. جاله عقد عمل في الكويت؟؟ المهم إنني سحبت الفلوس وركبت التوك توك تاني لحد موقف المكروباص، وأنا مش مصدق إن النحس نسيني.. أكيد ح يرجع في أي لحظة، وح يطلع سواق التوك توك خاطفني عشان الفلوس اللي سحبتها!! بس اللي حصل إن السواق فعلا وصلني الموقف، وكمان مكانش عايز ياخذ الفلوس..

قبل ما انزل سواق التوك توك قال لي: ماتزعلش ع الفلوس اللي راحت منك.. يمكن ربنا رزق حد عن طريقك.. يمكن اللي راحت له محتاجها أكثر منك.. اعتبرها زكا.. روح، ربنا يكفيك شر المستخبي..

لا يزال الفش..... إحو.. الضرر مستمرا

#الدنيا_لسة_بخير_بجد

#أنا_كنت_عامل_زي_شاعر_بربابة

#ماشي_احكي_في_قصة_ابو_زيد



obeikandi.com

المشهد السابع والعشرون

حدث بالفعل في العيادة:

الزمان: مشهد ليل داخلي..

المكان: مستوصف (قول للطبيب يا طبيب الجرح جرح

صعيب) التخصصي..

أنا كنت في العيادة.. وأنا قاعد، الباب اتفتح ودخلت منه

مدام آمال بكبوطة الممرضة..

نبذة مختصرة عن مدام آمال: آمال في المستشفى من قبل

ما المدير يتولد.. كانت بتشتغل إله الغضب عند الاغريق قبل

ما تستقيل عشان العقد مش عاجبها.. وزنها أكبر من وحدات

القياس المعروفة وبتاكل 3 دكاترة من عينتي بين الوجبات على

سبيل snacks..

- آمال (متقمصة شخصية اعصار كاترينا): إيه حكاية

القصص اللي انت بتكتبها وبتكلم فيها عني؟

- أنا (الله يرحمك يا شادي.. مالحقتش تتهنى): بوبي مين

اللي قال لك الكلام دا؟

- أمال (الشهيق بتاعها قرب يشفطني جواها): مندوبين شركات الأدوية هما قالوا لي..
- أنا (مش ح اكتب قرص دوا لأي شركة بعد كدا): المندوب اللي قال كدا يتمنع من دخول العيادة.. وأنا ح ابليح وزارة الصحة إن دواه بيعمل انهيار في هرمون الالينو (أي كلام على سبيل الغلوشة).. إحنا قاعدين هنا عشان الناس تطلع علينا اوشاعات ولا إيه؟؟
- أمال (واضح إن آخر دكتور اكلته مش مشبعها): يعني انت مش عامل كتاب بتتريق فيه عليا؟؟
- أنا (حاسس بإحساس المكرونة في الشوكة.. متاكل متاكل مفيش فصال): يا أمال أنا معصص وح اسد نفسك ع الفاضي.. روعي كلي دكتور إيهاب استشاري الصدرية.. طول بعرض بكرش وممكن تفضلي تاكلي فيه سنة قدام..
- أمال (بتشاور بصباها ناحيتي.. الجدير بالذكر إن صباها في حجم ورك بني آدم بالغ): الكتاب دا يجيني منه نسخة المرة الجاية..

لا يزال الفش..... إحم.. الضرم مستمرا

- أنا (ههههه.. دا أنا اسيب الشغل أحسن): لا يا آمال..
انتي قماصة وح تزعلي.. ولو على الزعل مش مهم، لكن
أنا مش مستغني عني!! وبعدين دول هما كلهم قصتين
تلاتة تسعة اللي بيحكوا عنك.. مش حاجة أبدا..
- آمال (خرجت مبرد من جيبها وبدأت تسن بيه سنانها
اللي قدام، وطلّعت صلاح نصر اللي جواها): وجاييها
بالخير ولا بالشر؟؟
- أنا (بقيت باكذب اكتر ما باقتفس): مين العبيط اللي
يستجرى يجيب سيرتك بشر.. انتي سيرتك فارضة
نفسها على اتخن تخين ياماً!!

#أنا مش ح اكتب أدوية تاني

#ح اعالج العيانين بالأعشاب



obeikandi.com

المشهد الثامن والعشرون

حدث بالفعل:

عنوان المشهد: يوم من عمري (دي عينة من يوم واحد بس)..

مشهد رقم واحد: نهار داخلي.. أنا رايح العيادة متأخر كالعادة، فقررت اضحي واركب تاكسي.. وإحنا عند قصر القبة الجمهوري كاوتش التاكسي ضرب بصوت عالي.. نزلت أنا والسواق نُبص ع الكاوتش لقيناه مفرقع.. ومش أي فورقية.. دا إحنا كأننا دوسنا على لغم.. طبعا قوة الحراسة اتلمت علينا وخصوصا إن الكاوتش فرقع قدام الكمين.. ع البخت أنا كنت مربي دقني وشكلي مدي على بتوع داعش فشخ..

— أمين الشرطة (بصة تحت شعار «الكل ح يتجز»): إيه اللي جرا؟؟

— أنا (انت البعيد عاجز في نضرك): سواق التاكسي مخبي قنابل في التابلوه يا باشا.. أنا ماليش دعوة.. أنا أصلا مابحيش التاكسيات.. كلهم ارهابيين سعادتك..



لا يزال الفش..... إحو.. الضرم مستمرا

- أنا (رافع إيدي بادعي ربنا): يا رب لو حصل حاجة خد مريان لوحدها..

- مريان (بتديني كباية الخروب اللي بتشربها): امسك يا حبيبي كباية الخروب.. عشان لو جرا لي حاجة تبقى تفكرني بالخير..

- أنا (أبو صليبة مفعوله سحر.. صحى ضمير البيت): هاتي.. اللي يجي منك..

- مريان (ابتسامة في لون صفار الجو): أنا ماتفتش فيها كثير..

- أنا (اعمعع): الله يقرفك..

ملحوظة على جنب: جاري العزيز اللي هريت دماغنا تخبيط وانت بتجدد في شقتك.. خمس سنين بتجدد في الشقة يا جاحد!!
دا لو برج كان زمانه خلص.. يا عيني ع الناس اللي صرفت وكلفت.. أهو لما عمارتنا تنهار، البذخ دا كله ح يروح ع الفاضي..
أنا كنت عارف إن ربنا مش ح يسيبك على فكرة!!

#رضينا بالتاكس والتاكس مش راضي بينا

#يوم لتشييف أوي

#النحس دا مالوش أهل يسألوا عليه؟؟



المشهد التاسع والعشرون

حدث بالفعل (18+.. ممنوع دخول الجنس الناعم قطعيا..

لقد اعذر من حذر):

الزمان: مشهد ليل داخلي.. وكان يوم خميس..

المكان: مستشفى (ما عاش ولا كان) التعليمي..

المناسبة: راوند الأطفال في سنة الامتياز..

سنة الامتياز الكيسة.. السنة اللي زي الأربع وسط الجمعة..

يوم التلات بتاع كاريرك الطبي.. سنة الرقص ع السلم.. انت

دكتور بس مش دكتور.. معاك شهادة بكالوريوس بس مش معاك

ترخيص مزاوله.. في الليلة المشؤمة دي أنا كنت نبطشي في قسم

الأطفال في المستشفى التعليمي.. وكان معايا في النبطشية دكتورة

ولاء نائب الأطفال..

نبذة مختصرة عن ولاء: الحقيقة ولاء ماينفعلش تتوصف

باختصار.. لكن على سبيل الإيجاز هي أبو الغضب بتاع مسلسل

مازنجر وفرام بتاع النينجا ترتلز.. هي حاصل ضرب ايفان

الرهيب قيصر روسيا ودون كورليونى زعيم المافيا.. ولاء كانت

بتشتغل أساسا في تجارة الرقيق.. ولما السُخرة اتلغت قررت إن الطب هو محطتها الجاية، اللي ح تحقق فيه طموحاتها بعد ما سبوبة بيع العبيد طارت من أيديها..

- ولاء (بتسأل السؤال الأزلي): مين ح ينزل يشتري الفياجرا انهاردة؟؟

نبذة عن الفياجرا واليوم الأسود اللي عرفناها فيه: الفياجرا بتستخدم أصلا لعلاج ارتفاع ضغط الشريان الرئوي مش لعلاج السيكوسيكو.. لكن لأن حياتنا عبارة عن سيكوسيكو كبير، فأى بني آدم رايح يشتري الدوا بيتلظ من غير ولا كلمة.. طبعا كلنا كنا صغيرين، ومحدث فينا يحب إنه يطلع عليه سُمعة إنه محتاج للعقار السحري دا.. وبالتالي كنا في النبطشية بنحاول نزلق شِرا الفياجرا على بعض.. وغالبا اللي كان بيلبسها هو هفأ النبطشية.. أي العبد لله..

- أنا (قُلت أما اجرّب التكنيك الشهير بتاع إدعاء البلاهة): مين؟؟ ها ه.. مين؟؟

- ولاء (طبعا هي مكانتش بتسأل.. اسئلة ولاء عبارة عن أوامر): ح تستهبل؟؟ النبطشية ما فيهاش غيري أنا وانت..

لا يزال الضم مستمرا

— أنا (قررت اجرب التكنيك الشهير اللي بعده): إديني إيدك..

— ولاء (بتديني إيدها): ليه؟؟

— أنا: ح ابوسها..

— ولاء (إديتي إيدها الثانية كمان): ح تبوسهم و ح تنزل برضو.. انزل ع السلم أحسن ما ازقلك من بير الاسانسير..

الجدير بالذكر إن اسانسير المستشفى مش موجود.. مش فاضل من غير البير بتاعه.. ولاء بقى قررت تستخدمه زي ملك اسبرطة في فيلم «300»، لما الملك كان عنده جب عميق بيرمي فيه أعداءه..

— أنا: هو مفيش غيري تستقفوه كل مرة؟؟

— ولاء: لاحظ إن ورقة تقييمك في إيدي.. ح اخليك تعيد الراوند وتتأخر 6 شهور عن دفعتك..

— أنا (لجأت للتكنيك اللي بعده.. تكنيك «الجلطة المفاجأة».. إنك تمثل إنك اتشليت وفقدت النطق): -----

لا يزال الضحك..... إحم.. الضم مستمر

- professional (بتنفض إيديها من حاجة مربية كانت بتعملها): أكيد خير.. الساعة اتنين الفجر يوم الخميس.. دي ساعة الخير كله..
- أنا (يا أرض انشقي وابلعيها.. وخدي ولاء في إيدك): فياجرا 50 مللي واتوصي..
- المساعدة (واضح إن أهالي المنطقة مش مديينها نفسها): ال50 خلصان.. مفيش غير 100 مللي.. عايز حاجة بتأخر؟؟
- أنا (كنت لسة ببراءة الأطفال ومش فاهم): لأ.. أنا متأخر أصلا..
- الولية: هاوأوأوأوأوأوووووووو..
- لسة كنت ح اسأل المخفية إيه اللي بيضحكها كدا، لقيت موبايلي بييرن.. بأبص لقيتها إله الافترا عند الفراعين.. ولاء..
- ولاء (شكلها استعوقتني على الرغم إنني لسة نازل): بقى لك ساعة تحت.. إيه؟؟ انت بتعمل الحاجة على إيدك؟؟ هببت إيه في اللي قُلت لك عليه؟؟

- أنا (كفاياكي ظلم بقى): مفيش فياجرا 50.. مفيش غير تركيز 100.. اجيب يا ولاء ولا نقضيهما كدا انهاردة؟؟
- ولاء (بتديني الأوامر في نفس الوقت اللي الست بتضحك لي فيه ضحكة تجنن): هات أي حاجة..
- المساعدة (نظرة بعنوان الست باين عليها شاطرة موت): اسمع كلام المدام..
- أنا (جرعة التلقيح المرة دي أكبر من قدرتي على البلع): دي مش المدام، دي مديرتي..
- المساعدة: وهي ادارجية بصراحة..
- أنا (بدأت انقل استفسارات ولاء للمساعدة): بتسألك الصنف كويس المرة دي؟؟
- المساعدة (عنوان الاحتراف في المنطقة): عيبيب.. أنا قليت معاك قبل كدا؟؟
- أنا (لسة بانقل كلام ولاء): اومال ماشغلتش المرة اللي فاتت ليه؟؟

لا يزال الضمير مستمرا

- المساعدة (بصّة تحت شعار «البلد دي مش ح تقوم لها قومة خلاص»): إيش عرفّ أمي؟؟ أنا ماكنتش نايمة وسطيكوا..
- أنا (مش ح اتهان لوحدي): طاب اولاء.. نيمي العيال، أنا جاي في الطريق..
- المساعدة (إن كان للخباثة عنوان فهي نظرات الست دي): ابقى ادعي لي..
- أنا (ليه، هو أنا بابا روما؟؟): اشمعني؟؟
- المساعدة (على وشها ابتسامة بتحمل عنوان الخدمة الممتازة): أصل الدعوة في الحالات دي بتبقى مستجابة!!

#منه لله اللي اخترع الدواء دا



obeikandi.com

المشهد الثالثون

حدث بالفعل في الريستوران:

الزمان: مشهد نهار داخلي، وكان آخر الشهر..

المكان: أحد المطاعم الشهيرة..

عنوان المشهد: لوسي ابن تانت فكيهة Vs البؤساء!!

الأبطال: صديقتي و بنت دفعتي ناتالي (دكتورة جلدية وأمراض

لا مؤاخذة)، نادر صاحبي الانتميم (دكتور قلب ورعاية مقندلة بنيلة

زيي)، والعبد لله..

المناسبة: شئ من الأنين إلى أيام الدراسة.. إيه أنين دي!!!

قصدي شئ من الفحيح إلى أيام الدراسة!!

قام بدور لوسي ابن تانت فكيهة: ناتالي بتاعت الجلدية..

قام بدور البؤساء: أنا ونادر..

المشهد كان كالتالي: أنا ونادر قاعدين في المطعم الفخم،

وشكلنا بسم الله ما شاء الله متسولين.. عاملين زي اليتيم على

مائدة اللئام.. نادر جاي لابس البنطلون اللي جايه من سوق

الكانتو، وأنا كنت لابس الجلابية بتاعت تيتة الله يرحمها!!

الجدير بالذكر إن نادر بطل حموم من ثاني شهر في الامتياز..
هو لقاها مش فارقة لأنه كل ما بيستحمى ربنا بيرزقه باللي
يرجع عليه أو يعمل عليه إى إى إى.. ومن رابع شهر بطل حتى يغسل
إيده.. لدرجة إنه لما بييجي ياكل بيمد بوزه في الطبق زي السلحفة،
لأنه لو مسك الأكل بإيديه أكيد ح يموت مسموم!!

أما ناتالي فاللهم لا اعتراض، على النقيض تماما.. ريحة
البيرفيوم بتاعها وصلت لنا في الكورية وهي لسة في فيلتهم في
التجمع الخامس.. ولما دخلت علينا كانت طلّتها عاملة زي ليدي
ماكبث.. النعمة والنصفة في أنقى صورها..

بعد تبادل عبارات المجاملة المعتادة، بدأنا نحكي عن الموضوع
المفضل في الظروف دي.. الشغل..

- ناتالي (بتحاول توصف لنا السحلة اللي هي مسحولاها):
الواحد ميت من التعب.. تخيلوا باضطر البس high
heels في رجليا طول النهار!! الأسوأ من كدا إن المانيكور
بتاعي اتقشر..

أنا هنا افكرت لوسي لما يوسف وهبي بيسأله انت بتشتغل
إيه؟ لوسي رد: لا يا اونكل.. أنا مش باشتغل.. بابا هو اللي
بيشتغل وأنا اللي باصرف..

لا يزال الضم مستمر

ولسة كنت ح افتح بؤي عشان اقرا لنا تالي كتالوج «كيف تروح لدكتور الجلدية»، راح نادر حط إيده على بؤي.. أنا كنت فاكراه بيعمل كدا عشان يمنعني من إني اغلط في البنت.. أتاريه بيعمل كدا عشان يغلط فيها بنفسه!!

- نادر (بيقرا لها كتالوج «كيف تشرح لدكتور الجلدية»):
تصدقني إن إحنا لابسين الكعب العالي برضو!! بس مش في رجلينا.. لابسينه لا مؤاخذة في عينا.. يا ولية هو مفيش دم خالص!!؟؟ اقسامي الشر وخلي يومك يعدي..

- أنا (باطبطب على نادر عشان اهديه): قصده اقصري الشر.. خليتي الراجل يخرج عن شعوره..

المهم إن ناتالي قررت (تقسم الشر) فعلا وقامت راحت الحمام.. بعد شوية رجعت من الحمام وهي منهارة في العياط..

- أنا (هو إيه اللي حصل في الحمام بالضبط؟؟ التحرش وصل هنا كمان؟؟ حتى الأماكن النظيفة يا جدعان): دا أنا ح اخرب بيتهم.. هاتوا لي المدير؟؟ مين عمل فيكي إيه يا ماما؟؟

- ناتالي (مصدرة لنا وش المواطن المثهان، اللي حقوقه مهدورة في بلده يا عيني): تخيلوا مفيش hand wash gel في التواليت..
- أنا (مبّلت على نادر وباوشوشه في الخباثة): يطلع إيه دا؟؟ اسم جديد للسيفون؟؟
- نادر (جينياف الشلة من يومه.. رعايات مصر خدت منه راقات ومش بيتهت بسهولة): يا ض ماتفضحناش بجهلك.. ترجم الكلام.. بتقول لك هاند.. أكيد حاجة بيغسلوا بيها الإيدين..
- أنا (ياااه.. هاند!! فين أيام كتاب ..welcome to English العلام حلويا ولاد): دا زي البيتادين بتاع التعقيم؟؟
- نادر (بيحاول يتوّه عشان مايشتمتش البنت فينا): حاجة زي كدا.. بالمناسبة انتوا عندكوا بيتادين في المستشفى؟؟
- أنا (فعلا الغباوة ليها ناسها، وانت ناسها): في مستشفى أم عطيات؟؟ عيب يا بني.. ولا بيتادين ولا حتى مية في الحنفية.. بدمتك انت بتغسل إيدك بعد ما تدخل الحمام؟؟

لا يزال الفش..... إحم.. الضرم مستمرا

- نادر (رائد من رواد حركة القذارة للجميع): ولا باتشطف أصلا.. باخرج زي ما أنا!!
- أنا (قمت اخدته بالحضن وأنا في قمة الفخر): مدرسة في العفانة يا حبيبي (طبعاً أنا اخدته بالحضن وأنا باحاول ابعده عن إيده، لأنها لو لمستني أكيد ح تولّع في هدومي من المجاري اللي ملياها)!!
- وإحنا بنتكلم تليفون ناتالي رن.. هي قعدت ترد على المتصل ردود من نوعية «اللّٰه يبارك فيك.. متشكرة خالص»..
- أنا (موجها كلامي لناتالي بعد ما خلصت المكالمة): مبروك يا عروسة.. ربنا يتمم بخير..
- ناتالي (عادت لتتقم): دا مديري.. بيهنيني عشان دخّلت 200 ألف جنيه للمستشفى الشهر اللي فات.. عشان تعرف دكاترة الجلدية بيكسبوا قد إيه!!
- أنا (غلبانة أوي البيت دي.. فاكرة الـ200 ألف دول فلوس): هاوو.. أنا جبت للمستشفى بتاعتي مليون جنيه في شهر.. بس في صورة قضايا وتعويضات مرفوعة عليها.. دا غير قضيتين النفقة وإثبات النسب اللي مرفوعين عليا أنا شخصيا!!

- ناتالي (بتقدم الحلقة رقم اثنين من مسلسل الإهانات والتلقيح بالكلام): الحساب عندي يا شباب.. أنا عارفة إننا آخر الشهر..
- أنا (ليبييه خارجة مع نانسي ١١٩٩): الكلام دا مايتقاليش.. المرة الجاية تيجي شايلة كفنك ومعاكى كبير عيلتكوا.. دا إن كان فيها كبير..
- نادر (اخذته العزة بالاثم هو الثاني): مايفرقش معايا الكلام دا.. آخر الشهر عندي زي أوله.. بيت الغول مايخلاش من العضام..
- أنا (إيه المثل دا؟؟ انت كل حاجتك معفنة حتى أمثالك؟؟): هات يا بنى الفاتورة دي..
- أنا مسكت الفاتورة وفتحتها وبصيت على المبلغ المطلوب.. لأول وهلة افكرتها نمرة تليفون المطعم.. ما هو دا مش ممكن يكون الحساب أبدا.. دي حاجة محتاجة مواطن مرتبه فى مستوى دخل تاجر سلاح، أو مدير البنك الدولي، أو.. أو..... أو دكتور جلدية (ورُحِت باصص لِناتالي بصة كلها سكس)..

لا يزال الفش..... إحمو.. الضرم مستمرا

- أنا (عامل زي كلب بلدي من بتاع الشوارع، مش فاضل غير إنني اهز ديلي): ناتو.. طبعا إحنا اخوات من أيام الكلية.. والشقيق وقت الضيق يا بيبي.. انتي عارفة إننا في آخر الشهر والعشرة جنيه بتيجي تحل أزمة..

- نادر (عامل نفسه مش من هنا.. عامل نفسه من هناك.. ومش أي هناك.. دا هناك البعبيبيد أوي.. وبعدين بدأ يتحول لنعجة): يا حنينة (وراح باصص لاناتالي بصة كلها سكس هو الثاني)..

- ناتالي (طلعت رزمة بألف جنيه ورمتها ع التراييزة على سبيل اهدار آخر اتين سنتي في كرامتنا أنا ونادر): شيك أوي الجلايية دي يا شادي.. صوف العسكري دي يا بيبي؟؟

#عرفتي صوف العسكري!!!

#شتمت بالبلدي بنت سلطح بابا

#بمناسبة بابا أجي اقابل بابا إمتي؟



obeikandi.com

المشهد الحادي والثلاثون

حدث بالفعل في البيت:

الزمان: مشهد ليل داخلي..

المكان: Home Sweet Home ..

أنا في البيت وأختي مريان قاعدة على كتا في بقى لها أسبوع..
أختي خلصت فترة النيابة في المستشفى التعليمي وخذت إفراج بعد
تلاتربع المدة.. بس مش لحسن السير والسلوك.. لكن الحكومة
قررت إنه كفاية خسائر لحد كدا، فاختصرت لمريان سنة من
فترة النيابة في محاولة لإنقاذ ما يمكن إنقاذه من تحت إيديها..
طبعا النتيجة كانت إن الحكومة نفذت من مريان ولبسناها إحنا
في البيت..

- أنا (بانببط على مريان يمكن تحس على دمها وتتزل تدور
لها على شغلانة): الإيد البطالة نجسة..

- مريان (واضح إن الشيطان اللي هي مخاويها بعافية
اليومين دول.. البت بقى لها أسبوع مش عارفة ترتكب
أي جريمة ودا عامل لها اكتئاب): ما هو أنا لما جربت

النجاسة لقيتها مش بطالة بصراحة.. باقول لك إيه، أنا
ح اروح الـ White Friday بكرة..

— أنا (يا حليلة.. ياما انت كريم يا رب): فين المكان دا؟
(يا رب يطلع في النوبة)..

— مريان (واضح إن لبسها عفريت من الاتحاد الأوربي): الـ
White Friday دا مش مكان يا مفرج الناس عليا.. دا
اوказيون بيتعمل بعد الـ Thanks giving..

— أنا (وايت فرايداي وثانكس جيفينج!! رمضان بطيخة بقى
مون امور): ثانكس جيفينج إيه؟! أنا ماعرفش غير ثانك
يو فيري تاتش.. الله يرحم جدك، مات في الغربية عشان
ماعرفش يقول I am hungry.. وبعدين ما تروحي، أنا
مالي؟؟

— مريان (بتبتدي خناقة جديدة ودا المطلع): أصلي بافكر
أخذ العربية..

نبذة مختصرة عن عربيتنا عزيزة: فيه حاجات ماتعرفش
الآباء بيسييوها للأبناء على سبيل الميراث ولأ على سبيل الضرب
ع القفا.. عزيزة دي إحنا ورثناها عن المرحوم بابا.. اللي ادعى

لا يزال الفش..... إحمو.. الضرر مستمرا

إنه ورثها عن المرحوم جدو.. طبعاً أبويا كان بيشتغلنا.. هو أكيد لقاها في بعثة أثرية من بتوعه، وخط فيها كل خبرته في تزييف الأثار عشان يقنع الناس إن النملية دي عربية بجد!! يعود تاريخ سيارتنا لمحاولات الخواجة جيمس واط الأولى لاختراع المحرك البخاري.. بقى لي عشر سنين نفسي اخلص منها مش عارف.. آخر محاولة لبيعها جابت لي 300 جنيه، ولما قلت للمشتري إني لسة مغير لها البطارية لوحدها بـ 300 جنيه، قال لي: ما أنا ح أخذ البطارية وارمي الباقي!!

الجدير بالذكر إن سواقتها في صعوبة اشعال شمعة في قاع المحيط، وبتطوي على مخاطر جسيمة للي سايقها واللي راكبها والناس اللي في الشارع.. لدرجة إن شركات التأمين منزلة منشور بتحذر فيه من عمل أي بوليصة تأمين على أسرتنا الكريمة، لأنها صفقة خسرانة خسرانة..

- أنا (لولولولوي.. ح اخلص من مريان والعربية في يوم واحد): يا سلام.. روعي يا ماما.. ابقى سيبي موبايلك الجديد في البيت.. خسارة يتعور في الحادث الأليم..

لا يزال الفش..... إحر.. الضرم مستمرا

#قال وايت فرايداي قال

#فرايداي أسود على دماغك انتي وعزيزة



المشهد الثاني والثلاثون

حدث بالفعل في المترو:

الزمان: مشهد نهار خارجي ..

المكان: محطة مترو الشهدا ..

عنوان المشهد: 300 اسبرطي (اللي بيلبسوا سليات بس

دول) ..

الأبطال: أنا، وصديقي نادر (انتوا عارفينه من قبل كدا).

قام بدور الـ 300 اسبرطي: أنا ..

قام بدور السليات: صاحبي نادر!!

أنا ونادر كنا رايعين رمسيس عشان نخلص مشوار مهم،

فقررنا ناخذ أسهل وأسرع وأسلم وسيلة مواصلات في الدنيا ..

مترو الانفاق!!

بس!!

أنا كنت كلمتكوا قبل كدا عن محطة الشهدا من وجهة نظر
اللي بيحاول يركب المترو، وإن المحطة سموها كدا لأن اللي بيركب
منها بيعتبر مشروع شهيد.. انهارده ح اكلمكوا عنها من وجهة نظر
اللي بيحاول ينزل من المترو..

محطة رمسيس عبارة عن مليطة.. مليطة خام.. المليطة
في انقى صورها، قبل ما الدنيا تبتهت عليها وتختلط بشئ من
الحضارة..

عشان تتخيل الوضع لازم تكون سُفت فيلم 300.. انت ممكن
خيالك المريض يخليك تقتنع إن جيش اسبرطة المكوّن من 300
هلفوت لابسين كلوات، قدر يتصدى لجيش امبراطورية فارس
المكوّن من مليون حلوف مدرّعين مع زُربيح من الأفيال والتماسيح
وحيوانات سيد قشطة.. لكن كونك تتصور إنك ح تعرف تنزل من
المترو في محطة الشهدا، يبقى انت أكيد بتحلم.. ابقى غطيها
كويس وانت نايم.. أنا اقصد رجلك!!

المترو وصل المحطة وإحنا بدأنا في تقييم الوضع.. حاولنا
نعرف كمية البشر اللي واقفين ع الرصيف واللي مطلوب منا
نواجههم وإحنا نازلين.. يا ترى خيراتنا المأخوذة من فيلم 300 ح
تفنعنا في معركة النزول، ولأ جيش فارس ح يعمل معنا المظبوطة..

- أنا (لقيت نادر بيطلع موبايله من جيبه بعد ما خبط
الراجل اللي لازق جنبه بالكوع في صداغه): بتتيل إيه
ياض.. دا وقته؟؟ الباب ح يفتح..

- نادر (بيعيط زي بنت مراهقة لسة مفركشة مع صاحبها):
الووووو.. ماما؟؟ ح توحشيني اماما.. أنا بمووووت.. الواد
شادي هو اللي قتلني..

- أنا (باضرب نادر على قفاه): بتسلمني ياض.. عايز
عيلتك تتقم مني؟؟ انت فاكر إني ح يتبقى مني حاجة
أصلا؟؟ ما كلها ثانية و ح نبقى مسحوق زي الدقيق أنا
وانت..

في اللحظة اللي بعد كدا باب العربية اتفتح وجيوش فارس
بقيادة اكسركسيس هاجمت المترو وسط محاولات دفاعية
مستميتة من المصريين الغلابى سكان العربية الأصليين.. لكن
للأسف تسليحنا كان أضعف منهم بكثير.. والمعركة انتهت بالعلم
الفارسي مرفوع ع العربية وأنا ونادر مغمى علينا..

بعد شوية بدأنا نفوق، لقينا إن ولاد الحلال رامينا تحت
شباك التذاكر وإحنا متفككين من بعض زي الميكانو..

لا يزال الفش..... إحم.. الضرم مستمرا

- أنا (باحاول اعيد تجميع أجزاءي بطريقة صحيحة.. إيه اللي مخرّج رجلي من كم القميص!؟): ألا قول لي يا نادر؟؟ شكلي لسة عليه القيمة ولأ متهدل قوي؟؟
- نادر (بعد ما قعد يتأمل في شكلي شوية وهو بينفكر): شكلك كومبليزون رسمي.. من المقوّر دا.. أردأ أنواع اللانجيري.. وأنا إيه أخباري؟؟
- أنا (قررت اطمنه إنه زي الفل): تمام.. شبه الفوطة الزفرة بتاعت سايس الجراج..

#محطة رمسيس تضرب من جديد

#كويس إن الفرس رفعوا العلم مارفعوناش إحنا



obeikandi.com

المشهد الثالث والثلاثون

حدث بالفعل:

مشهد رقم واحد: نهار داخلي.. أنا سمعت إن ريهام صديقتي تعبانة فقررت اعمل حركة شهامة واعدّي عليها في شغلها عشان اطمئن عليها.. الجدير بالذكر إن ريهام بتشتغل HR قد الدنيا في شركة من بتوع تسفير العمالة للخليج..

أكد انتوا خمنتوا إن موضوع الشهامة دا بلح.. أنا طبعا كنت رايح لها عشان عايزها في مصلحة!! حايح عليها إنها تشوف لي شغلانة في الكويت.. ريهام هي أملي الوحيد في إنني اسافر قبل ما اموت من الجوع.. بالمناسبة هي برضو كانت فاهمة إن الزيارة دي مش لوجه الله.. لأنني بقى لي 13 سنة ماتصلتش بيها ولا حتى إديتها ميسد كول في عيد أو شم نسيم..

أول ما وصلت سألت واحد ماعرفوش واقف بعيد عن دايرة المكاتب عن الأنسة ريهام.. تطلع مين في الهوانم المرصصين دول؟؟

- أنا (كأني كنت بايت معاها وأنا مش فاكر شكلها أصلا):
سلامتك يا ريري.. انشالله البوبي الوحش..

لا يزال الفش..... إحم.. الضرم مستمرا

- ريهام (قررت تحسني قد إيه أنا تافه): أنا ح اروح لصاحبي الصيدلي.. شاطر موت.. مرة دخلت عنده الصيدلية لقيته بيعمل عملية اللوز لزبونة.. بيشبقرنى بخمسة جنيه طول الشتا.. مالوش في هري الدكاترة.. بلا تحاليل بلا بتاع..
- أنا (أنا عارف دكتور أبو اليزيد الصيدلي صاحبها وعارف صيدليته.. تقرف تعمل فيها ببي مش تعمل فيها عملية): طيب حتى اعلمي صورة دم.. تحليل بول..
- ريهام (امها اخدت اسبيرين وهي حامل فيها.. البت مخها بعافية): يا سافل يا زبالة..
- أنا (إحنا مش ح نخلص كلام في الموبايل بقى!!؟): هو اللي معاكي ع التليفون بيبوسك ولا إيه؟؟
- ريهام (لسة مصرة إن الكلام ليا): اتكسف اعمل التحليل..
- أنا (بأبص حواليا يمكن الاقي حد عاقل اشهدّه عليها): انتي ح تدي له العينة يحللها، مش ح تعملها قدامه!!
- ريهام (واقعة على دماغها): أنا ح اروح اعمل ساندوتش جبنة يمكن انسى..

- أنا (أهو الادمان دا اللي موديكي في داهية): روعي بس
مش لازم نسكر.. كفاية ساندوتش واحد.. ممكن طبق
شربة كوارع معاكي؟؟
- ريهام (انتهت المقابلة بإنها قامت من ورا المكتب وراحت
عشان تعمل الساندوتش): دي تسببها ليلية فرحك..
عشان بدل ماتدخل دنيا، تدخل مستشفى الشبراويشي
لعلاج السموم..



- مشهد رقم اثنين: نهار داخلي.. ثاني يوم.. أنا قاعد في العيادة
لقيت ريهام بتتصل بيا..
- أنا (ههههه.. انتي شرفتي؟؟ تعالي عند عمو): صباح
الخير اريري.. أخبارك إيه؟؟
- ريهام (مش مجمعة حرفين على بعض وصوتها زي ما
تكون بتفوق من البنج): الحقنيييييي.. من ساعت ما
اخذت البلايغ بتاعت دكتور أبو اليزيد وأنا فرطت مني
ع الآخر.. شايفة عروسة شايلة عيل على كتفها وساحبة
التاني في ايدها.. وشايفة حاجات بتطير ادكتور..

لا يزال الفش..... إحم.. الضرم مستمرا

- أنا (اه يا عيل يا كذا .. دلوقت بقيت دكتور): طيب اعلمي التحليل بقى..
- ريهام (بتفوق على سيرة التحليل): مش ح اعمل الزفت.. مفيش تحليل ومفيش سفر.. الكويت بطلت تطلب دكاترة.. عندنا في الشركة عايزين office boy .. تيجي؟؟
- أنا (والله ورخصتي يا ملوخية ودورتني ع البيبان): أنا عارفها الاغنية دي.. "خسيس قال للأصيل تعالى عندنا خدام" بتاعت شفيق جلال..

#بخاخة__مخلة__بالشرف

#يا__رب__الصيدلي__يجيب__أجلك



obeikandi.com

المشهد الرابع والثلاثون

حدث بالفعل في كذا حتى:

عنوان المشهد: Frozen..

مشهد رقم واحد: ليل متجمد داخلي..

المكان: عيادة رقم واحد..

الشتا دخل فجأة.. مفيش استئذان ولا تخبيط ع البيبان..
على الحجار كان بيخدعنا طول السنين دي.. «لما الشتا يدق
البيبان» طلعت اكدوبة.. الشتا بيدخل دخلة بوليس الأداب.. الشتا
خبطته هي دخلته..

أنا وصلت العيادة لقيت مافيهاش زباين.. ولا زوزو من أي
نوع.. تقريبا الحكومة عملت قرار يحظر تداولهم في الاسواق.. أو
فيه قانون نزل بيمنع العيا.. أو إن العيانيين عاملين بيات شتوي
زي البطاريق.. غالبا المواطن من دول بيفضلّ الدفا حتى لوح
يموت عن إنه ينزل يكشف في السقعة.. طيب دا الشتا لسة في
اوله يا جدعان؟! بالطريقة دي على بال آخر الشتا ح اكون مُت
م الجوع.. عموما مفيش مشاكل.. مش لازم اشتغل دكتور يعني..

الشغل كثير.. أنا لسة امبارح رامي الـ CV بتاعي عند أبو طارق
بتاع الكشري..



مشهد رقم اتنين؛ ليل متجمد داخلي، بعد المشهد السابق
بساعة..

المكان؛ عيادة رقم اتنين..

أنا خلصت أول عيادة وطلعت ع العيادة اللي وراها.. طبعا كلمة
خلصت دي مصطلح غير دقيق، لأن العيادة مكانش فيها غيري أنا
وبيض البطاريق.. ايون.. حتى البطاريق هجّت من السقعة وسابت
لي بيضها في العيادة.. يعني لفظ «خلصت العيادة» دا المقصود
منه إنني يادوبك رحّت لمست الأمة وطلعت اجري..

لما وصلت العيادة الثانية لقيتها ولا سوق عكاظ!!! زحمة على
بعض، والعيانين كلهم شيك أوي.. رجالة لابسين بدل وبنات وستات
لابسين تايورات فورمال، وقاعدين متستفين جنب بعضهم..

- أنا (موجها كلامي لمدام آمال الممرضة): أنا باحلم ولاّ
بدأت اهلوس من السقعة يا آمال؟؟ هو بيير كاردان قرر

لا يزال الضم..... إحم.. الضم مستمرا

يعمل الديفيلية بتاعه هنا في العيادة؟؟ إيه العيانيين الشيك
دول؟؟

- آمال (بتبّلّني الحبوب اللي باخدها لما بتحصل لي
التهيوّات): عيانيين مين بلا وكسة؟؟ دول مندوبين شركات
الأدوية!!

#اشمعى أنا نزلت في السقعة

#طيب تعالى وأنا ح اديف لك السماعه

#تحب اكشف عليك من فوق الكالسون؟؟

#حد يشوف لنا عقد عمل في الكاميرون أو

أي حته دفا



مشهد رقم ثلاثه: ليل متجمد داخلي، بعد المشهد السابق
بساعة..

المكان: رعاية مستشفى (أم عطيات) الدولي..

أنا خلصت ع المندوبين في العيادة الثانية بعد ما حكمت ع الواحد منهم إني عشان اقبله لازم يقطع كشف، لأنني ما عنديش استعداد استحمل الصداع دا بلوشي!! أنا دكتور مشغول ومش لاقى حاجة اعملها ووقتي بفلوس..

بعد كدا طلعت ع المستشفى الحكومي اللي أنا شغال فيه عشان عندي نبطشية.. هناك جه في دماغي سؤال جوهرى: هو أنا إزاي المفروض أفضل عايش بعد ما مصر كلها قعدت تكح في وشي.. ربع سكان الكوكيب جم المستشفى ومش بتحلالهم التفافة غير عليا.. حتى ابن الممرضة اللي حرارته 57 وعنده اللوز وبيموت، أول ما شافني صحي وقال: أمّو أضي (عمو شادي)، وجري ناحيتي وباسني في بؤي..

الجو هنا لتشيف أوي.. أنا باكشف ع العيانيين وأنا لابس البطانية على كتافى على طريقة الباطو بتاع دراكيولا.. إيدي باسخنها ع البابور ربع ساعة قبل كل حالة عشان تفك واعرف استخدمها..

الرعاية فيها غزو من طيور البطريق، بيجوا يعملوا البيات الشتوي عندنا.. أتاري إن العيانيين والبطاريق اللي طفشوا من العيادة جم ورايا في المستشفى الميري!! تحس برضك إن البطريق من دول عنده أصل.. مابتهونش عليه العشرة..

لا يزال الضم... إحمر.. الضم مستمرا

أما الاطفال الصغنين فكانوا بيغرفوا من التلج اللي مغطي الأرضية وبيعملوا منه تماثيل زي (اولاف) بتاع فيلم Frozen .. أنا كالعادة كنت بقرا كتاب عشان اسلي نفسي في النبطشية، والمرة دي كنت جايب معايا رواية اسمها (التربي).. طبعا لما بيستدعوني عشان اشوف حالة، أنا كنت بانزل والرواية في أيدي .. مش عشان الرواية حلوة لدرجة إنني مش قادر اسيبها، لكن لأن صوابعي متجمدة ع الرواية ومش عارف اخرجها من أيدي .. شكل العيان من دول وأنا داخل عليه بالرواية في أيدي ماينفesch يتوصف .. دا لازم يتصور ويتعمل فقرة لوحدها في برنامج مواقف وطرائف .. بس الرواية خدمتي كثير بصراحة، لأن معظم العيانيين لما شافوها كانوا بيطلعوا يجروا .. أنا ح أخذ الرواية دي معايا صيف شتا!!

#دا جو تقابلي بيه ربنا يا حكومة؟؟

#حتى البطاريق سابت لي البيض ارقد عليه

وطفشت



obeikandi.com

المشهد الخامس والثلاثون

حدث بالفعل في الرعاية:

الزمان: ليل داخلي، إحدى النبطشيات الأحيه..

المكان: مستشفى (عم عبده الفرارجي)..

عنوان المشهد: النبطشية تعرف أكثر..

مشهد رقم واحد: أنا قاعد في الرعاية بتاعت إحدى المستشفيات الحكومية.. ربنا خد من المستشفيات الخاصة وحط في مستشفى اعتماد الدادة.. لو عدد العيانيين اللي بييجي لي في الحكومة بييجي لي رُبعه في العيادات الخاصة، أنا كنت بقيت قارون عصري.. كان زمني مشتري شقة في امريكا والثانية في استراليا وفاتحهم على بعض.. كان عندي امبراطورية من الشمس للشمس.. وبامتلك ألف من الإماء كل واحدة عايشة في قصر.. ومزرعة باندا وتلاجة بييسي بتاعتي لوحدي!!

النبطشية تحولت لوحش مفترس بيتغذى على كائن اسمه الدكتور.. النبطشية عارفة إمتى انت مرهق.. إمتى بتبقى مش في الموود.. إمتى عينك ح تبتدي تغفل في الفجرية عشان تروح

ظرفاك 15 عيان في (لا مؤاخذة) العضل على غفلة.. مش فاضل غير إن قناة ناشيونال جيوجرافيك تعمل حلقة عن النبطشية وتصورها وهي بتمشى في الشمس.. وهي نائمة.. وهي بتتجوز.. وهي عاملة كمين لفرائسها من الأطباء.. وعشان الملحمة تكمل دعاء الممرضة كانت جايبه ابنها حمادة..

انتوا طبعا عارفين حمادة.. اللي نسيه ممكن يراجع ثاني قصة.. الخازوق المرة دي إن دعاء جايبه حمادة ومعاه أخوه الصغير طاطا، ودا النسخة المصغرة من جولدا مائير.. أنا أول مرة اشوف حد عنده القدرة على التواجد في خمس أماكن في نفس الوقت.. قاعد في حجري وواقف على خرطوم الاوكسجين بتاع العيان.. دافس راسه في سلة النفايات الطبية وفي قاعدة الكابينية وفي التلاجة بتاعت أكياس الدم (تقريبا بيشره).. الجدير بالذكر إن أختي هي اللي مولدة الواد دا كمان.. حمادة وأخوه معصمين زي إبرة التريكو.. طبعا من كتر الهري اللي بيهروه..

باختصار جوز الاوغاد دول قلبوا الرعاية جبالية نسانيس.. أكلوا شباشب العيانيين وأقراص الضغط وضربوا علبة مورفين في الوريد.. كإجراء وقائي أنا لبست البدلة المدرعة الحديد.. طبعا منظري بقى زي فرسان المعبد بتوع فيلم Kingdom of Heaven..

لا يزال الفش..... إحم.. الضرم مستمرا

بس شكلي مكانش هاممني قد ما أنا مهتم إنني احتفظ بأطرا في
كلها سليمة لحد ما دعاء تسلم النبطشية وتاخذ فرقة الـ777 اللي
مخلفاها وتعلن الجلاء عن الرعاية..

أخيرا المفاوضات نجحت وجيش الاحتلال وافق إنه يسبنا
نرفع علمنا على الرعاية قصاد ما ندفع لهم الإتاوة أول كل
شهر!! وإمعانا في إظهار حسن النوايا، دعاء قالت لابنها يجي
يعتذر لي قبل ما يمشي..

- أنا (شفت مجرم الحرب جاي عليا فقفلت وش الخوذة
الحديد): مش عايز.. أنا كويس..
- حمادة (وصل عندي وبدأ يعضعض في الجوانتي الحديد
بتاع البدلة): متأسف يا طنط!!
- أنا (سييني اعبيبييش): مع السلامة يا روح تانت..



مشهد رقم اثنين: دعاء وجوز الزواحف بتوعها رُوّحوا، وأنا
اترميت على سرير رقم خمسة في حالة إعياء شديدة.. بعد شوية
طلّعت كام صباع شوكلاتة وقعدت اقزقز فيهم.. الشوكلاتة كانت

من نوع (ميرسي) جابتها لي واحدة صاحبتني.. وأنا رايح الشغل
اخذت من اللعبة كام صباع عشان أكلهم في النبطشية وسبت باقي
اللعبة ع المكتب.. وأنا باكل لقيت أختي مريان بتتصل..

- أنا (يلاً.. خليها تكمل): أوَمري.. طلباتك..
- مريان (داخلة دخلت اللي عايزة طلب): أوَشا حبيبي.. دا
أنا بجبك أوي.. مالك يا روجي؟؟
- أنا (بحاول احسسها بالذنب): العيال اللي انتي مخلفاهم..
قصدي مولداهم طلعوا ميتيني..
- مريان (تجاهلت اللي قلته ودخلت في الموضوع): انت بتاكل
إيه؟؟ من الشوكولاتة الشيك اللي على مكتبك؟؟
- أنا (بقرقش البندق بصوت عالي): ماتمديش إيدك
عليها.. دي هدية من واحد صاحبي..
- مريان (عارفة معظم فضايحي وبتعرف تخمن الباقي):
صديقة سنغافورية؟؟
- أنا (يادي الصراصير اللي ملت الدنيا.. ولا نافع فيها
عجينة ولا بيروسول): اتمسي..

- مريان (الشیطان اللی كانت مخاویاه اعتزل.. قاعد فی بیتهم بیکتب مذكراته ومعلق لمريان صورة فی الصالون مکتوب تحتیها "ست الكل"): عندك اختیار من اتین و ح تعملهم هما الاتین..
- أنا (هو تعریف كلمة اختیار اختلف عن زمان ولاّ إیه؟): إیه بقى؟
- مريان (بتملی علیا شروط وثیقة الاستسلام): أولا: أنا اشتريت جزمة جدیدة.. انت ح تتقمص شخصیة بابا نویل و ح تحط لی هدیة فی الجزمة لیلة کریسماس، وأنا ح اعمل نفسی مش واخدة بالی.. ثانیا: أنا ح أخذ علبة الشوکولاتة..
- أنا (انتی زیك المفروض یحقنوه هوا): خدی العلبة.. وافتحی درج المکتب ح تلاقی 200 جنیه قسط الجمعیة خدیهم.. بناقص الباطو اللی كنت ح اجیبه.. حتی الشتا حر السنة دی..
- مريان (قلعت وش المفتری ولبست الوش الحونین تانی): میرسی یا أوشو.. انحرف براحتک یا حیبی.. دا أنا افرح لك..

لا يزال الفش..... إحم.. الضرم مستمرا

— أنا (هي الرشوة مفعولها سحر للدرجة دي!!): اه يا دونكي
يا مانكي..

— مريان (قلعت وش الحونين ولبست وش العلم والإيمان):
ماتسبش الدين عشان ربنا مايسخطكش..

— أنا (بالبس تههم وأنا قاعد): مين دا؟؟

— مريان (عاملة زي عيال دعاء.. معصصة بس الجحود
بعينه): انت.. بتقول لي يا حمارة يا قردة.. هو انت من
بتوع نظرية النتوء العشوائي؟؟

— أنا (دارون لو كان سمعك كان سرح ببيانولا أكرم له):
ابعدي عن المجال الجوي لدماعي الساعة دي يا مريان..

#مفيش بوكس يلمكوا انتوا التلاتة؟؟

#مفيش ثورة تشيلكوا طيب؟؟

#آن الأوان ترحلي يا دولة العصا عيص



obeikandi.com

المشهد السادس والثلاثون

حدث بالفعل في العيادة (18+ .. ممنوع الدخول
لغير العاملين بالدكانة.. إحم.. قصدي ممنوع دخول
البنات قطعيا):

الزمان: مشهد ليل داخلي..

المكان: مستشفى (الدعارة) الدولي..

عنوان المشهد: ذئاب لاتأكل اللحم..

مشهد رقم واحد: أنا داخل من الريسبيشن بتاع المستشفى
الخاص.. صنف العيانيين لسة بعافية.. شاح من السوق بشدة..
واضح إن شحنة العيانيين لسة ممسوكة في المينا، مستتية الإفراج
الجمركي..

- أنا (موجها الحديث لفؤاد موظف الريسبيشن): فيه

حالات يا فؤاد ولأ الف وارجع مطرح ما جيت؟؟

- فؤاد (متحزم وبيرقص!): لولولولولولولولوييي.. عندك

حالتين.. فيه اتنين ستات مستتيينك فوق.. أي خدمة يا

دكتور..

- أنا (أخيرا الحظ ابتسم لي): يا فوففا يا وش الخير كله..
- فؤاد (جايب دي جي وفرقة مهرجانات شعبية ويضرق شربات احتفالا بالمناسبة الشريفة دي): بس مش عايز اقول لك.. الاتنين مكتوب على وشهم ابحث مع الحكومة..
- أنا (اه يا حظي الكلب): عيب كدا يا فؤاد.. إحنا من إمتى بنحكم ع الناس بمناظرهم؟؟



- مشهد رقم اتنين: أنا طلعت العيادة عشان اشوف الحالتين.. دخلت أوضة الكشف ودخلت ورايا أول عيانة..
- أنا (هاين عليا ابوس العيانة من السعادة، لولاش إن لوايح نقابة الأطباء بتمنع دا): مساء الخير يا فندم.. اتشرف بالاسم..
- العيانة (الحقيقة إن شكلها فعلا مش مريح.. بس ولا كلمة.. دي أول كائن من بني الإنسان يدخل العيادة من شتويتين فاتوا): اسمي جيري.. عندي 19 سنة..

لا يزال الضم... إحمر.. الضم مستمرا

- أنا (ساعتاشرب بس!! الست شكلها ولبسها زي الأرملة
السوداء.. ثلاثين سنة بالمرتاج): يا ترى حضرتك
بتدخني؟؟
- جيри (مش طالبة معاها قلبة دماغ، فقررت تلخص بدل
كثرة الاسئلة): ايوة.. سجاير وشيشة وحشيش.. وباشرب
خمور كمان..
- أنا (طيب اصبري لما اضغط عليكى الأول!! اجرجرك
في الكلام شوية): مش لسة بدري ع الكلام دا يا أنسة
جيري؟؟
- جيري (بتصحح لي معلومي حيوية غايبة عنى): مدام
جيري..
- أنا (يخرب بيت سداجتي.. عبيط، معلش): Sure.. ويا
ترى حضرتك بتشتغلي إيه؟؟
- جيري (بصت لي بنظرة تحدي في عيني.. البصة خرمتني
وعدت مني خرمت الحيطه اللي ورايا): ما قلت لك
مدام..

لا يزال الفش..... إحم.. الضرم مستمرا

- أنا (طالبة معايا اخسر كل اللي اعرفهم): طيب طير يا حمادة دلوقت..
- فؤاد (لذاذة أهله مالهاش حل): مش ح اعرف.. جناحي بيتصلح..
- أنا (الحيوان دا خلى فرصتي في إنجاب الأطفال زيرو): أهو عسل أمك دا اللي مضيعنا..
- فؤاد (حائز على جائزة الدولة التقديرية لأوسخ رباية): طظ.. ما إحنا بنضيع بقى لنا سنة.. مفيش زباين بيعتباوا المخروبة.. لما ربنا ح يفرجها ح نتطط؟؟
- أنا (لما ربنا يفرجها!! فؤاد صانع الأوثان الأول عرف ربنا!!): ونعم بالله يا شيشب..



مشهد رقم ثلاثة: جيري خرجت ودخلت في قفاها العيانة رقم اتين.. (التحذير بتاع 18+ وكدزا لا يزال ساريا.. أنا مش محتاج احذر تاني)..

العيانة رقم اتين كان مطلوب لها أشعة ايكوع القلب.. بعد التعارف والذي منه، قمنا عشان اعمل لها الأشعة..

لا يزال الفش..... إحو.. الضرر مستمرا

- آمال (بتمصص بشفايفها): على إيه؟؟ هو أنا اتبرعت لك بنص مرتبي؟؟!
- العيانة (بتكلمني وأنا باكتب لها التقرير): عندي حاجة يا دكتور؟؟
- أنا (باختصر في الكلام عشان اقلل الحالة من غير فضايح): عندك حاجة بسيطة اسمها ارتخاء في الصمام الميترالي..
- العيانة (مصممة تعرفني اللي مش عايز اعرفه): دا أيمن جوزي هو اللي عنده ارتخاء..
- أنا (قاذورات تلوح في الأفق): طمنيه إنها حاجة بسيطة..
- العيانة (مش ح تهبط خلاص): ما هو ما عندوش ارتخاء في الصمام.. عنده ارتخاء في حاجات تانية!!
- أنا (اسكتي بقى الله لا يسيئك.. انتي ما عندكيش اخوات عيال ولا إيه؟؟): بس
- العيانة (ح تكمل الحديث الشيق للأخر.. مهما كانت التوسلات): اوعى تقول لي كل مشكلة ليها حل.. دا مش

محوّق فيه حاجة.. ولا نافع فيه حلول ولا محلول.. بقى
بياخد قرص فياجرا عشان يعمل ببى من غير ما يفرق
الجزمة!!!!

- أنا (ايههههه "دا أنا باشهق" .. دا انتشي معبية يا بنتشي):
ربنا يصبرك على ما بلاكي يا مدام!!!!
- العيانة (واضح إنها من تلامذة است فتحية): وانت؟؟ إزي
صحتك؟؟

هنا ايقنت إن الفضيحة اصبحت مكتملة الأركان.. واتخيلت
صورتى في الجرايد بشریطة سودا على عنيا في صفحة الحوادث،
وفوقها مانشيت من نوعية "القبض على طبيب منزوع الضمير..
أو منزوع الملابس أو الدسم.. منزوع كل حاجة ينفع تتزع"..
رُحت في أبو بلاش يا شادي.. ما هو يا إما است فتحية
فتحت فرع لبيت الدعارة عندي في العيادة، يا إما الديلفري بتاعها
بدأ يلوش.. بيودّي الطلبات في أي حته..

- أنا (باتصل بآمال للمرة الخمسين انهاردة): الووووه..
الحقينا يا حكومة.. ما قلّت لك اترزعي هنا يا آمال
الزفت..

لا يزال الفش..... إحمو.. الضرم مستمرا

- آمال: طرااخ (هي ماقلتش طرااخ.. دا كان صوت السماعه اللي رزعتها في وشي)..
- أنا (قُلت اتصل بالنجس اللي قاعد تحت في شباك التذاكر): أنا اتجرت.. حكايتي ح تكون موأل.. ح تتغنى في الموالد زي حدوته الشاطر حسن يا واطي..
- فؤاد (زي ما يكون مستني اللحظة دي من زمان): يلاً بركة.. تستاهل..
- أنا (اه يا ابن الشمّاتة): انت يا مغفل ما عندكش تمييز؟؟ مش تنقي الزباين؟؟
- فؤاد (قاصد يربيني): انت مش لسة قايل مايصحش نحكم ع الناس بمناظرهم؟؟
- أنا (انت ابتكار ياض.. المفروض اللي طلعتك بالأخلاق دي ياخذ فيك براءة اختراع): وهو يعني انت بتسمع كل حاجة باقولها لك؟؟ استرها معايا يا رب..
- فؤاد (علة عايشة معانا في المستشفى): وربنا ح يسترها معاك ليه؟؟ إديني أمانة.. دا انت معملتش حاجة عدلة في حياتك..

أنا لقيت إن الحوار مع فؤاد مفيش منه رجا.. الواد مش
بيحس ولا بيشوف.. حاسة الشم انتهت.. ومراكز السمع حصلت
ما سبق.. مش فاضل في مخه غير مركز الإحساس بالبانجو..
فرحت قافل السكة في وشه، وقررت اجيب من الآخر واتصل
بالشخص الوحيد اللي ممكن يفيدني في الموقف دا.. مدام فتحية
بذات نفسيتها..

- أنا (here ends my career.. ومش أي end.. لأ، دا end
بفضيحة): الووووه.. مدام فتحية هانم.. يعني شرف
المنطقة اللي في الوحل.. ينفع كدا يا papy؟؟ العيال بتوعك
مقصرين في الدعاية بصراحة.. زباينك كلهم نقلوا العطا
على عندي..

#يا فضيحتشiiiiii

#أنا اتسألت على صحتي كثير انهاردة!!



المشهد السابع والثلاثون

حدث بالفعل في العيادة:

الزمان: مشهد ليل قطبي داخلي..

المكان: عيادة إحدى المستشفيات الخاصة..

عنوان المشهد: -Frère Jacques, Frère Jacques, Dormez-

vous?? (طبعا العنوان مالوش أي علاقة بالقصة، بس دي الجملة الوحيدة اللي فاكرها في فرنساوي)..

أنا قاعد في العيادة.. العيادة بتتّش وأنا باتجمد من البرد.. ولأول مرة من سنين كنت لابس البالطو فوق الهدوم.. مش التزاما بزى المستشفى ولا حفاظا على مظهر الطبيب (معاذ الله)، لكن على سبيل مكافحة التجمد.. أنا كنت لابس بتدفي بيه.. خرجته من الخزين وريحة النفثالين المعتقة في جيوبه قتلت العتة لخمس سنين قدام.. أنا كنت لابس البالطو ومش فارق معايا حاجة.. شعور بالقوة كنت نسيته من زمان.. لابس البالطو خلاني حاسس إنني super hero من بتوع DC comics لابس الزي بتاعه.. شبه سوبرمان وباتمان، ما عدا إنني كنت لابس (لا مؤاخذة) الحاجات تحت الهدوم..

لا يزال الضحك..... إحم.. الضم مستمر

— فؤاد (واضح إن لسة عنده مفاجآت سارة تاني): لأ وإيه،
مش من افريقيا.. المرة دي من الجزائر!!

— أنا (هي الجزائر عزلت من ورايا ولأ إيه!؟): إحنا يعني ح
ننقي يا فوففا؟؟ هو إحنا لاقين؟؟

— فؤاد (مايقدرش يكمل عدل للأخر.. بينهار بسرعة):
بس مش بتتكلم غير فرنساوي.. هااا.. فاكراه ولأ إيه؟؟

طبعا أنا مش مش فاكراه فرنساوي.. أنا مش فاكراه أي حاجة
في أي مادة درستها في المدرسة.. أنا مش فاكراه إذا كنت دخلت
مدارس من أصله.. الزهايمر خلى مخي زي السوفنجة.. من
يومين أمي سلمت عليا وأنا نازل الشغل معرفتهاش.. قلت لها
اعتبري نفسك في بيتك يا حاجة، ماما على وصول.. لما باشتري
حاجة من البقال وأدي له الفلوس، باخد الباقي وانسى البضاعة..
ومناخيرني لولاش إنها لازقة في وشي كان زمني نسيته هي كمان..
ناهيك عن إن فوففا أصلا حمار.. مايعرفش فرنساوي
شكله إيه.. يعني غالبا الست مش جزائرية ودا مش فرنساوي..
الست من السبتية ودا عربي بلهجة بورسعيد..

- أنا (فاكر إيه بس يا مخبّل؟؟ اشوف فيك يوم يا بعيد): روح
يا بني ربنا يرزقك.. المسا اللي بتمسيه علينا بيبقى مسا
أبيض.. أنا مش فاكر من الفرنساوي غير verb etre ..

- فؤاد (قرر ينصحني بدل مايسيبيني اغرق): ماتعرفش
سيستم لبّس وكبّس؟؟ دا نظام عالمي متعارف عليه..
يعني تخبّط أي حاجة.. لوّش كلمتين انجليزي على شوية
مشاورة واتعامل..

- أنا (يلاً يا عيل يا عيان.. سقمتنا بأمرضك دي): غور
ينعل

أنا كنت لسة ح اضرف فؤاد كوكتيل شتايم +21 لما باب العيادة
اتفتح ودخلت منه واحدة.. بس مش أي واحدة.. كانت حلم..
بصيص أمل.. شعاع نور.. حنة من تورتة.. لأ حنة من الجنة..
هما الجزائريين حلوين كدا ولأ الهندسة الوراثية ماخلتش حد
نفسه في حاجة؟؟

أنا طلّعت الماچ الكبير وقمت من ورا المكتب عشان املاه من
مكنة الجيلاتي اللي قدامي.. مكنتش شايف إنسان.. كنت شايف
سراب ييلمع.. أنا عارف إنني ح افضل امشي وراكي زي المتبنج
ولما اوصل عندك ح الاقي نفسي غرقان في بحر الرمال المتحركة..

- أنا (في دماغي افكار كلها حرام): إديث بياف..
- العيانة (واضح إنها ضعيفة في فرنساوي): Piaff??
- أنا (هو بابي شقط مامي من حلواني تسيباس؟؟ رف الكريم كراميل؟؟): ايوة.. la vie en rose .. انتي فاكرة نفسك تشتغليني؟؟ أنا اجيشيان دوكتيور.. دا أنا اسرح بيلدك..
- العيانة (مصممة تكمل بغبغة مهما كانت التحديات):
بغبغبغبغبغ.. قلبي pas natural يا دكتور..
- أنا (إيه اللسان السوّ دا!؟): وليه الشتيمة بالأم يا لوزة؟؟
أنا غلطت في أمك دلوقت!؟
- العيانة (شايفة جهل اللي قدامها وبرضو مش بتتعظ.. مصممة تنهزأ): أم!؟! باقول لك بغبغبغبغبغبغ..
- أنا (مش ح اسكت ع الإهانات اكر من كدا): أهو انتي بقى.. طالما الاحترام مش نافع..
- العيانة (حست إنني استكفيت من فرنساوي فقلبت على إذاعة شرق الدلتا): مالك قفشت ليه يا دكتور!؟!

لا يزال الفش..... إحم.. الضرم مستمرا

- أنا (يحيححج.. الرحمة.. شئ من التقدير للضعف
الإنساني): انتي محدش يقدر يقفش قصادك.. الجبال
نفسها تتهار.. الجليد يدوب.. والأسد يقلب يبقى كلبة..
قصدي قطة!!

#حد يتصل بمعامل أنيس عبيد

#ممکن عضه؟؟



obeikandi.com

المشهد الثامن والثلاثون

حدث بالفعل في الرعاية:

الزمان: مشهد ليل داخلي..

المكان: مستشفى (الخوازيق) العام..

المناسبة: إحدى النبطشيات شديدة الطعامة..

الحدث: حالة وفاة.. عادي.. دا مش خبر.. دا حوار بيحصل كثير.. الراجل كان محجوز عندنا من قبل ما أنا اتولد.. من قبل إنشاء المستشفى نفسها.. لدرجة إن المرحوم ليه وحدة باسمه في السومانيل اللي أنا شغال فيه.. خرّج أجيال من الأطباء.. التمريض بيعتبروه باباهم وعيال المرضى بيعتبروه جدّو.. يلعبوا معاه ويباخذوا منه العيدية في العيد.. كون إن الراجل ينقى نبطشيتي أنا بالذات عشان يموت فيها، فدا النحس المعتاد.. وإني يكون عندي التهاب شديد في أوتار إيدي ومحاولة إنعاش الراجل تخلص على بقيتي.. مش قصة.. الشغلانة كدا ولازم نستحملها..

الجديد بقى هو اللي جاي..

أنا لأول مرة في حياتي لما الممرضة قالت (arrest) اطلع اجري حاي في.. حاي في على بلاط مستشفى ملئ بكل خيرات الدنيا من ميكروبات وسنون سرنجات وبقع دم وتفافة..

الحقيقة إن أنا وطاقم التمريض اللي معايا عملنا اللي علينا وزيادة مع الراجل، لكن مفيش نصيب..

بعد ما خلصنا شغل، واحدة من التمريض (بنوتة جديدة من الفرافير اللي بيتغدوا شيبسي) اغمن عليها جنب المتوفي.. أنا اقترحت عليهم إننا نطلعهم في عربية واحدة، طالما البنت كانت روحها فيه للدرجة دي، لكن زمايل الممرضة رفضوا وقرروا يفوقوا زميلتهم.. البنت فاقت وأول ما فاقت قعدت على جنب وهات يا عياط..

أنا دخلت مكتبي عشان اخلص ورق المتوفي، وخرجت وإذ افاجأ بأمين شرطة بيحوم حوالين الجثة!!

- أنا (معقول.. أهل المرحوم بلّغوا الحكومة!! دا أنا مابلغتهم مش هما نفسهم بالخبر): اقدر اساعدك في حاجة يا كابتن؟؟

- الأمين (شاب وواضح إنه معدوم الخبرة وبيتكلم بلهجة ريفية): انت الدكتور اللي مباشر الحالة؟؟

لا يزال الضم... إحمر.. الضم مستمرا

- أنا (انت اهبل يا بني!! أصلا الصرح العظيم دا كله مافيهوش دكاترة الساعة دي غيري): ايوة..

- الأمين (صمت الحملان): -----

- أنا (يا مرارااااي): طيب سلام..

- الأمين (نظرة بعنوان والنبي يا عمو هما اللي قالوا لي أجي هنا): أنا كنت جاي اسأل إن كانت وفاة المريض طبيعية؟؟

- أنا (دا واضح إنني ح ابتدي معاك المنهج من أوله): نعم يا بابا!! فيه حاجة اسمها كدا؟؟ انت تقصد مثلا إذا كانت فيه شبهة جنائية؟؟

- الأمين (بيتعلق بقشاية): ايواااه.. أنا اقصد كدا..

- أنا (الولد صعب عليا فمدت إيدي ناحيته عشان امسكه من كتفه): اتفضل نتكلم في المكتب..

هنا الراجل عمل آخر حاجة كنت اتوقعها.. رجع خطوتين لورا لحد ما لزق في الحيطه وهو ببص لي بصة بعنوان «انتوا قتلتموا الفقيد وعايزين تنتقموا مني».. فأنا رُحِت مِدِّي له بصة

بعنوان «انت معملتش حاجة عشان ننتقم منك.. إحنا بننتقم من اللي بيزعلنا بس»..

- أنا (ما تشف كدا اومال): خلاص، بلاش نروح المكتب..
عموما الراجل مفيش في وفاته أي شبهة جنائية.. دا
محجوز عندنا من قبل ما يخرعوا الجنايات أساسا..
أحفاد أحفاده اللي اتحجزوا هنا ماتوا من سنين..

- الأمين (بيشاورع الممرضة اللي بتعيط): ولما هو كدا،
الأنسة اللي قاعدة في الزننورة بتبكي ليه؟؟!!

- أنا (لاااااا.. أنا ماروحش في داهية في راجل زي دا..
ذكاءك دا وفره لمناسبة تانية): دي هواية عندها.. مزاج..
كيفها تعيط في الزننورة بعد حالات الوفاة، زي ما انت
بتعيط في الحمام كدا.. قومي يا زفتة وشيلي وش الشعور
بالذنب دا من عليكى.. ح تسجنينا..

#أنا إزاي ماتحبستش لحد دلوقتي!!

#دي في حد ذاتها معجزة



المشهد التاسع والثلاثون

حدث بالفعل في البيت:

الزمان: مشهد ليل داخلي وكان آخر شهر وأخر السنة في ذات نفسية الوقت..

المكان: منزلنا العامر..

عنوان المشهد: عفن الخبز..

أبطال المشهد: أنا وانتمي نادر..

قام بدور العفن: نادر المعفن.. بالنوسبة للخبز، مش لاقين حد يقوم بدوره.. إحنا خلاص مش لاقين العيش الحاف..

المناسبة: مفيش مناسبة.. نادر اتلكك بأي كلام فارغ عشان يجي يزورني وأمي تعشيه!! بيرد لي الزيارة.. أنا كنت عندهم من أسبوع لنفس السبب!!

أنا ونادر كنا قاعدين في بيتي بنتفرج على فيلم home alone لراس السنة الـ15 على التوالي.. الجو تلج.. السما مش بتمطر.. دي بتدلق.. درجة الحرارة كانت تحت.. تحت خالص.. السقعة

جمدت الدم في العروق.. جمدت الأفكار في العقول والنوايا في الصدور.. الزمن نفسه واقف مايمشيش.. لدرجة إننا كنا مولعين بابور تحت المواسير عشان نعرف نلاقي سرسوب مية نشربه..

-أنا (عارف إنني مش محتاج اقول له، لكن باقول له على سبيل الواجب): بُص يا نيلة.. اعتبر نفسك في بيتك.. أنا ح ادخل استحمى في عشر دقائق.. لو مديت بوزك في الأكل قبل ما اطلع ح اقطع هولك..

للمرة الثانية أنا كنت باقول الكلام دا على سبيل الواجب.. نادر ماينفمش معاه التحذيرات الشفوية.. دا لازم يتكلم بكمامة حديد على بؤه على طريقة هانيبال ليكتر أو الكلب البوليسي اللي في سيتي ستارز..

وطبعاً هو مش ح يستنى الأكل يخلص، هو already ناوي ياكله ني.. إحنا كنا بنحاول نخوفه إن الأكل الني ح يعمل له ديدان في بطنه، بس دي نصيحة فكسانة بالنسبة لواحد عايش مع الديدان طول عمره.. بيعتبرهم أهله وعلى وشك إنه يتجوز واحدة منهم.. أملنا الوحيد إنه ياكل الطبخ وماياكولناش إحنا.. عموما، كإجراء وقائي، إحنا قفلنا التلاجة بالجنزير وحفرنا خندق حوالين المطبخ ومليناها تماسيح!!

لا يزال الفش..... إحمو.. الضرم مستمرا

- نادر (كأنني لسعته بالشمعة في التوتة بتاعته): لبيبييه؟؟
ليه حموم؟؟ مش خايف تتبري.. طيب مش شايف
السقعة..

الجدير بالذكر إن نادر بيكره الحموم كراهية التحريم.. وعلى
طريقة اللي يحبنا مايضربش نار، اللي يحب نادر مايجلوش سيرة
الاستحمام.. القذارة اللي فيه built in.. مولود بيها.. موهبة نمأها
بمجهوده على مدار السنين لحد ما اتقنها وبعدين بقى يدي فيها
دروس.. دا في فصل الصيف.. في الشتا بقى مايبهوبش ناحية المية
أصلا، ولا حتى عشان يشرب.. جسمه بيصنّع المية اللي محتاجها
عن طريق التمثيل الضوئي زي الحشائش الضارة..

- أنا (عمّال كل شوية ارش على نادر خليط من الكلونيا
والكلوركس عشان مانموتش مخنوقين من ريحته): اومال
اعمل إيه؟؟

- نادر (فجأة نقحت عليه روح الصداقة.. بس مش أي
صداقة.. صداقة المحاريم.. المحرومين من كل شئ): هو
حمام ليلة العيد وحمام ليلة الدُّخلة.. وبين اليومين غيار
ع الناشف.. دراي كلين!! إنما اللي انت بتقوله دا كفر..

المشهد الرابعون

يحدث باستمرار:

مشهد متكرر داخلي..

الزمان: حسب الظروف.. صباح.. ظهر.. فجر.. ليل..

المكان: زربيح الأماكن اللي باشتغل فيهم..

عنوان المشهد: ادعي عليك بإيه..

المناسبة: الدعاء يا جماعة.. تقريبا كل عيان داخل لي
بيهدني واحد.. طبعا الزملا كلهم عارفين ومجربين إن العيان أو
أهله يدعوا عليك، سواء في السر أو بصوت عالي.. دي القاعدة،
لكن دائما فيه استثناءات.. يعني كل كام قرن كدا بيظهر واحد..
إنسان عادي.. بدل ما يدعي ع اللي جابوك، بيدعي لك.. يدعي
لك بجد.. الدكاترة بقوا بيكملوا باقي أتعابهم دعوات زي ما
بيكملوا عشايم نوم..

لحد هنا كويس.. دعوة كدا تخرج من القلب وربنا يجعلها
من نصيبك.. المشكلة إن الدعاء أول ما بيطلع من القلب من هنا
بيروح طالع أوت من هناك..

والمواقف الجايّة دي على سبيل المثال:

- زيون رقم واحد (مستكيف من الخدمة المقدمة بطريقة فوق الفضيعة): يا رب اشوفك دكتور قد الدنيا!!
- أنا (يا أستاذ لمبييي.. دي شهادة وفاة بابا): أمين يا رب.. على فكرة فيه يافطة برّا مكتوب عليها «دكتور» شادي خيري..



- زبونة رقم اتنين (اديتها علاج وربنا وفقها وخفّت على غير عادة زباني): يا رب اشوفك زي دكتور مجدي أيوب!!
- أنا (يا رب اشوفك انتي زيه يا بعيدة): دي قريبة «يا صبر أيوب»؟؟



- زبونة رقم ثلاثة (دخلت لقتني متدغدغ بعد حادث أليم كان حصل لي.. لابس رقبة ومجّس رجلي): يا رب يا بني ما تشوف المرض أبدا..

لا يزال الفش..... إحم.. الضرر مستمرا

- أنا (يا إما الست اتعمت، يا إما فاكراني لابس الحاجات دي على سبيل accessories): ما أنا شفته خلاص يا حاجة.. ممكن تدعي لي ربنا يشفيني.. ح يكون أوقع..



- زيون رقم اربعة (دا بقى تقليدي جدا): إن شاء الله السنة الجاية نكون فرحانين بقى..

- أنا (فاهمك بس مش ح اريحك برضو): هو أنا اللي مانع عنك الفرحة يعني؟؟

- العيان (مصمم يفهمني وجهة نظرة): قصدي نكون فرحانين بيك..

- أنا (ما أنا فرحان بنفسي already): ما تفرح يا عمو مستتي إيه؟؟ دا حتى مصر بتفرح..



- زبونة رقم خمسة (جاية تعمل أشعة لبتها.. البنت طلعت سليمة، ف وهما خارجين قررروا إن): لولولولولويييي!!

— مواطن قاعد في الريسبشن (لذيذ وقرر يشاركنا في لذادة
اللي خلفوه): ألف مبروك.. هي المدام حامل؟؟



— زيون رقم ستة (طلع بالصدفة إنه ابن الظريفة اللي كان
قاعد براً بيترياً): طمني ع الاشعة اتكتور..
— أنا (اللذوذ بيلاقي اللي ألد منه): مبروك.. ح تبقى ماما..



المشهد الحادي والاربعون

حدث بالفعل في الرعاية (+18):

الزمان: مشهد فجر داخلي..

المكان: معهد بحوث الجليد (مستشفى «الموت علينا حق»

سابقا)..

عناوين الأخبار: نبطشية فقرية ساعت فجرية..

والأن إليكم تفاصيل النشرة: أنا نبطشي في الرعاية وانهارده

معاد الزيارة الأسبوعية لسيرك دي سولي (cirque du soleil)

الشهير.. الناس كالعاده ماقصروش معنا.. قدموا لنا كل الفقرات

اللي بنحبها من أول المشي ع الحبل لحد الراجل اللي بيطلع أراب

من ودانه.. الحالات كانت من كل شكل ونوع.. جلطات في القلب

والمخ مع شقلة من الذبحات الصدرية.. وأخيرا ختمت بحالتين

وفاة..

إنما اللي وكس النبطشية بزيادة هي موجة التلج اللي بتمر

بيها البلاد.. القطب الشمالي كان نازل يزور القطب الجنوبي وفي

الطريق قرر يريح عندنا شوية.. إحنا اخدنا كل اجراءات مكافحة

التجمد.. حتى خشب دولاب العهدة ولعنا فيه.. دخول الحمام في حد ذاته كان مغامرة محفوفة بالمخاطر.. المريض اللي بيفلت من تصلب الشرايين كانت بتقتله الشطافة.. الشطافة موتت نُص العيانيين بقضمة الصقيع.. العيان اللي بيستخدمها كانت بتحصل له غرغرينة في البوبو، لدرجة إن إدارة المستشفى كانت ح تتهور وتشتري لنا سخان.. بس بعد كدا لقوا الأوفر إنهم يعلقوا يافطة في الحمام مرسوم عليها صورة الشطافة جنبها علامة (غلط) وصورة لعبة واييس وجنبها علامة (صح)..

أخيرا السيرك خلّص البروجرام بتاعه ولم الخيمة ورحل.. وأنا قمت أنام شوية لحد ما الحفلة السوارية تبتدي.. ولسة عيني ح تغمض لقيت الممرض بيطلبني عشان فيه حالة معروضة علينا..

نبذة مختصرة عن الممرض؛ الممرض اسمه سيد، وشهرته (سيد عصفورة).. سيد دا أكلب شخصية في التاريخ.. بوبي بديل طويل.. شغال بعد الظهر تمرجي في عيادة مدير المستشفى بيوصل له الأخبار صابح بصباح عشان كدا سمّوه سيد عصفورة.. ومن منطلق شغله كتمرجي وعصفورة عند المدير، سيد بيتعامل مع الدكاترة بالأطاة لها ما بيررها الحقيقة..

لا يزال الضم مستمر

أنا قمت من نوم عميق مدته 17 ثانية.. المشكلة إن تركيزي ما قامش معايا.. بعد 13 سنة شغل اكتشف إنه كبير ولازم يستريح.. سابني اقوم اشوف الحالة وكملّ هو نوم.. أنا دخلت الرعاية عشان اشوف العيان لقيت حاجة في حجم حاملة الطائرات USS Interprise نائمة على سرير الكشف..

— أنا (موجهها الكلام للعيان): يسعد صباحكوا يا جماعة..
اتشرف بالاسم..

— العيان (ارتباك وروح دعابة مش مناسبين لواحد التعب منزله في الفجر): أنا واحد بس يا دكتور.. اسمي عمك شفيق..

— أنا (عمي؟؟ وواحد بس؟؟ طب إزاي!!!): عندك اخوات؟؟

— العيان (مش فاهم إيه علاقة السؤال بالموضوع): لأ..

— أنا (السؤال فعلا مالوش مناسبة غير إنني باكلم الراجل وأنا بانام على روعي): أكبر منك ولأ أصغر؟!!

— العيان (بيبص للممرض يمكن يلحقه بدكتور غيري):
باقول لك ما عنديش اخوات يا بيه..

- أنا (قايم جسمي مكسر من كتر النوم.. 17 ثانية مش قليلين): بتاخذ أي أدوية بانتظام؟؟
- العيان (بعد ما قعد ساعة يفكر الدوا اللي المفروض إنه ماشي عليه طول عمره): نتروماك وابلاتين وكركور..
- ملحوظة على جنب: العيانيين بتوعنا هوايتهم المفضلة هي انتهاك حرمة الأدوية.. الدوا من دول يفضل بكرامته واحترامه طول ما هو عايش برآ.. أول ما يقل عقله وينزل بلدنا بنهتر قيمة وكرامة اللي جابوه.. من أول تخزينه واستخدامه وانتهاء باسمه.. على سبيل المثال "ابلاتين" و"كركور" هي الاسماء الرسمية لـ "ليبانثيل" والـ "كونكور" في مصر..
- أنا (تركيزي الواطي مش قادر يكمل معايا النبطشية): بتاخذهم قبل ولآ بعد النوم؟؟
- العيان (لسة يببص للممرض): قبل ولآ بعد النوم إزاي؟؟..
- أنا (الممرض مش ح ينفحك.. دا نافع نفسه بالعافية): ماتغيرش الموضوع باقول لك.. مشرفنا ليه الساعة دي يا معدوم الضمير؟؟

لا يزال الفش..... إحم.. الضرم مستمرا

- العيان (بيدور على حجة مقنعة): عندي أوحة..
- أنا (الفاظ بذيئة وأباحة ع الصبح): لأح تغلط ح نغلط..
قلة الأدب مش صعبة..
- سيد (كان قاعد بيسمع الحوار بلا مبالاة وهو بيكلم الأوكشة ع الواطس): يقصد عنده كحة..
- ملحوظة ع الجنب الثاني: الشعب قبل ما يفشخ أسماء الأدوية كان فاشخ أسماء الابلكيشنز.. زي الواطس والفييس والإنستا..
- أنا (انت أكيد بتقول أي كلام): الأوحة هي اللي منزلأك من بيتكوا الفجرية وفي الجو دا؟؟
- العيان (بيستأنف احلامه): وكمان بانهج وأنا طالع السلم..
- أنا (اه.. مرارتي مش ملاحقة): هو وزن حضرتك قد إيه؟؟
- العيان (بعد عمليات حسابية معقدة): 180..
- أنا (فين التمييز اللي في آخر الرقم؟؟): هي إيه وحدة القياس المستخدمة؟؟
- العيان (الراجل كان كتير أوي بصراحة): 180 كيلو..

- أنا (ومش عايز تتهج؟؟ إذا كان أنا وزني 55 كيلو وبانهج وأنا باقرا الجرنال): تصدق صعبان عليا..
- العيان (اتعشم خير إني بدأت اتعاطف معاه): ايوة..
حالتي تصعب ع الكافر..
- أنا (هو يقصد مين بالكافر!!): مش انت.. السلم هو اللي صعب عليا.. بوزنك دا المفروض تتهج وانت بتعمل حمام..
- العيان (سيرة الحمام فكرته يشكوى خزعبلية جديدة):
وعندي حرقان في البيبي..
- أنا (بيبي مين والناس نايمين): عونيا.. أنا ح احولك على السيد استشاري البيبي.. أمنيات معاليك أوامر..
- العيان (غالبا فاكر إنه بيكلم عفريت الفانوس مش الدكتور): ومراتي بتشتكي إني باشخر وأنا نايم..
- أنا (انت اللي عالم بحالي يا رب): ما تروح تعالج مراتك، أنا مالي؟؟
- العيان (بيشدني من دراعي عشان يوشوشني في ودني):
المدام عندها شكوى تانية..

لا يزال الفش..... إحمو.. الضرم مستمرا

- أنا (ايوة كدا.. خش في المفيد بدل ما انت قاعد بتفسحني): عارفها.. خد قرص فياجرا خلّي المدام تبطل صداع..
- الممرض (كان خلص كلام في الواطس وقعد ياكل سفندي ويتفتف البذرع الأرض): الراجل بياخد نتروماك.. لو خد فياجرا ح يموت..
- أنا (على الأقل يبقى مات وهو عامل الواجب): يا بني الست طاردة الراجل من البيت في وش الفجر.. خلّي الغلبان دا يقدر يروح ينام في سريريه..
- العيان (واضح إن نذوات المدام مابتتهيش): وكمان.....
- أنا (حطيت إيديا الستة على بؤه): ولا كلمة زيادة.. لو المدام ليها أي طلبات خاصة خليها تبعت sms على نمرة البرنامج..

لا يزال الضش..... إحر.. الضرم مستمرا

#إيديا الستة!!

#هو أنا قلبت دودة ولا باخترف من كتر

التعذيب؟؟

#يمكن تهيوأت من السقعة؟؟

#تكونش دي حملة فريزر!!



طول العمر مش بتسيبه غير نادرا.. مابتخرجش غير مرتين في السنة.. يوم عيد ميلاد رمسيس ويوم عيد جلوسه.. اليوم دا بيبقى يوم زحل، لأن مهمة صفاء بتبقى إنها تدور على أوض المستشفى أوضة أوضة وتبيض على اللي قاعدين فيها وتمشي.. فاكرة نفسها شغالة في المدينة الفاضلة بتاعت توماس مور، في حين إننا شغالين في الجحيم بتاع دانتي.. مش ناقص غير إننا نحط يافطة على بوابة المستشفى مكتوب عليها "أبها الداخولون اتركوا ورائكم كل رجاء" زي ما دانتي كان كاتب على الجحيم في رواية الكوميديا الالهية..

- صفاء (لابسة أزياء الاحتفالات بتاعت كهنة الفراعنة.. واضح إن انهاردة عيد عندهم): صباح الخير.. عاملين إيه؟؟
- أنا (كنا كويسين من شوية صغيرين): الحمد لله في نعمة.. وحشتينا من العيد اللي فات يا صايف..
- صفاء (بلهجة اللي بيسأل الميس على ميادة آخر العنقود): أخبار الانفكشن كونترول عندكوا إيه؟؟
- أنا (انتي قديمة بجد.. المفاهيم دي اندثرت من زمان):

لا يزال الضم..... إحم.. الضم مستمرا

عندنا الانفكشن بوفرة.. إنما الكونترول متأخر.. الأوردر ماجاش على بعض.. الواد بتاع الديلفري بيشم بنزين 80..

- أنا (باندته على كوكب الممرضة): بت يا كوكووووو.. تعالي خدي أبلتك صفاء في tour في المكان.. إديها فكرة عن أنواع الآفات اللي بنريها هنا.. بس إيه مناسبة الكلام دا؟ إحنا هنا في أوضة السونار مش في العمليات..

- صفاء (بدأت تقرا التعاويذ بتاعتها): بتحموا العيانيين إزاي؟ الـprobe ممكن ينقل عدوى من مريض للثاني..

- أنا (ليه؟) الـprobe بيتحط على صدر العيان، مش عدم المؤاخذة في عينه): وماذا تقول الهتكم في هذه المسألة يا صففص؟

- صفاء (بدأت تتكلم بخشوع أول ما جبت سيرة الآلهة الوثنية): ممكن تغطوا الـprobe بكوندوم وتغيروه من عيان للثاني..

- أنا (حسيت بإديا تلجت ونار في صدري وبدأت اعرق.. معقول؟ أنا بييجي لي ذبحة!!): كوندوووم!!!! لبيبيه؟ هو الجهاز بيعط من ورانا!!

- صفاء (بتقرا باقي التعويذة): عشان التلامس!!
- أنا (واضح إن جهازنا خلاص ضميره انعدم): أنا ملاحظ إن فيه أجهزة صغيرة شبه جهازنا ماليين المستشفى.. بيسرحوا في الإشارات بمناديل ودايرين يشحتوا ع القهاوي!! والتوبس دا ح نشيله فين؟؟
- صفاء (بديتها حاضرة ما شاء الله): ممكن في درج مكتبك..
- أنا (ولو حد ظبطهم عندي اقول إيه؟؟): يا ولية دا إحنا ماعدناش فلوس نجيب جواناتيات.. مفيش حوض في الكابينية عشان نغسل إيدنا.. لحظة.. دا مفيش كابينية أصلا.. لما بنعوز نعمل بيبي بنحفر حفرة في الأرض.. مفيش ميزانية للهوا اللي بنتنفسه.. كل واحد بيحجب الهوا بتاعه معاه..
- كوكب (في الأول كانت رامية وذن عندنا.. لكن أول ما جات سيرة الكوندومز راحت رمت نفسها في حوض صفاء): وانتي متأكدة إن الجهاز ح يرتاح فيهم؟؟ مش يمكن يفضل الحقنة اللي كل 3 شهور؟؟!!

لا يزال الفش..... إحم.. الضرم مستمرا

- صفاء (بتبُّص لي يمكن انجدها من الممرضة): حقنة إيه؟!
- أنا (والنبي لاسيب كوكب عليكى تقطعك): أو يركب لاولاو.. شريط يعني..
- صفاء (صوتها بدأ يتحاش.. مش عارف من الخضة ولأ عشان كوكب قاعدة عليها مفضساها): لاولاو!!
- أنا (قُلت أما اهبتها الثقيلة): دكاترة المستشفى بيشتحتوا.. الواحد منهم باع نحاس أمه.. ولولا العيبة كان باع أمه نفسها.. انتوا لو جيبتوا لهم الكوندومزح ياكلوها..
- صفاء (ماكنتش متخيلة المجاعة اللي إحنا فيها.. كانت فاكرانا في مستشفى، طلعا في مخيم لاجئين): ياكلوها؟! (وقعدت تعيط)
- أنا (ايوة كدا اتصدمي.. إياكش تطبي ساكتة يا بعيدة): ما هم مش ح يقدرُوا يبيعوها.. ح يتكسفوا.. وطبعا مش ح يقدرُوا يستخدموها.. ما عاdash فيه صحة.. اتلمي يا صفاء وبطلي شغل المجوس دا.. قربتي تعبدي النار يا شيخة..

لا يزال الفش..... إحر.. الضرر مستمرا

#بئس الرأي يا بنت أبي صفصف

#أنا وراكي لحد ما تتوبي



المشهد الثالث والاربعون

حدث بالفعل في الرعاية:

المكان: مستشفى (الداخل مفقود) الدولي..

مشهد رقم واحد: ليل داخلي.. أنا نبطشي في الرعاية، وغالبا
النبطشية كانت بتحمل ضغائن من ناحيتي.. شايلة مني.. السقف
قعد ينشع حالات، وأخيرا ختمت بعيان مولود قبل بداية الدنيا
بشوية.. ولجل الصدفة السعيدة العيان بيّمت بصلة قرابة لسيد
الممرض اللي معايا في النبطشية.. العيان كان جاي في غيبوبة
ومعاه واحد قريبه..

- سيد (أول ما شاف العيان رفع الموبايل واتصل بمراته):

الوه.. جهزي نفسك.. عندنا عزا تاني بكرة..

- أنا (مش ممكن.. إحنا مشغلين معانا حانوتي): انتوا

واخدين على كدا ولاّ إيه؟؟!! (ثم موجه الكلام لقريب

العيان): هو جدو عنده كام سنة؟؟

- قريب العيان (الراجل عايش قبل اختراع سجلات

المواليد.. قبل التاريخ المدوّن نفسه.. فطبعاً قريبه مش

عارف عنده كام سنة): 104 .. 112 .. حاجة كدا..

- أنا (كذاب.. انت مغالط في 100 سنة ع الأقل): بياخذ علاج لأي حاجة؟؟
- قرييه (بيجاوب الإجابة النموذجية لـ 99% من المصريين):
الدوا اللي ب14 جنيه.. والدوا الثاني اللي علبتة أحمر في أخضر!!
- أنا (أحمر في أخضر!! مش ممكن تكون فيه شركة أدوية عملت الجريمة دي.. الألوان مش لايقة أبدا): يعني الراجل بياخذ الصنفين من قبل انقسام القارات ومش قادرين تحفظوا اساميهم؟؟
- أنا دخلت عشان اكشف ع العيان وبعد كدا خرجت عشان ابليغ قرييه بالأخبار السارة..
- قرييه (عينيه بتقول إنه ح يهدني نوبة هستريا من إياهم): إيه الوضع؟؟
- أنا (اجيبها لك إزاي؟؟): مفيش..
- قرييه (غبي جدا): ماعدوش حاجة؟؟
- أنا (الصراحة هي الحل): ماعدوش حاجة شغالة..

لا يزال الضمير مستمرا

- قريبه (الصراحة مش جايبه معاه): حالته ليها علاج؟؟ ح يبقى كويس؟؟
- أنا (ما هي لو كل حاجة بتتعالج كنا عشنا للأبد): لأ..
- قريبه (ردي الأولاني ما اقنعوش): ليه، هو عنده إيه؟؟
- أنا (هو أنا جاوبت ع السؤال دا قبل كدا ولأ دي تهيؤات؟؟): ماعرفش.. حالته مدارسنهاش في الكتاب..
- قريبه (لسة عنده أمل): التليفزيون بيقول العلم اتقدم..
- أنا (يخرب بيت التليفزيون اللي مخلي العشم قاتلك كدا): العلم له حدود والصبر كمان له حدود.. والإنسان منا له طاقة.. دا محتاج نبي مش دكتور..
- قريبه (مش عايز بيأس ويسيبني): انت بيقول إنهم بعدين ح يقدرنا يعالجوا كل حاجة في المستقبل..
- أنا (ما الشبكة نيلة في البلد كلها.. اشمعني عندك انت انت شغال): أنا من سكان كوكب بعدين.. جاي لك مخصوص من المستقبل عشان اقول لك مفيش فايده!!



لا يزال الضم مستمر

- العيان (بحنان دادة فاطمة بتاعت الحضانة): وليه يا بنتي الأذية دي؟؟
- أنا (هو انت لسة سُفت أذية؟؟ دا إحنا لسة بنسخن): ليه صحيح؟؟
- العيان (لمح سيد واقف من بعيد): سيد عصفورة الخاين العميل!؟
- أنا (طبعاً، هو إحنا حيلتنا غيره!؟): يخرب بيتك، سُمعتك سبباك.. الراجل ناسي أهله نفسهم.. نسي إيده اليمين ونسي اسمه وافتكرك انت.. (ثم موجها كلامي للعيان): معلش يابا الحاج.. أهو دا اللي موجود.. مش بننقي للأسف..
- العيان (خرج حاجة من جيبه وادها لي وهو بيسبل لي): طيب خدي الكونيه دا عشانك وبطلي دوشة..
- أنا (كونيه؟؟ إيه المخلوقات دي!!؟؟!): هي صورة مين اللي ع الجنية يا جدو؟؟ محمد على باشا!! دا أكيد يساوي ثروة..

- أنا (موجهها كلامي لسيد): خد بالك من الرعيّة يا ض
على ما اروح اتمن العملة دي عند محل الأنتيكات.. يمكن
نقدر نبيعها ونلاقي ناكل انهاردة.. بقى لي اسبوع صايم
صيام إجباري..

#اشوف فيك يوم اسيد انت وقرائبك

#شركاء الوطن ولازم نستحملهم

#هو الكونيه دا يطلع بكام مصري؟؟



المشهد الرابع والاربعون

حدث بالفعل في الرعاية:

الزمان: مشهد ليل داخلي..

المكان: سجن العقرب شديد الحراسة (مستشفى «ماتحاسبنيش

على ذنب عملته انت يا حبيبي» سابقا)..

عنوان المشهد: Me, Myself and Irene .. أو بالعربي.. أنا

وضميري وبثينة..

أبطال المشهد: أنا وضميري وبثينة!! ما هي باينة من

العنوان.. ما تركزوا شوية يا جماعة؟؟

أنا كنت نبطشي في الرعاية.. انهاردة إدارة المستشفى اقتتعت

أخيرا إننا في سجن.. لدرجة إنني وأنا داخل من البوابة لقيتهم

حاطين فوقها يافطة مكتوب عليها (رسميا انت مش هنا)

الموجودة على أحد السجون الشهيرة..

أنا كنت قاعد في النبطشية باحاول اقنع الطابط اللي

بيستجوبني إنني مافياش صحة للتعذيب.. انت لسة ح تتعلم فيا

لا يزال الفش..... إحمو.. الضرم مستمرا

- ضميري: خَلِّي عندك دم.. صديقتك بسبس تعبانة..
- بثينة: حاسة بوجع في جنبي اليمين..
- أنا: اعملي سونار ع البطن وتحليل بول..
- بثينة: ليه؟؟ دا مغص كلوي.. باين من غير حاجة..
- أنا: فيه حاجات كتير العيان بيفتكرها الكلية وهي حاجة تاني.. ممكن يكون قولونك بعد الشر.. أو قلبك إن شاء الله..
- بثينة: هو أنا خلاص اتصنفت عيان؟! يا صغيرة على الهم يا بسبس..
- أنا: ااااي..
- ضميري: اعقل يا شادي.. قتل بثينة مش حل..
- أنا: اتلهي يا بثينة واعملي الفحوصات وابقى ابعتيهوملي..
- بثينة: أهو أنا مش باكره في حياتي قد كلمة الفحوصات دي..
- أنا: والفحوصات بتكرهك برضو.. بس ح نعمل إيه.. انتي اللي عايزاها مش هي اللي عايزاكي..

- بثينة: أصلي مش عايزة اقع في ملقف التحليل دا..
- أنا: تحليل بول بقى ملقف!! ما بقى لك 30 سنة بتعملي بيبي ع الفاضي..
- بثينة: مش مستاهلة.. الوجع في الناحية اليمين قدام الكلية بالظبط..
- أنا: مش عايز فتاوي، اعلمي السونار والتحليل ولو طلع الجونين ولد ابقى سميه على اسمي..
- بثينة: أنا عاملة سونار من عشر سنين.. تفكر بقى غير صالح؟؟
- أنا: مش بس السونار اللي بقى غير صالح.. الدكتور اللي عملهولك نفسه بقى غير صالح.. دا تلاقي الجهاز اللي استخدمه مات من زمان..
- بثينة: أمري لله..
- أنا: ابعتي رقم الكارت ع الواتس اب..
- بثينة: استغلالي..
- أنا: اشتمي للصبح..

لا يزال الضمير مستمرا

- بثينة: إيه رأيك ابعت لك حاجة أحلى من الفلوس.. هو
أنا وريتك صورتني بقصة شعري الجديدة؟
- ضميري: استريا رب.. آخر مرة بسبب راحت للمزين
خلته عمل لها فورمة عُرف الديك..
- في اللحظة اللي بعد كدا بثينة نفذت تهديدها وبعثت لي فعلا
صورتها بقصة شعرها الجديدة..
- أنا: مين الكانجرو دا؟
- ضميري: احيه.. هي الزفتة شالت فورمة عُرف الديك
وحطت فورمة ليّة الخروف!!
- أنا: زفتة!! ماكانت بسبب من شوية..
- ضميري: حد يجيب البلدية اللي بتموت الكلاب للبت
دي..
- أنا: مش قلنا فوق «القتل مش حل».. راجع الفقرة
السابقة..
- ضميري: يا راجل وسع دي بت واطية..

لا يزال الفش..... إحو.. الضرم مستمرا

#إمتى صنفاك يخلص من الدنيا يا بثينة

#حتى ضميري خرج عن شعوره

#البلدية هي الحل



المشهد الخامس والاربعون

حدث بالفعل في العيادة:

الزمان: مشهد ليل داخلي، يوم 14 فبراير..

المكان: فندق القلوب المحطمة (عيادة القلب سابقا)..

عنوان المشهد: قلبي احبك.. ما تقولي بقى يا شيخة..

المناسبة: موسم فقع المرارة المعروف بيوم الفلاننتين..

أنا قاعد في العيادة باقِّب في قائمة الأصدقاء لعل وعسى
الاقى واحدة ارمي بلايا عليها وادبسها في هدية الفلاننتين..
بالمناسبة يا جماعة.. فيه أي واحدة بتحبني وساكتة؟؟ دا مش وقت
كسوف.. إحنا في أيام مفترجة.. الأخت اللي حاطة السماعات في
ودانها.. الأنسة اللي بتاكل جيلاتي هناك.. انتي مابتحسيش يا
بنتي؟؟ دا الجو تلج..

عموما أنا احب اوضِّح إنني ماليش في نظام الدبايب..
اللي عايزة تجامل تجيب لي اتين كيلو كبدة عشان الفقر عمل
لي انيميا.. أنا عايش في مجاعة من يوم ما استلمت شهادة
البكالوريوس..

وأنا قاعد سرحان في الوهم وبامنّي نفسي بالمستحيل، باب
العيادة اتفتح ودخلت منه بثينة صاحبتني ..

انتوا عارفين بثينة من القصة اللي فاتت.. وأنا كنت كلمتكم
عن هواياتها في إنها تاخذ استشارات مجانية وإنها تعمل نيولوك
كل شوية.. الحقيقة إن بثينة عندها هواية تالته وهي إنها كل
شوية بتفرکش مع كريم خطيبها.. بسبب بتفرکش مع كيمو كل 12
ساعة.. زي المضاد الحلوي..

بثينة دخلت العيادة وقعدت على الكرسي اللي قصادي..

إيه الحلويات دي.. انتي جيتي عندي برجليكي؟؟ وحياة
أهلك لاخليكي تدفعي القديم والجديد، حتى لو اضطرتي تبيعي
كليتك..

— أنا (بارفع سماعة التليفون في السكرتة وباكلم مدام آمال
ممرضة العيادة): ايوة يا آمال.. هي بثينة صاحبتني دفعت
تمن الكشف ولأ مزوغة من الكمسري؟؟

— آمال: هعهعهعهعهع.. اوووخ.. تفووو (أنا اقنعت نفسي
إنها بتّف ع الأرض مش عليا) انت فاكر عشان صاحبتك
ح نسيبها تكشف بلوشي؟؟ لو أمك نفسها جات هنا ح
تدفع..

لا يزال الضم... إحمر.. الضم مستمرا

— أنا (بلوشي مين يا عم.. كفاية البلوشي اللي في التلفون):
انتي إنسانة يا آمال.. صح كدا..

— أنا (مضطر غصبا عن بوزي اعامل بثينة كويس، لأن
آمال دفعّتها تمن الكشف): مالك يا أستاذة بتشتكي من
إيه؟؟ (ملعون أبوها العشين جنيه اللي تخليني استحملك
وكمان اقول لك يا أستاذة)..

الحقيقة إن بثينة ماردتش.. بسُّبس راحت مطلعة علبة سجائر
وولعت منها سوجارة وفضلت ساكتة!!

— أنا (اخذت السجارة منها ورميتها م الشباك): هاتي يا
ماما اللي في إيدك دا.. عشان لو آمال شمت ريحتها ح
تلم تمريض المستشفى ويجوا يحفلوا علينا.. ثم انتي من
إمتى بتدخني؟؟ وإيه النوع دا؟؟ سوبر!؟

— صوت من الشارع: انتوا يا عالم يا ولاد ال %^@\$*
(تقريبا عُقب السوبر وقع عليه)..

— أنا (اتقمّصت شخصية فاتن حمامة في دعاء الكروان
وكنت على وشك اقول لها خدامتكي أمنة): أوَمري يا
هانم.. حاسة بإيه؟؟

- بثينة (ماسكة الموبايل في إيد وحاطة إيدها الثانية ع المكتب قصادي وبتبص في الأرض): كتر القساوة عمل لي واوا..

- أنا (دي شكوى ولا أغنية من مهرجان ليلة الحنة؟؟):
فين؟؟!!

- بثينة (سرحانة في الكروكس اللي لابساه): في الحنة دي..
- أنا (هو المكتب بيوجعك للدرجة دي ولا إيدك جات في الدباسة بالغلط؟؟): انهي حنة يا ولية!! انتي مش بتشاوري على حاجة..

- بثينة: هحجح (اتنهدت وفضلت ساكتة)..

- أنا (اخلصي.. عايز ارجع اكمل تلقيح جتت ع البنات..
يمكن تُرزق بأي حاجة): هو كريم فركش معاكي تاني؟؟
يلا.. هو أصلا مكانش يستاهلك..

- بثينة (عينيها قلبت قلوب زي جيري لما يبشوف حنة الجبنة): ماتقولش كدا على كيمو.. دا أحلى كريم في المنطقة والمناطق المحيطة والكواكب المجاورة والمجرات الصديقة وحزام النيازك..

لا يزال الفش..... إحم.. الضرم مستمرا

- أنا (رفعت سماعة التليفون وطلبت رقم من غير ما هي
تلاحظ): الو.. مستشفى المخابيل العام.. ايوة يا حمدي..
لقينا المجنون اللي بتدوروا عليه.. مضبوط.. أنثى في
العقد الثالث ماشية بتقول كيمو كيمو.. البت بتضرب
كيميا باين..
- أنا (موجهها كلامي لُبْسُ بعد ما قفلت السكة): انتي
مش محتاجة دكتور.. انتي محتاجة كتاب تفسير الأحلام
لابن سيرين (صبرك عليا يا كلبة.. ح يجوا ياخدوكي
متسلسلة دلوقت)..
- وأنا قاعد بامثل بجثة بثينة في سري، قطعت جبل افكاري
اغنية «إن راح منك يا عين».. اتاريه تليفون بُسُّس بيرن..
- بثينة (قامت تجري وخرجت من العيادة وهي بتصرخ):
كرببييييم..
- أنا (بازعق بصوت عالي عشان تسمعني قبل ما تبعد):
هو المستعجل ركبك ولأ إيه! عموما مسيرك ح تيجي
تاني..

لا يزال الفش..... إحم.. الضرم مستمرا

#محدث يجيب لي دباديب

#أنا مش لاقى أكل عشان أوكل حيوان

جنب مني

#الدبدوب اللي ح يجي عندي ح يموت من

الجوع



المشهد السادس والاربعون

حدث بالفعل في العيادة:

الزمان: مشهد ليل داخلي..

المكان: مستشفى الأمراض العقلية عنبر 6 خطرين (عيادة

القلب سابقا)..

عنوان المشهد: وسع من وش العقلاء..

أنا كنت في العيادة مستتي الفرج.. الواحد مش عارف أنني أسوأ.. إن مايجيش عيانيين ولأ يجي عيان من النوعية اللي ح تدخل حالا.. وأنا قاعد باب العيادة اتفتح ودخل منه عم سامي..

نبذة مختصرة عن عمو سامي: عمو سامي زبوني من وأنا في تانية اعدادي.. أقدم زبون عندي.. هوايته المفضلة هي إحنا.. ايوة إحنا.. الراجل كل ما أصحابه يسقّعوا له ومايرضوش يخرجوا معاه يجي عندنا العيادة، لأنه مش بيحب يقعد ع القهوة لوحده.. طبعا سامي مش بيدفع لنا شوية.. تمن الكشف في المستشفى عشرين جنيهه، ودا مبلغ كافي لأنه يدخل ويرحرح وياكل وداني لمدة نُص ساعة.. بيتكلم خلالها في مختلف الموضوعات.. في التاريخ

لا يزال الفش..... إحمو.. الضرم مستمرا

- أنا (اه يا ابن ال....): سلامتك يا عمو؟؟ موضوع حلقة انهاردة ح يكون عن إيه؟؟
- عم سامي (قرر يدخل في موضوع الحلقة مباشرةً عشان يسيب أطول فترة ممكنة للإعلانات): هو الدوا الفلاني بيوقع شعر الرجلين؟؟
- أنا (هي حلقة انهاردة ح تكون عن كريمات إزالة الشعر ولاّ إيه؟؟): رجلين مين؟؟
- سامي (بيشمر بنطلونه عشان يوريني رجليه): شعر رجليا أنا .. أنا ملاحظ إنه بيتساقط بكثافة ..
- أنا (سيبتني من رجليه وبصيت على راسه اللي مافيهاش ولا شعرة): صعبان عليك أوي شعر رجلك؟؟ ما راح منك اللي أعز منه!!
- هنا باب العيادة اتفتح ودخل منه الراجل اللي بيقدم الفقرات بتاعت السيرك اللي أنا شغال فيه ..
- مقدم الفقرات (لابس لبس الكرنفالات وماسك بوق في إيده ويعلن عن النمرة اللي جاية): الآن موعدكم مع

المشهد السابع والاربعون

حدث بالفعل في الرعاية:

الزمان: مشهد فجر داخلي..

المكان: مستشفى (إن خف المريض فمن بخت الطبيب)

الحكومي..

أنا كنت نبطشي في الرعاية.. فجأة حسيت إننا شغالين في غابة.. السمك الكبير اللي هو العيانيين وأهاليهم بياكل السمك الصغير اللي هو أنا..

سمك في الغابة!! إزاي؟! هو أنا رجعت اهلوس تاني ولا إيه!!

أنا دخلت افرد نفسي على السرير في حجرة الأطباء الملحقة بالرعاية وكنت حاسس بشعور العجينة وهي بتتفرد بالنشابة.. ويظهر إن عيني غلفت ثواني، صحيت بعدها على صوت اقتحام ممرض الرعاية للأوضة.. ممرض الرعاية اسمه سيد، وشهرته (سيد عصفورة) زي ما قلنا قبل كدا..

- أنا (الخضة نسيتي واجب الحذر): جاي ليه يا بومة؟؟

- سيد (الكلام اللي أنا قلته ح يوصل للمدير بعد ساعة):
جايب لك الجرايد.. المصري اليوم مع ساندوتش البيض
بالجبنة اللي بتحبه..

- أنا (يا عياتي): تشكريا سيكو.. ولع النور وهاتهم لي في
السرير..

- سيد (قرر يطير اللحم من دماغي): قوووووم.. فيه حالة
عرض..

أنا قمت عشان اشوف الحالة، لقيت الستارة اللي على
سرير العرض بتتحرك كأن وراها عاصفة.. هنا خلايا الجين اللي
بتكون 90% من وزني قررت تصحى، فبدل ما اروح للسرير رجعت
خطوتين لورا..

- أنا (موجهها كلامي للجاسوس اللي معايا): قلبي حاسس
إنك بدل ما بتسلمني الحالة، بتسلمني للحالة.. مين اللي
ورا الستارة يا ض؟؟

قبل ما سيد يجاوب، الستارة اللي على السرير طارت
بالحامل بتاعها.. بصيت على السرير لقيت بُعْبُع الدكاترة على
مر العصور.. وحش المستشفيات.. القاتل التسلسلي لأطباء
الرعايات.. النسخة المصري من جاك السفاح.. عم محروس!!

- أنا (باحسب في سري عدد الشمتانين فيا بعد ما محروس يدوسني): خش ربّطه في السرير.. الراجل حاططني في دماغه من ساعت ما حرّمته من الأكل آخر مرة..
- سيد (خد خطوتين لورا وبقى واقف ورايا): ربّطه انت.. ما هو الراجل مسالم قدامك أهو..
- أنا (تبا لك أيها السحلية): تصدق باين عليه إنه مسالم.. دا لسة جايب سيرة عيلتي كلها..
- سيد (خد خطوتين كمان ناحية الباب): ما يخصنيش..
- أنا (ايقنت إنني رايح رايح فقررت اضحي): خش ربّطه وشايك عندي.. دا لو طالني ح يعملني فته..
- سيد (فتح الباب وبقى رجل جوا ورجل برا): إياكش يكون ح يعملك فتافيت مش فته.. أنا لو رحّت له ح اموت قبل ما اوصل عنده أساسا.. يا عم سيّبي أنا عندي عيال..
- أنا (وانت اللي زيك يعيش ليه أصلا؟؟؟) دا اللي أحسن منك ماتوا): يا بني موت وانت مطمئن.. انت ح تموت شهيد الواجب.. وإذا كان على عيالك في عنيا..

لا يزال الفش..... إحم.. الضرم مستمرا

- سيد (جرثومة عايشة معنا في القبيلة.. يادوبك مخلص لنا المية والاكسجين): لا يا عم.. انت ح تجوعهم..
- أنا (وانت اللي مشبعهم يعني؟!): أنا برضو؟؟ ما انت بتدور تشحت بيهم بعد شيفت المستشفى..
- سيد (دخل وقفل الباب وواضح إنه بدأ يلين): مش عيب.. بأمن لهم مستقبلهم..
- أنا (اخلىص قبل ما الراجل يقوم يحرتنا): إذا كان على التسول ماتخافش، أنا محترف في الموضوع دا.. باشحت من ساعت ما اتخرجت..
- سيد (طموحه أصغر من مخه): ح اخد عشرة بلبل..
- أنا (أخيرا.. يخرب بيتك فرهدتتي): هو ورك بلبل مفيش غيره.. بلاش جشع.. خد معاك فتحي وادخلوا اربطوه..
- سيد (بيفكرني بمأساة كنت ناسيها): فتحي من بعد آخر زيارة لمحروس ماعادش نافع.. أهله سفروه بلاد برا يكمل علاجه..
- أنا (ربنا يجمعك بيه على خير انشالله): يبقى البركة فيك يا وحش..

يظهر إن سيد حس إن رُبِع ببلب مبلغ يستحق المخاطرة..
فراح ساحب جوانتي من علبة الجوانتيات.. طبعاً كلمة «علبة
الجوانتيات» دي فيها مبالغة شديدة.. لأن نظراً للضائقة المالية
اللي بتمر بيها المستشفى، فقد تم إلغاء ميزانية مكافحة العدوى..
فمثلاً الجوانتيات اللي عندنا كلها (recycled) بنغسلها وبنعيد
استخدامها.. ولولاش إنها معمولة من المطاط كنا رفيناهها..

- أنا (لقيت سيد ساحب جوز جوانتيات شكلهم عبارة عن
منخُل.. المصفا نفسها فيها خرّوم أقل من كدا): إيه اللي
انت لابسه في إيدك دا؟

- سيد (مستوى تاني من الزبالة.. فاق البني آدمين كلهم):
جاوينتي.. عشان يمنع عني العدوي..

- أنا (ما شاء الله.. الواد so smart): دا كبيره يمنع عنك
الحسد!! خُش يا حبيبي خُش..

سيد ماكذبش خبر وراح داخل عند محروس.. والحقيقة إن
محروس ما قصرش مع سيد في حاجة.. الراجل عمل سيد سبحة..
حوله لفصوص ولضمه مع بعض بخيط.. بصراحة منظره وهو
بيتضرب كان يقطع القلب.. يلاً، ابن حلال ويستاهل..

لا يزال الفش..... إحو.. الضرم مستمرا

- أنا (موجها كلامي لجنثة سيد): ندر عليا لاعمل لك نعي في أكبر جرنال، وح اكتب فيه «انتقل إلى جهنم الحمرا سيد عصفورة.. مات متأثرا بغباء»..
- سيد (طلع إن لسة فيه الروح): صدااااع.. صدااااع رهييب!! هو أنا مش محتاج رسم مخ؟؟
- أنا (مخ إيه اللي ح ترسمه يا حزين؟؟ دا انت ما عندكش ريحته): صدااع!! صدااع بس؟! والدم اللي خارج منك زي النافورة الراقصة دا عادي؟؟ عموما أنا مش ح استخسر فيك حاجة.. وعندك أحلى رسم مخ لسايكو حبيبي..
- الجدير بالذكر إن سيد عبارة عن بطيخة بإيديين ورجلين.. مايعرفش رسم المخ بيتعمل إزاي ولا إيه هو المخ أساسا.. غالبا اللفظ اتقال مرة في الرعاية وهو سمعه بالصدفة..
- أنا (حطيت السماعة على راس سيد وعملت نفسي باسمعها): لا، رسم المخ تمام يا سايكو..
- سيد (لهجة فيها شعور بالامتنان): الحمد لله.. تعبتك معايا يا باشا..

- أنا (يا لهوي على وجع الضمير.. هو الواد اتربى بعد
العلة اللي خدها ولا إيه!): عيب يا سيد.. دا انت
اخويا.. ارتاح يا حبيبي، الله يرحمك.. قصدي تصبح
على خير..

#ماتت قصدي تمت!!

#طيري طيري يا عصفورة



المشهد الثامن والأربعون

حدث بالفعل في البيت:

الزمان: ليلة شتوية..

المكان: بيتنا..

عنوان المشهد: للنحس رأي آخر..

أنا كنت معزوم على مؤتمر علمي في الأقصر وأسوان ح بيتدي
بكرة.. إحنا كنا في الشتا.. في فبراير.. يعني المعاد المناسب والجو
المناسب للقيام بالرحلة دي.. صح؟

لأ طبعا مش صح، لأن نحسي حبيبي شم خبر بالرحلة رغم
محاولات التكتم الشديدة.. تقريبا معاه جدول مواعيدي.. بيعرف
يضرب فين وإمتى..

الجو اتقلب من قمة الثلج لقمة الحريقة في ظرف ليلة..
درجة الحرارة في القاهرة 99 في الظل.. دا معناه إنها في أسوان
ح تكون خارج حدود الترمومترات.. مش ممكن تتقاس لأن الزيبق
نفسه بيغلي في الترموتر..

لا يزال الفش..... إحو.. الضرر مستمرا

- أنا: ما انتي لسة واكله جمبري..
- مريان: عايزة كلب اربييه..
- أنا: تربييه إزاي!! انتي إيه علاقتك بالكلمة دي أساسا؟؟
- مريان: انت بتجهز شنطتك ليه؟؟
- أنا: مسافر أسوان..
- مريان: أمانة عليك.. ادعي لي في أسوان بلد المؤمنين إني
انجح المرة دي في زمالة كلية السفاحين الملكية..
- أنا: أنا رايح أسوان مش الحجاز..
- مريان: ماتخافش تجوز..
- أنا: إذا كان كدا يبقى بالنجاح إن شاء الله..

#نحسي_العزيز_ليك_شوق_في_حاجة_تاني؟؟

#يا_عم_سيبني_بقى_دا_المتجوزين_بيطلقوا



obeikandi.com

المشهد التاسع والاربعون

حدث بالفعل في الخرابة (القصة مش بتضحك
ومليانة شتيمة.. اللي بيتكسف مايقراش):

مشهد زفت داخلي؛ أنا كنت نبطشي الرعاية المرزية.. اليوم كان
معجنة من أوله.. مليطة على كل شكل ولون.. تحس إن النبطشية
انهاردة في بيت من بيوتش الديعارة مش في مستشفى..

وأنا قاعد في الرعاية الباب اتفتح، ودخل منه العامل بتاع
الطوارئ جايب عيان على كرسي متحرك.. العيان في حوالي
الأربعين وشكله كان في قوات الكوماندوز قبل ما يرفدوه لأنه كان
بياكل زمايله!!

نبذة مختصرة عن عامل الطوارئ: العامل (اسمه إبراهيم)
إنسان معاق ذهنيا بامتياز.. ماشي دايمًا ومصدر التخلّوف في وش
اللي قدامه.. عمرك سُفت واحد أستاذ في الغباوة؟؟ طبعًا لأ..
عشان كذا إبراهيم دا اختراع.. آخر ذكر في السلالة المتفردة دي..
سلالة أساتذة الغباوة.. المفروض يتحط في محمية لوحده.. مش
عشان يحموه، لكن عشان يحموا الكون المسكين من أذاه..

طبعا يا ولاد أنا عتيق في الشغلانة، والعلامات اللي في جتة
الواحد دي مش من فراغ.. 13 سنة من التحرش المتواصل خلوا
الواحد بيشم ريحة النجاسة من على بعد كيلو..

- أنا (موجها كلامي للعامل): الحتة دي موديل سنة كام يا
إبراهيم؟!

- إبراهيم (مش فاهم حاجة طبعا): هو إيه اللي سنة كام
يا باشاه؟؟

- أنا (داهية فيك وفي اللي مشغلينك): الاتوبيس اللي انت
داخل بيه.. ما هو دا مش ممكن يكون بني آدم، وإلا إحنا
نبقى سحالي بقى.. انت بتلم عليهم فين دول؟؟ بتجيبهم
من موسوعة جينيس؟؟

- إبراهيم (مايعرفش حاجة في الدنيا أكثر من إنه ياكل
ويشرب ويعمل بيبي): استغفر الله.. عيب يا دكتور، فيه
حريم واقفين (قصده على المرضات).. جنس إيه وأباحة
إيه؟؟

- أنا (طبعا.. وانت ح تفكر في إيه غير كدا): جنس!! هي
عموما مش غلطتك.. دي غلطة اللي سابك تعيش لحد

لا يزال الفش..... إحمو.. الضرم مستمرا

ما وصلت للعمر دا.. طول السنين دي مفيش ولا واحد
خلى عنده دم وكسب في البشرية ثواب ورشك بشوية
بيروسول!! نيم العيان على السرير خليني اشوفه ماله..
إبراهيم نيم العيان، وطبعاً نص متر من رجليه كانوا بارزين
من برّا.. رجليه تقريبا كانوا داخلين في أوضة العمليات، لأن
السرير عندنا معمولة بالأحجام القياسية.. ما عندناش سرير
على مقاس إنسان نياندرتال دا..

- أنا (انتي بقى يا بيضة طولك فين وعرضك فين!! الطول
هو اللي فيه الخياطة زي البطاطين؟؟): بـص يا بني.. انت
من الآخر كدا مش ممكن تكون عيان.. لأنك لو عيان
يبقى أنا أكيد من قتلى رواندا.. انطق بسرعة.. مالك؟؟
- العيان (بيتكلم بصوت ضعيف قوي.. تقريبا مش مسموع):
رع.. ---تحر-- بارح..
- أنا (يااااه.. كل دا): بتاخذ علاج للصرع وحاولت تتحر
امبارح.. ليه كدا يا بني بس؟؟ طيب معلش (وقعدت
اطبطب عليه)..

أول ما طبطبت عليه، برج إيפל دا قعد يعيط لدرجة إن الناس العادية اللي ماشية على الأرض افتكروا الدنيا بتمطر.. الحقيقة إن عند النقطة دي، الراجل صعب عليا.. هي هي هي هي هي هي.. ايوة أنا.. طبعا اللي يعرفوني عارفين إن موضوع إن حد يصعب عليا دا بيحصل مرة كل mellinium..

- أنا (ولما انت حاولت تتنحر، إيه اللي جابك هنا؟) هو خلاص محدش بيعمل حاجته بضمير أبدا!!): بطل عياط يا حبيبي.. اجيب لك حاجة ساقعة؟

- العيان (صوته اللي مكانش طالع جلجل فجأة): وسع من جنبى ماتلمسنيش وإلا ح اموت نفساااي..

- أنا (يا بني ما كنت تتنحر في بيتك معزز مكرم.. أقله كنت تموت وسط أهلك!! لازم تيجي هنا عشان تاخذ الختم بتاعي يعني!؟): اهدى ووحد الله.. بلاش الحاجة الساقعة.. إحنا حتى في نص الشهر والمرتب انتنحر هو الثاني..

هنا بقى أنا اكتشفت إن كلمة "حاجة ساقعة" تم إدراجها في قاموس الكلام الأبيح.. أو هي كلمة السر اللي بتحول دكتور جيكل

لا يزال الفش..... إحم.. الضرم مستمرا

لمستر هايد.. لأن في الثانية اللي بعد كدا، الراجل عينيه برقت
ووشه احمر وراح حاطط صوابعه العشرة جوا بؤه!!!!!! وبعدين
خرجها وهي مليانة تفاقة وحاول يخنق نفسه.. ولما اكتشف إن
دا شئ مستحيل علميا، راح مسك رقبتى وحاول يخنقني أنا!!!!!!
المفاجئة شلتني ثواني، وبعدين رُحت مخرّج الصاعق من
جيبى (أيوة معايا واحد مش بامشي من غيره) وكنت ح اكهرب
الزبون.. بس لقيت إنى ح اكهرب نفسي معاه، لأنى أنا والعيان
بقينا متوصلين على التوالي.. أنا احترت بصراحة، اموت مخنوق
ولاً اموت متكهرب.. لكن بعد تفكير عميق قررت اموت متكهرب..
على الأقل ح اخذ ابن المجنونة دا معايا.. لكن العيان ماطولش
علياً..

-العيان (ساب رقبتى وطلع يجري وهو بيخبط في الناس):
اللى ح يقرب منى ح اموته واموت نفساااي..

#مفيش أمن في المستشفى؟؟

#لأ

#ولا__بدل__مخاطر؟؟

#لأ!!

#ولا__بدل__عدوى؟؟

#ما__قلنا__مفيش__يا__عم

#عشان__لو__جه__مايتفاجئش



المشهد الخمسون

حدث بالفعل في التكية:

الزمان: مشهد نهار داخلي..

المكان: بيماريستان حتشبسوت لطب ما قبل التاريخ..

في اليوم دا أنا كنت شغال في إحدى أماكن القاهرة القديمة.. بيماريستان حتشبسوت الأثري.. طبعا المبنى اللي أنا فيه لا ينتمي لفئة المستشفيات غير بالياضة.. بعد الياضة اللي ع الباب، المكان عبارة عن حمام بلدي آيل للسقوط.. كان في الأصل تكية من تكايا السلطان وبعدين قيّفوه مستشفى.. السبب الوحيد اللي مانع الحي إنه يهدده هو إن وزارة الآثار حطته في الخريطة بتاعتها، فقالوا يسيبوه يقع لوحده.. هي ديها توكتوك يعدي جنبه ح ينهار من أساسه..

أنا كنت باقرا موضوع في الجرنال عن إنك لو ضربت مديرك تاخد 3 أيام جزا.. وأنا قاعد باشحن في نفسي، لقيت سكرتيرة المدير بتطلبني عشان المدير عايزني.. أنا رُحْتُ مكتب المدير ولسة ح ادخل لقيت السكرتيرة بتوقفني..

- السكرتيرة (اسمها ريهام): استنى شوية.. الباشا بيصلي..
- أنا (قررت استخدم أسلوب فتح الصدر الشهير): كل دا بيصلي؟؟ هو بيغسل ذنوبه كلها دلوقتي؟؟ انتوا ماقريتوش جرنال انهاردة ولا إيه؟؟
- بعد ساعة المدير خلص صلى فريهام دخلتني..
- أنا (منك لله يا شيخ عمري ضاع قصادك): صباح الخير يا جناب الباشا..
- المدير (بيخاف يرد السلام لا يقولوا عليه بني آدم): لسة ليك في الطب ولا نسيته ومركز في الأدب؟؟
- أنا (خبيت الجرنال ورا ضهري لحسن يلمح المقال): لا مفيش أدب..
- المدير (جينات المستعمر الاوروبي بدأت تنقح عليه): ما هو مفيش من الأول..
- ريهام (بتبص لي بصة بعنوان «ماشوفناش حاجة من البرم اللي برا»): اومال كنت عامل فيها عاشور الناجي ليه؟؟ دا أنا قُلت ح تكسرّ المكتب ع اللي فيه..

لا يزال الفشل..... إحمو.. الضرم مستمرا

- أنا (هو دا الفن يا ساذجة): برا تعمل أسد وتقل أدبك..
جوا تبوس الإيدين على طول..
- أنا (لمحت قلم شيك قدامه): جميل أوي القلم اللي مع
سعادتك.. باركر دا؟
- المدير (بينعي حظه اللي خلاه يتعامل مع هوامش المجتمع.
اللي زيي): انت عجوز أوي.. دا مش باركر.. دا مونت
بلانك.. القلم بـ 3000 جنيه..
- أنا (3000 جنيه يا إقطاعي!! أنا ح اسيب الطب واتاجر
في الاقلام): شبيك لبيك يا معالي الوزير.. كنت عايزني
في حاجة؟
- المدير (موجها كلامه للسكرتيرة): سيبينا لوحدنا يا
ريهام..
- أنا (بدأت اتشحتف مقدا من الخضة): إهئ إهئ إهئ..
ليه كدا يا مدير؟
- المدير (اداني منديل منفوف فيه قبل كدا): عايزك تقتصد
فيه عشان العياط جاي ياما..

- أنا (اللّٰه يقرفك): براير معاليك شرف كبير..
- المدير (نظرات محمود المليجي لما كان عامل دور مدير البوليس السياسي): قول الصراحة، ماذا والإعندنا أساليب تخليك تعترف إنك قتلت كليبر نفسه..
- أنا (قُلت اعترف يمكن يرحمني): وحياتش النيعمة أنا كنت ناوي اديك فكرة..
- المدير (لا استنى.. أنا اللي ح اديك): جهاز السونار اللي حيلتنا عطل.. ما رأيك في التهمة المنسوبة إليك؟؟
- أنا (جهازنا اللي شغال بأنبوبة البوتاجاز باظ!! هو طلع بيموت عادي؟؟): وأنا بقى اللي بوّظت جهاز الأوشاعة موديل تحتمس 1993!!
- المدير (اتأخذ من رد فعلي): أنا بأسأل بس..
- أنا (رمىت الجرنال على مكتبه مفتوح ع المقال): واشمعنى أنا اللي قتلتة؟؟ دا دكاترة بلدك كلها اشتغلت عليه..
- المدير (لمح عنوان المقال وحس إن الـ3 أيام مش ح يوقفوني): قدر يا شادي الحالة اللي إحنا فيها.. بوظان الجهاز متأثر علينا..

لا يزال الفش..... إحم.. الضرم مستمرا

- أنا (دا الجهاز نفسه صادر له قرار إزالة من ألفية فاتت):
حالة إيه يا راجل كفاياك افترا.. دا إحنا مابقيناش
عارفين نشخص بيه لوز حتى..
- المدير (ح يشحت علينا): الجهاز دا هو اللي ساند المكان..
- أنا (بياض عنيا قلب لفوق زي سمكة القرش في فيلم
"الفك المفترس"): الجهاز أبو منافلة هو اللي ساند
المكان!! دا إحنا اللي ساندا في بلدكوا دي ربنا..
- المدير (بيضا هي رد فعلي على تفاصيل الخبر في سره
وواضح إن النتيجة سيبت ركبته): خلاص خلاص، أنا
ح اتصرف.. انشالله حتى ابيع القلم.. ولو إنه هدية م
الزوزة..
- أنا: الزوزة مدياك قلم بالمبلغ دا؟! ليه.. انت ماشي مع
سلطان بروناي ولا إيه؟

لا يزال الفش..... إحو.. الضرر مستمرا

#3 أيام جزا بس

#شير في الخير



لا يزال الفش..... إحم.. الضرم مستمرا

تم الجزء الثاني بحمد الله

قريباً الجزء الثالث

#To_Be_Continued

شاوي خيري حليم

القاهرة، 2016

للتواصل مع الكاتب على ال: Facebook

Shady Khairy Hakim

obeikandi.com

شكر خاص

— سيسيل سامي: بنت خالي.. متشكر على كل الدعم
والمساندة.. أنا طبعاً مش ح اقدر اقول انتي ساعدتيني
إزاي، لأن كلها أشياء يعاقب عليها القانون.. كل حي أدري
بروحه..

— عادل السمري: صديقي المحامي والأديب الشاب.. زميل
البدايات والأسفلت اللي اشتكى من كتر ما دوّنا رجلينا
عليه مشي.. الراجل اللي وقف جنبي عشان نشجع
ونسند بعض، وأول واحد ح اكبّه واقبله لما ربنا يكرمنا
إن شاء الله..

— ولاء الدين فاروق: صديقي المهندس والشاعر الشاب..
انظر الفقرة السابقة.. مش ح نفضل نلتك كثير..

— الأصدقاء والزملاء في دار أطلس للنشر: أستاذ/ حسام
حسن.. أستاذة/ لمياء السعيد.. باشمهندسة/ نوران
المصري.. أستاذ/ عزت العربي.. أستاذ/ ياسر صبيح..
موشكرين على تعبكم معاي.. يترد لكم في الفرحة دائماً..

- أستاذة سهير فوزي: رئيس مجلس إدارة مفوضية اللاجئين.. باكرر الشكر إنكم لسة ماحبستوناش..



الصفحة	الفهرس
٥	إهداء:
٧	مقدمة:
٩	ما بعد المقدمة:
١١	دكتور لامؤاخذة من ثاني:
١٣	المشهد الأول:
١٩	المشهد الثاني:
٢٥	المشهد الثالث:
٢٩	المشهد الرابع:
٣٥	المشهد الخامس:
٣٩	المشهد السادس:
٤٣	المشهد السابع:
٤٧	المشهد الثامن:
٥١	المشهد التاسع:
٥٧	المشهد العاشر:
٦٣	المشهد الحادي عشر:
٦٩	المشهد الثاني عشر:
٧٥	المشهد الثالث عشر:
٨١	المشهد الرابع عشر:

٨٥المشهد الخامس عشر:
٨٩المشهد السادس عشر:
٩٥المشهد السابع عشر:
٩٩المشهد الثامن عشر:
١٠٣المشهد التاسع عشر:
١٠٩المشهد العشرون:
١١٣المشهد الحادي والعشرون:
١١٧المشهد الثاني والعشرون:
١٢٣المشهد الثالث والعشرون:
١٢٧المشهد الرابع والعشرون:
١٣١المشهد الخامس والعشرون:
١٣٩المشهد السادس والعشرون:
١٤٥المشهد السابع والعشرون:
١٤٩المشهد الثامن والعشرون:
١٥٣المشهد التاسع والعشرون:
١٦١المشهد الثلاثون:
١٦٩المشهد الحادي والثلاثون:
١٧٣المشهد الثاني والثلاثون:
١٧٩المشهد الثالث والثلاثون:

١٨٥	المشهد الرابع والثلاثون:
١٩١	المشهد الخامس والثلاثون:
١٩٩	المشهد السادس والثلاثون:
٢٠٩	المشهد السابع والثلاثون:
٢١٧	المشهد الثامن والثلاثون:
٢٢١	المشهد التاسع والثلاثون:
٢٢٥	المشهد الأربعون:
٢٢٩	المشهد الحادي والأربعون:
٢٣٧	المشهد الثاني والأربعون:
٢٤٣	المشهد الثالث والأربعون:
٢٤٩	المشهد الرابع والأربعون:
٢٥٥	المشهد الخامس والأربعون:
٢٦١	المشهد السادس والأربعون:
٢٦٥	المشهد السابع والأربعون:
٢٧٣	المشهد الثامن والأربعون:
٢٧٧	المشهد التاسع والأربعون:
٢٨٣	المشهد الخمسون:
٢٩١	شكر خاص:

حقوق الطبع محفوظة للناشر



أطلس

للنشر والإنتاج الإعلامي

يحظر نشر أو اقتباس أي جزء
من هذا الكتاب إلا بعد الرجوع
إلى الناشر